

BARITA

DI NGUAN

LIBRARY OF THE  
Massachusetts  
Bible Society

Catalog No. Av 214.2 (16) / SEL 1917

Family AUSTRIC

Sub-Family AUSTRONESIAN

Branch INDONESIAN

Group MALAY

Language BATTA

Dialect ANGKOLA

Locality South Sumatra 103°E-3°S

Contents Selections from Old Test.

Version First ed.

Translator H. J. Eggink

Published by Ned. Bijbelgen.

Place Amsterdam

Date 1917

Accession No. 1846

Accession Date JAN. 15, 1938

Price \$0.65







BARITA NA DENGGAN.



BARITA NA DENGGAN

NA TARSOERAT

DI

HATA NI DEBATA

(PARDJANDJIAN NA HONOK)

BINAEN

DI

HATA ANGKOLA.

NA NIPARONGKOMKON NI KONGSI BIBEL NEDERLAND DI AMSTERDAM

1917.

# Bijbelsche Verhalen van het Oude Testament

IN HET

ANGKOLA-BATAKSCH.

---

Made in Netherlands

## I S I N A.

---

nggol.	Alamatna.
1. Taringot toe hatotompa ni langit dohot tano . . . .	1
2. Taringot toe djolma na pardjolo dohot ingananna di tano on . . . . .	3
3. Taringot toe moela ni dosa . . . . .	4
4. Taringot toe Si Kain dohot Si Abel. . . . .	6
5. Taringot toe Aek na oto. . . . .	8
6. Taringot toe anak ni Si Noak dohot taringot toe palas- palas di hoeta Babel . . . . .	10
7. Taringot toe Si Abraham . . . . .	11
8. Taringot toe Si Abraham (oedoetna). . . . .	13
9. Taringot toe Si Abraham dohot Si Isak . . . . .	15
10. Taringot toe Si Isak . . . . .	17
11. Taringot toe Si Esaoe dohot Si Jakob. . . . .	20
12. Taringot toe Si Esaoe dohot Si Jakob (oedoetna). . .	22
13. Taringot toe Si Josep. . . . .	24
14. Si Josep di tano Misir . . . . .	26
15. Maloea Si Josep sian hoeroengan i. . . . .	28
16. Kahanggi ni Si Josep toe tano Misir. . . . .	30
17. Si Benjamin dohot toe tano Misir. . . . .	32
18. Dipatandahon Si Josep ibana di kahangginia . . . .	34
19. Si Jakob na boengkas toe tano Misir . . . . .	35
20. Taringot toe Si Moses . . . . .	38
21. Disoeroe Debata Si Moses paloeahon halak Israel. . .	41
22. Taringot toe oehoem na sampoeloe i. . . . .	42



Ponggol	Alamatna.
23. Taringot toe pardalanan ni halak Israel . . . . .	45
24. Sian Laoet Aroengan i lopoos toe dolok Sinai . . . . .	46
25. Taringot toe Hata na Sampoeloe i . . . . .	47
26. Taringot toe gana-ganaän lomboe sere . . . . .	49
27. Taringot toe bagas djoro i . . . . .	50
28. Taringot toe halak Israel dompak di halongonan . . . . .	52
29. Disoeroe Si Moses mangkahap tano Kanaän . . . . .	53
30. Moelak toe halongonan . . . . .	56
31. Taringot toe Si Bileam . . . . .	58
32. Taringot toe hamamate ni Si Moses . . . . .	61
33. Taringot toe Si Josoea . . . . .	62
34. Taringot toe halak Israel doeng baroe masoek toe tano Kanaän . . . . .	64
35. Taringot toe Si Gidion . . . . .	65
36. Taringot toe Si Roet . . . . .	68
37. Taringot toe Si Eli dohot Si Samoeël . . . . .	71
38. Taringot toe Si Samoeël dohot Si Saoel . . . . .	74
39. Taringot toe Si Daoet . . . . .	76
40. Taringot toe Si Daoet dohot Si Goliat . . . . .	77
41. Taringot toe paraloan ni Si Saoel dohot Si Daoet . . . . .	79
42. Taringot toe pandelea ni radja Saoel . . . . .	82
43. Taringot toe radja Daoet . . . . .	84
44. Taringot toe marsak ni roha, na doempang di radja Daoet . . . . .	86
45. Taringot toe na masa di radja Daoet, doeng matobang ia . . . . .	88
46. Taringot toe radja Salomo . . . . .	89
47. Taringot toe Si Rehabeam dohot Si Jerobeam . . . . .	92
48. Taringot toe panoerirang Elias . . . . .	94
49. Taringot toe panoerirang Elias (oedoetna) . . . . .	97
50. Taringot toe panoerirang Elisa . . . . .	99
51. Taringot toe panoerirang Jonas . . . . .	102

Ponggol.	Alamatna.
52. Taringot toe haradjaän Israel. . . . .	104
53. Taringot toe haradjaän Joeda. . . . .	105
54. Taringot toe Si Daniel . . . . .	107
55. Taringot toe Si Daniel (oedoetna) . . . . .	109
56. Taringot toe hamoemoelak ni halak Israel sian haboe- angan i. . . . .	111
57. Taringot toe Si Nehemia . . . . .	113
58. Taringot toe Si Ester . . . . .	114
59. Taringot toe Si Hiob. . . . .	117
60. Hasidoenganna . . . . .	119

---



## PONGGOL 1.

### Taringot toe hatotompa ni langit dohot tano.

Ale dakdanak ! moeda adong na manjapai hamoe, sanga ise na mandjadihon soede na niida ni matamoenoe, ra didok kamoe: Toehanta do na mambaen i soede. Toetoe do i. Anggo hita djolma, nada malo hita mambaen i, harana nada toek gogonta dohot hapistaranta.

Moeda toekang iba, malo do iba mambaen bagas anggo adong hajoe sanga boeloe dohot pandjamaän ; malo do iba paoelihon hajoe i, mambarbarsa sanga mangotomsa, tapi nada malo iba mandjadihon hajoe i. Debata do nampoena karedjo di si.

Songon i moese, moeda toekang bosi iba. Moeda adong bosi, malo do iba manopa goepak sanga pangkoer sanga goloe, tapi bosi i, na nitombang do i, Debata do mangadongkon i di bagasan tano i.

Nasa na adong, Debata do patoepahon i di hita, djadi moeda tapadjaha-djaha i, inda na homang ma rohanta hara ni ibo ni rohana mida hita ?

Di hatiha na robi, na di borngin ni bornginan, nada adong dope bagiaha. Djolma manoesia, pahan-pahanan, binatang harangan, batang aek, dolok, roera, mata ni ari, boelan dohot bintang, sasoe-dena i nada podo adong. Hoem sasada Debata do adong.

Djadi di toemboek ni rohana didjadihon Debata soedena i. Soegari didokkon Debata langit dohot tano dohot pangisina oelang so rap adong i, djalop do i adong di bagasan sangkinidop mata, tapi nada songon i pangalahona. Marroeas-roecas songon toboe, marsihat-sihat songon pisang, boti ma roepani pambaenan ni Toehanta. Roehoet onom ari asa sidoen, didjadihon Debata soede.

Pardjolo ditompa Debata parmoelaän ni na tarida noeaeng, tapi marbaoer-baoer, taro so adong dope bagiaha tompana na toere, boti pe golap boelita soede.

Ia na goemodang hasaja, i ma na torang i. Andap oelang adong na torang, nada mangoloe bagiaha. I do dalanna dibaen didjadihon Debata na torang i di ari pardjolo. Didokkon Debata : „adong ma na torang”, ning ia, djadi adong ma i toetoe di na santongkin i. Intap

ni i margonti-gonti ma na torang dohot na golap. Na torang i, i ma na tadok arian, na golap i, i ma na tadok borngin. I ma da na nitompa ni Debata di ari pardjolo.

Djadi doeng torang ari, dapot ma ari padoeahon, didjadihon Debata ma langit i. Dipainding Ia ma aek i, antjo asing aek i di gindjang songon omboen i, asing moese ma di tano on songon angka moeal, batang aek dohot laoet. Asa doeng sidoeng i, potang ma ari, salpoe ma ari padoeahon i.

Na doeng dipoengka Debata di ari padoeahon, dipaoedjoeng Ia di ari patoloehon. Anggo aek na di toroe on, hoerang sadá dope inganna. Bahatán marbaoer dohot tano i, djadi songon ombik sanga rodang na bolak idaon. Nada podo hainganan djolma tano on. Djadi di ari patoloehon ditotopkon Debata inganan ni laoet, dano, batang aek, soenge dohot moeal, asa tarida ma tano na mahiang i na nidok darat, djadi binoto ma dolok dohot roera. Asa doeng songon i, didokkon Debata na angkon toeboe hajoe, doehoet dohot soean-soeanan, bo marmoeldopan ma i, adong ma padang na mangarata, oeroeng-oeroeng, harangan dohot tombak godang i. Asa doeng sidoeng i, potang ma ari, salpoe ma ari patoloehon i.

Djadi doeng dapot ari paopatkon, ditompa Debata ma mata ni ari, boelan dohot bintang baen sipanorangi djadi totop ma i dibaen parsorin-sorin ni ari, boelan dohot taon. Asa doeng sidoeng i, potang ma ari, salpoe ma ari paopatkon i.

Doeng i pe asa ditompa Debata na markosa i, harana madoeng adong hangoloehonon ni i. Di ari palimahon i nidjadihon ma ihan laoet dohot ihan batang aek, angka na goemolmoet di aek i. Doeng i, laing di na sadari i dope, angka oenggas dohot soede na markabong. Asa doeng sidoeng i, potang ma ari, salpoe ma ari palimahon i.

Djadi di ari paonomkon maroedjoeng ma soede, ditompa Debata ma angka pahan-pahanan, binatang-binatang, angka na mandjoeroer songon oelok ragam bage, dohonon sandok na markosa adong ma i di na sadari i mangihoetkon lomo ni roha ni Debata. Ia na parpoedi ro, manoesia i do i, harana soemoeroeng soemangap ia. Laing di ari paonomkon i do nian, tapi ia ma pantjidoenganna i.

Djadi danggan soen dibaen Debata soede. Boti ma roehoet ni hatotompa ni langit dohot tano dohot pangisina.



## PONGGOL 2.

**Taringot toe djolma na pardjolo dohot ingananna di tano on.**

Madoeng tangkas taboto taringot toe langit dohot tano on, sanga bia panompama dibaen Debata. Djolma i pe na nitompa ni Debata do ia. Diboeat Debata ma tano liat, digana Ia i, djadi tarida ma na marroepa djolma. Soede goar-goaran ma di si, tapi hoem tompana do adong, anggo hosana napodo. Djadi diomboeskon Debata ma hosa toe bagasan igoeng ni gambaran djolma i, bo boeloes mangoloe ma i dibaensa. Djadi digoar Debata ma ibana Si Adam.

Sandok tano on madoeng pade inganan, tapi hara ni holong ni rohana dipasoeroeng Debata dope inganan ni Si Adam, loeat Eden goarna. Djadi di loeat Eden i adong moese dope dibaen Debata koboen na soen dengganna dohot napoena, na margoar Paradis, paoeli-oelion ni Si Adam ma i didokkon Debata. Nada pola bia halodjaännia, dosko halilian dietong ia na markaredjo i. Djadi sonang dilala Si Adam di Paradis i, angke singkop soede adong di sia, panganon nada hoerang, pamatang nada haroe lodja, njae orongonkon pe soada, salakoe sonang sadjo.

Sangkiboeng do na nirarang ni Debata di sia. Adong di tonga-tonga ni koboen i hajoe na godang, na margoar hajoe parbinotoan taringot toe na denggan dohot na djat, nada djadi dipangan Si Adam batoena i, angke ro dok ni Debata toe sia : „djago ho sanga dipangan ko batoe ni hajoe on, oelang mate ho dibaen i,” ning ia. Dalanna didokkon Debata songon i, antjo diparsipodai Si Adam na mangoloi. Nada bagi halalango sanga hamatean batoe ni hajoe i, tapi na mangalaosi pandok ni Debata, i do hamatean i. Moeda djais Si Adam di hata ni Debata, hamatean do i di sia, tapi moeda pantoen rohania adop i, hangoloean do i. Djadi dioloi Si Adam na nidok ni Debata, nada dipangido rohania batoe ni hajoe na sangkiboeng i.

Nada sadia lolot doeng i adong ma toetoe na hoerang dilala Si Adam. Dompak na manggoari angka binatang i ia, moer tangkas ma di sia na hoerang i. Soede na markosa marrangkap do diida ia, tapi anggo ia nada adong rangkapnia djolma, laing na sasada ia ma matoea. Djadi dibaen diboto Debata na di roha ni Si Adam bope dibaen diparkatoetoei Ia, didokkon Ia ma : „nada pade te he moeda

hoem sasada Si Adam djolma, Hoelehen noma panolonginia na tama rangkapnia," ning ia. Djadi dompak modom Si Adam diboeat Debata ma roesoeknia angkiboeng, dipaoeli Ia ma i baen djolma dadaboroe dongan ni Si Adam.

Asa doeng ngot Si Adam dilehen Debata ma dadaboroe i di sia dongannia di tano on. Djop sitoetoe ma roha ni Si Adam mangidasa, didokkon ia : „on ma hape holi-holi sian holi-holingkoe bope siboe sian siboe koe," ning ia. Intap ni i laing na rap-rap ma halahi marsonang ni roha. Si Hawa do goar ni dadaboroe i. Rap dioloi djana dihaolongi halahi ma Debata, angke godang do asi ni rohana di halahi.

### PONGGOL 3.

#### Taringot toe moela ni dosa.

Ise djolma diboto hamoe na so adong dosana ? Nada adong, atehe, soede djolma manoesia adong do dosana. Barang ise na mambaen na so toemboek di roha ni Debata, na mardosa do ia. Aha dalanna ra djolma i mambaen na so toemboek di roha ni Debata ? Anggo i, adong ma sibolis na manggete-gete roha ni djolma i. Na djolo, dompak so didjadihon Debata langit dohot tano, dioloi ia do Debata, tapi doeng ro gindjang ni rohana marbalik ma ia. Olat ni i laing na maralo ma ia dohot Debata, nada marnaso be ia mandjalahi dalan paärsak Debata.

Songon i moese ma doeng diida ia Si Adam dohot Si Hawa marsonang-sonang bope ringgas marsomba toe Debata. „Angkon hoese-gohon i," ning rohania, djadi na painte-intehon noma ia di ari na tarpalaloe djat ni rohania i. Madoeng diboto ia na nidokkon ni Debata di Si Adam dohot Si Hawa taringot toe hajoe parbinotoan i. „Soera antong dapot aoe halahi tongkon mamoloes sian hajoe na sangkambona i, hoeboto do mangelek-elek halahi mandai batoena i. Saocelak pe soegari, daboe ma rohangkoe," ning rohania. Djadi dipoeldit ia ma oelok solopannia, angke sian sagoeman binatang, i ma sada na oembisoek.

Djadi doeng solop ia toe si, mandjoeroer ma ia toe bona ni hajoe nangkinan i, laloe markarpe ma ia di si painte-intehon sanga andi-

gan mamoloes Si Adam dohot Si Hawa. Nada sadia lolot, bo ro ma toetoe halahi marlaho-laho. Djadi doeng di toroe ni hajoe i, diingot halahi do nia hata ni Debata, tapi nada tarorom halahi so manaili toe si. Denggan ni panjarmakna bolbol ni parboeloengna diida halahi, batoena pe antong roepa tabo do. Djadi dompak songen i dipalaloe sibolis i ma bisoeknia, angke mangkoeling ma oelok i, ning ia ma mandok Si Hawa : „atehe, toetoe de he na hoebege, didok Debata di hamoe na so tola panganonmoenoe batoe ni hajoe na di koboen on ?” ning ia. Ro Si Hawa : „nada songon i pandok ni Debata, tola do nian panganonnam i batoe ni hajoe na di koboen on, tai toetoe, anggo batoe ni hajoe na sangkambona on nada tola, harana moeda hami pangan i, mate ma hami,” ning ia. Ro oelok i : „nada toetoe i le ! nada pola mate hamoe anggo hoem didai hamoe, tapi on do da i, diboto Debata moeda dipangan kamoe i, pistar ma hamoe songon Ia, torang ma diboto hamoe na denggan dohot na djat. Dai ma da, nada bagi mahoea hamoe dibaen i,” ning ia. Djadi ditangihon Si Hawa ma hobar ni oelok i, por ma rohania mangankon. Djadi dipoetik ia ma sada laloe dipangan ia, doeng i dipoetik ia sada nari, dilehen ia di Si Adam, bo dohot ma Si Adam mangankon.

I le otona i ! hoem soen dipangansa tarsoenggoel ma roha i, boeloes mago ma sonangna i dibaen dilaosi halahi na nidok ni Debata. Taroktok ma dosar-dosar, bada giot toeboe ma, harana ma marsisolsolan. Sahonokna moeda marsimora-mora toe Debata, sonang ma pangkila-alaän, tapi doeng na marsala i mabiar ma, ilana pe so doeng. „Bia he mondjap kita toe roemboen-roemboen i, oelang diida Debata hita !” boti ma tahi ni halahi. Djadi mondjap ma halahi. Ma songon na maoto halahi, angke aha na so diboto na so diida Debata, tarbaen ma lakna mondjap adop Ibana ?

Djadi andos potang pio-pio ma Debata : „djo Adam, di dia do ho ?” ning ia. Ro Si Adam : „di son do aoe, mabiar do hami bope ila rohanami, harana na marsaemara do hami,” ning ia. Ro Debata : „ise na paboahon di ho na marsaemara ho ? Adong ke dipangan ko batoe ni hajoe, na Hoedokkon na so djadi panganonmoe ?” ning ia. Ro Si Adam : „dadaboroe i na nilehenmi di aoe, papangankonsa di aoe djadi hoepangan,” ning ia. Djadi didokkon Debata di dadaboroe i : „atehe, dibaen ko songon i ?” ning ia. Ro dadaboroe i : „dipaoto-oto oelok i aoe djadi hoepangan,” ning ia. Djadi songon i ma didoega halahi marsipaloeai dirina.

Doeng i hona oehoem ma halahi, halak lahi i lodja ma ia toe djoloan on mandjalahi takarna, dadaboroe i taononnia ma parkantjitan ragam bage, oelok i boetochana ma patna, doeng i moese, matoea nada tola be diingani halahi koboen na danggan na di loeat Eden i.

Djadi dibaen madoeng masa dosa i di tano on, dibagahon Debata ma soeroeonnia moese sada na paloeahon manoesia i sian i djana na manaloehon sibolis i. Songon on ma didokkon Debata di oelok i: „baenonkoe do paraloanmoe dohot dadaboroe on bope paraloan ni pomparanmi dohot pomparannia, ropoehon nia ma oeloemoe, toerbingonmoe ma tambihoelnia.”

Songon i ma da, barang ise na mangkombar dosa dohot hadjaha-tan, hamatean do na nidokna, tapi na mangkombar Toehan dapotan hangoloean.

---

#### PONGGOL 4.

### Taringot toe Si Kain dohot Si Abel.

Nada sadia honok doeng dipaorot Debata Si Adam dohot Si Hawa sian Paradis i, sorang ma di halahi dakdanak halak lahi na margoar Si Kain. Na djopan do roha ni halahi doeng adong i, daon ni marsak do i toetoe. Goemodang moese dope roha ni halahi doeng adong anggina Si Abel.

Asa doeng magodang, marsidjama karedjona ma halahi. Sipambaen do Si Kain, parkoboen do ia, anggo Si Abel marmahan do karedjona. Haroe saäma-saina pe halahi, roha i paäsing-asing do. Si Abel ma na toemoroek rohana, salang di bagasan parkaredjoanna nada djoengada loepa ia di Debata. Moeda hatiha maranak poso pahan-pahanannia dipili ia ma anak ni lomboc sanga anak ni biri-biri na oemmokmok lehenonnia di Debata.

Bia ma pangalehenna dibaen ia ? Songo on: dipaoeli ia ma par-kacelan, batoe na nipatimboen do i marbandjar-bandjar. Doeng sidoeng i, diboeat ia ma anak ni lomboc i sanga anak ni biri-biri i, disambol ia ma. Doeng ias nibobahan dohot niboetoehaän dipa-jakkon ia ma i di gindjang ni soban na di parkaoelan i. Doeng i ditoetoeng ia, antjo abis dipangan api i. I ma na nidok mangalehen

haoel. Angkon sian godang dohot djop ni roha do binaen, antjo toemboek di roha ni Debata.

Anggo Si Abel na boerdjoe sitoetoe do rohana mangalehen haoel toe Debata. Hara ni i dipasoe-pasoe Debata ibana, popar do pahan-pahanannia dibaen i. Si Kain pe laing na mangalehen haoel do moese, tapi nada adong pangasianna, nangke hoem saratna do di sia, adatoca adong labona. Djadi nada didjagit Debata haoelna i.

Hara ni i mangiboeroe ma roha ni Si Kain, sego ma rohania adop angginia, pola dipaingot Debata ibana, ning ia : „o Kain, biasi hantjit rohamoe ? moeda dipaoeba ho rohamoe, doempang ko ma na nipangido ni rohamoe, tapi moeda laing didatdati ho, djago ma ho, diondjap hadjahatan i ma ho !” ning ia. Tama soegari ditangihon Si Kain hata sipaingot i, tapi moer poetoeh rohania mambadai angginia i. Djadi diboan ia ma Si Abel toe balian ni hoeta i, toe na tar loengoen, antjo padoea-doea, doeng i ditangkoep ia ma Si Abel, dioemban ia lopoeh mate, bangkena dipadiar ia songon i, nada dipardoelihon ia. Djadi doeng moeli, dipaoela-oela ia songon na so adong bagiaha na masa, manjapai pe simatobangnia, didokkon ia na so adong pamotoannia. Haroe so adong pe djolma na midaän i, anggo Debata diidasa do.

Djadi didokkon Debata di sia : „o Kain, di dia do anggimoe Si Abel ?” ning ia. Ro Si Kain : „hoepaboto-boto he i, parorotonkoe dope lakra ibana ?” ning ia. Doeng i didokkon Debata di sia : „nada he diboto ho na binaenmi ? So dipaboa ho pe i, tano i na rara dibaen moedar ni anggini paboahonsa di aoe. Mardjaja ma ho dibaen djahat ni rohamoe, tondimoe alomoe, nada djadi be ingananmoe loeat o . Sandok na nidjamami angkon adong tilakona, pahae pahoeloe ma ho, nada be marondjolan”, ning ia. Djadi tarsonggot ma Si Kain hara ni posi ni oehoem i, mabiar ma ia mangaligi halak. Djadi didokkon ia di Debata : „betak diboenoe halak aoe,” ning ia. Ro Debata : „nada i, mabiar do halak mida ho, angke barang ise na mamoenoe ho, marloeloe ma i di sia pitoe lipat.” ning ia.

Mangonai do toe Si Kain hata boera i, oempe sada halak na ra mardongan ia.



## PONGGOL 5.

**Taringot toe Aek na oto.**

Djadi doeng lolot moer djadji ma manoesia i di tano on, roha i pe moer marragam ma, nada piga be na maradat maroehoem, salakoe hoin na marsibaen rohana na masa, ranggo-ranggo noma adong na manjomba Toehan Debata. Na djahat dohot na gedoek na binoto ni halak, pola marsak roha ni Debata paida-ida parange ni manoesia i. „Na sai denggan do Hoebaen soede di moela-moelana, hape songon i ma oedjoengna, tama soegari Hoepatimpas soede, tapi atena Hoepadiar dope saratoes doea poeloe taon nari, betak moeba roha ni manoesia i,” ning roha ni Debata. Djopan do antong rohania pangoloehon oelang na mangagohon.

Saripe nari noma adong na marroha na denggan na so ra satoep-toep dohot na djat roha i, i ma ripe ni halak Si Noak. Hara ni holong ni roha ni Debata, dipaingot Ia ma halahi, didokkon Ia ma : „O Noak ! denggan do Hoeida pangalahomoe, Hoepaboa ma di ho na di rohangki, moeda toek saratoes doea poeloe taon nari, mate mogap ma Hoebaen soede na markosa dibaen aek na magodang, tapi anggo ho dohot hamoe saripe pangoloeonkoe do. Baen ma paraoe na godang, oendjoerna toloe ratoes eto, bohangna lima poeloe eto, hintjatna toloe poeloe eto. Martirkat-tirkat bope marbilik-bilik baenonmoe i, antjo masoek toe si sian sagoeman bangso ni binatang sasarakap be. Sada moese, pasingkop ma bohal ni i, angke honok do djabat ingananmoe paraoe i,” ning Debata.

Djadi porsaja ma Si Noak di na nidokkon ni Debata, dipalagoet ia anaknia na toloe i Si Sem, Si Kam dohot Si Japet, ning ia ma mandok halahi : „oehoemcn ni Debata ma tano on, pamasaoennia ma aek na magodang, antjo mate mogap soede na markosa, djadi disoeroe Ia ace mambaen paraoe na godang, tama ma da tapoengka i saonari, harana anggo roha ni dongan i nada tarparbaga i, djadi hoemon hita na opat do na markaredjo. Ra dipartatai dongan i hita, tai nada mahoea, asal tabaen na nidok ni Toehanta”, ning ia.

Ro anaknia : „antong, tapoengka ma, moeda na so ra dongan i manolong, hoem hita pe djadi do,” ning halahi. Djadi doeng dipoengka halahi, peto ma na nidok ni Si Noak, marragam ma hata ni

halak. „Na mahoea do loeai Si Noak,” ning na sada. „Na rintik do ia,” ning na sada, djadi marpoepoe ro intjak dohot podoe ni halak. Anggo Si Noak dohot anaknia, nada dipatangi-tangi halahi, tapi laing na markaredjo ma halahi lopies sidoeng.

Asa doeng dapot hatiha na nidokkon ni Debata palaloeonna oehoem i, didokkon Ia ma di Si Noak : „pamasoek ma saonari sian sagoeman bangso ni binatang sasaraknap be,” ning ia, djadi dipamasoek Si Noak. Doeng i masoek moese ma ia dohot dongan saripena dohot anaknia na toloe bope sorangan ni halahi be, roehoet salapan halak.

Asa doeng nigoroek paraoe i togoe, ro ma da oehoem i. Opat poeloe ari opat poeloe borngin soeksek hilap, roeprap ronggoer, ro oedan potir, djadi moer magodang aek, moer manjonak ma i di tano on lopies lipoet dolok na hoemintjat i. Sanga toe dia pe dilodjong kalak sanga dilange halahi, laing laloe aek i toe si, maranggoehan ma sandok na markosa. Ia halahi na di paraoe i sonang do, oempe bagi mahoea, harana Debata mandjagahon halahi.

Djadi binong ma tano on dibaen aek i saratoes sampoeloe ari, doeng i asa mamoeangka meroes ma. Nada sadia honok tarida ma oedjoeng ni dolok na hoemintjat i djadi sangkot ma paraoe i di oedjoeng ni dolok Ararat. Djadi adong ma opat poeloe ari dicengkap Si Noak ma tingkap ni paraoe i, dipaloea ia ma kak. Na moelak-oelak do kak i, harana dapot ia do panganonna, angka bangke na marmoembangan di aek i. Djadi adong ma pitoe ari, doeng i dipaloea ia ma darapati, tapi tiboe do i moelak, harana nada adong songgopanna boti pe nada ra i mangan na boesoek. Djadi adong mangoelahi pitoe ari, dipaloea ia ma darapati i padoeanolihon, dioban darapati i ma ranting ni hajoe na marboeloeng di na moelak i. Djadi diboto Si Noak ma na giot hiang tano i. Djadi mangoelahi ma adong pitoe ari, dipaloea ia saelak nari darapati i, bo nada moelak be.

Asa doeng songon i poeloek ma Si Noak manadingkon paraoe i. Tardok so djop sitoetoe roha ni halahi, doeng tarbaen morot sian paraoe i, djadi has ma roha ni Si Noak mandok tarima kasi toe Debata na mangondingi halahi. Djadi didokkon Debata : „o Noak, saonari Hoepaboa ma di ho rohangki, nada ra be Aoe mangoehoem tano on dibaen aek na magodang. Haliboetongan i na niidami di langit i, i ma tanda hasaksian ni rohangkoe di ho. Soeang toe na djoloan i

marsorin-sorin ma ari logo dohot nonat, hatiha soeanon dohot sabion," ning ia.

## PONGGOL 6.

### **Taringot toe anak ni Si Noak dohot taringot toe palas-palas na di hoeta Babel.**

Asa doeng haroea Si Noak dohot dongannia sian paraoe i, bahat ma adong paresoön. Salapan do halahi na so mate dibaen aek na oto i, djadi bohal na nipasingkop laho masoek toe paraoe soede ne ma. Hara ni i sosak ma roha ni halahi mambaen saba dohot koboën, ragam-ragam ma nisoëan, antjo adong panganon.

Djadi adong ma saragam hajoe disoëan Si Noak, na margoar hajoe anggoer, na tonggian do batoëna, moeda niporo i, dapot ma inoëmon na lobi tabo. Hoem on do salana, moeda ma bahat toe niñoem i, ra do iba mabok dibaensa. Djadi saelak tarinoem Si Noak ma lobi sian na tama, djadi mabok ma ia. Djadi doeng diida Si Kam amangnia mabok, dipartatai djana diintjahi ia. Djadi moeroek ma Si Japet dohot Si Sem oembege intjaknia i, didokkon halahi ma di sia: „doeng na songon i tarsoeng pangalaho ni amanta, nada patoet dope diengenengen ko, na so oemboto oehoem do ho," ning halahi, djadi kehe ma halahi patoerehon amang ni halahi.

Asa doeng tarkalak Si Noak, tarboto ma disia parange ni Si Kam, djadi dimoeroëhi ia, didokkon ia ma : „dibaen na songon i djat ni parangemoe, hona boera ma ho dohot pomparanmoe barang na piga soendoet, hatoban ni kahanggimoe ma ho, pomparanmi pe hatoban ni pomparan ni halahi do," ning ia. Anggo Si Japet dohot Si Sem dipoedji djana dipasoe-pasoe ia.

Tiboe do mangoelahi riboer manoesia i di tano on, mari-ari ma dibaen gindjang ni oemoer dompahi. Songon Si Noak ma, toemboek onom ratoes taon oemoernia, di na mantak aek na oto i. Djadi nada sadia lolot, angkon manjarsar ma halak hara ni sompit ni tano. Saelak mandjalahi tano pambaenan ma halak, dapot ma padang na bidang na hornop di loeat Sinear, na momoan tomboeron ni aek. Djadi mamongka hoeta ma deba pomparan ni Si Noak di si. Mangasa riboerna

dohot denggan ni parkoetaän diambang halahi, na doeng tarbaen ma marroha-roha sanga songon dia hagiötna.

„Hita do na malo, goeroe di rohanta do soede !” boti ma hata ni na deba. „Tama do antong tabaen tanda ni sinaloanta dohot bisoekta, tanda saro ha hita moese, oelang be padao-dao hita. oelang be marserek harana saroempoen do hita,” ninna na deba nari. Djadi poeloe ma tahi ni halahi padjongdjongkon palas-palas na hintjat sanoli. „Angkon soengkot di langit oedjoengna i !” ninna sada. „Tano tako tabaen antjo tahan honok,” ninna sada nari. Djadi doeng dipoengka halahi, hoem satonga sidoeng dope, bo soendat ma karedjo i, harana diparoendoet Debata ma parkataän ni halahi, oempe marsiastoean be. Djadi i do pasarsar halahi.

Ia pomparan ni Si Japet kehe toe tano Eropa, pomparan ni Si Sem tinggal di si laloe rarat toe tano Asia, pomparan ni Si Kam kehe toe dangsina, toe tano Afrika.

## PONGGOL 7.

### Taringot toe Si Abraham.

Djadi adong ma di na rentje na galia halak na boerdjoe roha, na margoar Si Abraham, pomparan ni Si Sem, pasambilan soendoet ni i ma ia. Na markoeta do ia di loeat Oer, tapi hara ni dok ni Debata boengkas ma ia toe tano Kanaän. Asa doeng di si, dibagahon Debata ma di sia, soede loeat haboengkasana i ia ma nampoenasas moese dohot pomparannia. Tangkas do didokkon Debata : „lehenonkoe do i di pomparanmoe,” ning ia. Djadi homang do nian roha ni Si Abraham dohot Si Sara, dongannia saripe, oembege baga-baga i, harana madoeng matobang halahi. dakdanakna so adong, roha pe ma sajop antong. Oemoer ni Si Abraham pitoe poeloe lima taon ma, oemoer ni Si Sara ma onom poeloe lima taon.

Djadi didokkon Si Abraham di sorangannia : „sanga na bia pangalahona nada taboto i, asal tagolom hata ni Toehanta, nada ra Ia paoto-otohon hita,” ning ia. Na honok ma sai dipangido-idohon halahi, oelang so adong dakdanak, nangke aha ma hamoraän dohot sinadongan, moeda na soada dakdanak, tapi nada ra halahi pahae pahoeloe patopot-topot datoe, salakoe hoem Debata do pos ni roha,



sanga andigan ma toemboek rohania pasombœ haloeloengoen ni halahi di sinoean toenas.

Adong do nian Si Lot anak ni angginia, tapi nada sadia mardomœ ia dohot i boti pe nada sahoeta be halahi. Dalanna dibaen na morot Si Lot, marbada saœlak siparmahan nia dohot siparmahan ni Si Abraham hara ni padang djalangan. Djadi didokkon Si Abraham di Si Lot : „atehe, amang, gonan sirang kita oelang dohot kita marsalisi, siparmahanta i pe nada tama marbadai hara ni djampalan, dok ma sanga toe dia giotmœe ; moeda pahae ho, pahœloe aœ, toe siamoen ho, toe siambirang aœ, pili ma di ho !” ning ia. Soegari diboto Si Lot pantoen ni roha, patoet ro aloes nia : „nada songon i, amang toea ! ho do na patoet mamili djoemolo”, tapi hara ni hoerang ni rohania dipili ia manigor loeat na doemenggan anggo idaon ni mata. Djadi didokkon ia di Si Abraham : „doeng na gonan paasing-asing hita nimmoœ, toe loeat Sodom Gomorra ma aœ markoeta,” ning ia. Djadi boengkas ma Si Lot toe si.

Asa doeng loemolot maringanana Si Lot di si, manolsoli ma rohania. Toek do nian panganon dapot, djampalan ni pahan-pahanan bidang do, tapi roha i nada tarbaen sonang, harana na djorboetan do parange ni halak loeat i, nada holang masa hamoesœon. Saœlak ro moesœe i, bo djabat dohot Si Lot tarpangoes dohot ripenia, barang-barang-nia tartaban soede. Djadi soegari nada ro Si Abraham mardongan toloe ratoes halaknia palœahon Si Lot, bo hatoban ni halak do ia matoea. Adong dope angka radja ni loeat i dohot halak koeta i na tartaban, dipalœa Si Abraham moese, djadi giot mangalehen silœa ma angka radja i, tanda godang ni roha, nada ra Si Abraham mandjagitsa. Ning ia do mandok halahi : „na nilehen ni Debata di aœ, toek do i, boti pe indada tama didok halak hara ni silehen-lehen ni halak mamora Si Abraham”, ning ia.

Djadi dibaen toemboek di roha ni Debata pangaloesi ni Si Abraham, didokkon Debata ma di sia di bagasan amal : „o Abraham, Aœ do na mangondingi ho sahonokna, i pe dibaen so giot ko na barœon di silœa ni halak, Aœ ma mangalehen silœa na doemenggan di ho, pos ma rohamœ,” ning ia. Ro Si Abraham ; : „iale Toehan, aha ma goenana mangalehen Ko di aœ, so adong anakœe manean sindongankœe. Na doeng toemboek ma rohangkœe Si Eliœser naposongkœe na toemobang i mandjagit barang-barangkœe soede,” ning ia. Ro Debata : nada i, pos ma rohamœ, toebœe dope anak di ho sipanean”,



ning ia. Doeng i dioban Debata ma ibana toe balian, didokkon Ia ma : „o Abraham, ligi toe gindjang, diida ho bintang na di langit i?” ning ia. Ro Si Abraham : „hoeida, ale Toehan !” ning ia. Doeng i ro Debata : „bia do, tarbilang ko i ?” ning ia. Ro Si Abraham : „nada tarbilang aoe. ale Toehan,” ning ia. Doeng i didokkon Debata : „antong, songon i ma moese torop ni pomparanmoe,” ning ia. Doeng i sadá ma roha ni Si Abraham.

Hoem Si Sara do na tar dele rohana, moer matobang ia moer soada arop ni rohania. Djadi sai disosoi ia Si Abraham mamboeat Si Hagar. boedjing-boedjing pangoloi i, harana didok rohania : „betak te he angkon songon i do, antjo toeloes na nidok ni Debata,” djadi dioloi Si Abraham. Aha dope, olat ni i mago ma dame dohot sonang di bagas ni halahi, ganop tongkin marbada ma Si Sara dohot Si Hagar, djadi torang ma niida, sala do hape na binaen ni Si Abraham. Sanoli gilo Si Hagar, tapi tiboe do ia moelak. Nada sadia lolot doeng i sorang ma Si Ismail, i ma na oempompar halak Arab dohot halak Badawi.

---

## PONGGOL 8.

### Taringot toe Si Abraham (oedoetna).

Moeda doeng mangalehen бага-baga Debata di hita djolma, dipatoeloes Ia do i di hatihana, asal togoe rohanta. Tarida ma i di Si Abraham. Dompak djoegoek ia sanoli di alamannia marajak hos ari ro ma tolloe halak, na so ditanda ia. Djadi dialo-alo ia, dipangido ia, oelang so maradian halahi di bagasnia pinomat santongkin. Djadi doeng olo bajo na tolloe i, disoeroe ia ma Si Sara paoelihon panganon, antjo mangan halahi. Ia halak na tolloe i soeroe-soeroean ni Debata do hape, na mamboeat roepa ni djolma, antjo goemomos roha ni Si Abraham mangkaporsajai na giot dohonon ni halahi. Djadi doeng sidoeng mangan, didokkon soeroe-soeroean i : „o Abraham, roehoet sataon nari adong ma anakmoe sian Si Sara,” ning ia. Dohot do Si Sara oembegesa djadi sim ma rohania harana songon na so toetoe dilala ia. Djadi didokkon soeroe-soeroean i di Si Abraham : „biasa sim roha ni Si Sara ? aha lakna na so tarpatoepa Debata ? Porsaja ma hamoe, sataon nari toeloes pe na hoedokkon i,” ning ia.

Doeng i langka ma halahi manopot hoeta Sodom dohot Gomorra, djadi dohot ma Si Abraham pataroe halahi.

Asa doeng di tongan-dalan halahi, didokkon soeroe-soeroean i ma di Si Abraham : „nada ra Aoe mamoenihon di ho na hami topot toe hoeta Sodom dohot Gomorra, giot oehoemonnami do hoeta na doea i hara ni djahat ni pangisina i,” ning ia. Djadi tarsonggot ma Si Abraham oembegesa, didokkon ia : „rap dohot na gedoek roha boenoeonmoe ma lakna na tigor roha ? Betak adong lima poeloe na tigor roha di si, dohot ma i lakna boenoeonmoe ? Nada he djopan rohamoe marasi ni roha mida hoeta i patoenda ni na lima poeloe na tigor roha i ? Dao ma i sian rohamoe mambaen songon i mamoenoe na tigor roha rap dohot na gedoek roha, nipados ma lakna bagian ni halahi ? Dao ma i sian rohamoe, nada he sibaen oehoem na lidang Pangoehoem satano on ?” ning ia.

Djadi ro soeroe-soeroean i : „moeda dapot aoe di Sodom dohot Gomorra lima poeloe halak na tigor roha, ra do Aoe marasi ni roha mida hoeta i,” ning ia. Doeng i ro Si Abraham : „iale Toehan, hoe-poeragai mangkoelingkon Ko, betak hoerang lima, antjo toek lima poeloe na tigor roha, ra ma Ho manimpaskon hoeta i hara ni na lima i ? ning ia. Ro soeroe-soeroean i : „ibo do rohangkoe soegari,” ning ia. Djadi sian na opat poeloe lima toe opat poeloe, sian i toe toloe poeloe lopies toe sampoele laing dipoepe dipangido Si Abraham oelak ni roha di Debata. Djadi ro soeroe-soeroean i : „sampoeloe pe adong na tigor, nada Hoeoehoem hoeta i”, ning ia. Salangsa i nada adong. Doeng i moelak ma Si Abraham.

Ia soeroe-soeroean i laloe ma toe Sodom dohot Gomorra, djadi doeng laloe, dipakehe halahi ma Si Lot dohot ripena i, oelang dohot tarkona dibaen oehoem i. Djadi laho kehe halahi, dipaingot soeroe-soeroean i dope, oelang manaili toe poedi halahi toe hoeta na nitinggalkon i.

Djadi hoem morot halahi ro ma lalo na gogo sanoli, mangkapoentar ma dolok api na donok toe hoeta i, martimboeali ma sian i timoes dohot barerang, marboerak-boerak ma angka harinte, moeal barerang soede, djadi moelak madaboe ma barerang na milas i songon oedan, gor ma hoeta na doea i, ditoetoepi barerang na milas i ma, djadi mate ma pangisi ni hoeta i, oempe adong na maloea.

Djadi lopies saonari laing dano na bidang ma na saloeat i, ihan nada mangoloe di si, harana dai sira bope oeap barerang sadjo do aekna i. Djadi i ma na nidok ni halak „dano hamatean.”

Ianggo Si Lot dohot ripena i, doeng kehe sian i, nada poelock be manaili toe poedi, halis hoem sorangannia nada taroromsa so mangaligi na masa di hoeta na baroe nitinggalkon i, djadi dapot barerang i ma ibana, bo laloe batoe barerang ma ia dibaensa. Saotik do salana, tai hamatean do na nidokna.

Djadi laloe ma Si Lot rap dohot boroenia na doea i toe hoeta Zoar, liang ma inganan ni halahi.

## PONGGOL 9.

### Taringot toe Si Abraham dehot Si Isak.

Toemboek sataon doeng maradian soeroe-soeroean na toloe i di bagas ni Si Abraham, sorang ma anaknia sian Si Sara, goarna Si Isak ma dibaen. Asa doeng goemodang dakdanak i, mambaen hordja ma Si Abraham mangoepa ibana. Djadi dompak mangan bajo i diintjahi Si Ismail ma Si Isak, bo siar ma Si Sara oembegesa, djadi didokkon ia ma di Si Abraham : „oesir hatobanmi rap dohot anaknia, nada djadi dos ia dohot anakki,” ning ia. Digagai Si Abraham do nian, tapi moeli dioloi ia, torang arina i dipakehe ia ma Si Hagar rap dohot anaknia Si Ismail.

Asa doeng nioesir Si Hagar sian bagas ni morana, giot moelak ma ia toe tano Misir, harana boroe sian i do ia. Laho toe loeatnia i halongonan do boloeson, djadi dompak di halongonan i halahi mangido aek ma Si Ismail, harana ngoeasan ia. Aek na nioban di laboe ma soede, lodja halahi mandjalahi moeal, moeal pe so dapot. Moer manamba ngoeas ni Si Ismail, moer so tolap ia be mardalan, songon na marnjae hantjit dibaensa, pola tarkatos. Djadi dipajakkon Si Hagar ma ibana di toroe ni balangka, doeng i dipadao ia saotik, angke nada tarligi ia anaknia mangkip-angkip. Djadi di hahantjitanna i ro ma soeroe-soeroean sian gindjang, dipatidahon ia ma moeal di Si Hagar, lan sadjo haroea aek sian i. Djadi dilodjong Si Hagar ma toe si, diisi ia ma laboe i, dipainoem ia anaknia. Doeng i tarkalak ma Si Ismail, moelak margogo ma ia, djadi mardalan ma halahi mangoelahi.

Djadi doeng magodang Si Ismail diboeat inangnia ma boroe di

sia boroe Misir. Halongonan i ma inganannia, harana parboeroe godarg do ia.

Ianggo Si Isak simboer do magodang. Djadi doeng godang ia, togap marmahan ma, ro ma pangoedjian na paet toe Si Abraham, angke didokkon Debata di sia : „o Abraham, kehe ma ho toe tano Moria, boan anakmoe Si Isak, hasian ni rohamoe, haoelkon ibana di si,” ning ia. Hantjit dilala Si Abraham, doeng didokkon Debata songon i, nisoeroe ia antong manjamboli anaknia, sadia djorboet i! Piga noli madoeng markaoel ia di Toehan, midoek do parkaoelan na nipadjongdjongnia, manamboes do biri-biri sihaoelkononkon na doeng disambol ia, tapi sanoli on loemobi hantjitna dilala ia. Hoem saotik dipingkiri ia, hoemitir ma ate-atenia, sadari saborngin i nada mangan ia, djadi marajak andos torang, boeha-boeha idjoek dope, poetoos ma rohania mambaen na nidok ni Debata

„Hoegolom ma Toehankoe barang na songon dia pe,” ning ia. Djadi markobas ma ia, dipake ia ma halodenia, ditaha ia ma soban na giot boanon i, doeng i dingoti ia ma halahi, naposonia doea ha'ak dohot anaknia. Djadi doeng hobas soede, langka ma halahi, nada adong na poeloek manjapai bagiaha, harana hohom sadjo do Si Abraham.

Patoloearihon doeng kehe, bolkas ma halahi toe dolok Moria, djadi didokkon Si Abraham di naposo na doea i : „tinggal ma hamoe di son, di bona ni dolok on, rap dohot halode i,” ning ia, doeng i dipaporsankon ia ma soban i di Si Isak, api dohot goloek ia ma marobansa. Homang do roha ni Si Isak mida soede, djadi disapai ia : „o amang! api dohot soban madoeng singkop, tapi aha do sambolan ?” ning ia. Ro Si Abraham : „disarihon Debata do i, amang !” ning ia.

Djadi doeng bolkas ha'ahi toe oedjoeng ni dolok i, dipaoeli Si Abraham ma parkaoelan ; sidoeng i diboeat ia ma soban i, dipajakkon ia di parkaoelan i. Doeng i diboeat ia ma anaknia, diihoti ia, dipajakkon ia di gindjang ni soban i. Doeng i diboeat ia goloeknia, giot dioloskon ia ma toe tolonan ni anaknia, bo nada podo dais goloek i, tarbege ma sora na pio-pio : „djo Abraham! djo Abraham !” ninna. Ro Si Abraham : „di son do aoe,” ning ia. Doeng i ninna ma mangoe-lahi : „oelang hahoea dakdanak i, saonari ma tangkas di aoe, na mabiar do ho mida Debata, salang anakmoe na sasada i nada diolani ho.”

Aha dope, hapogan ma antong Si Abraham mangarkari anaknia, dihaol ia, manetehi ma iloenia sian djop ni roha. Djadi di na manga-



ligi ia, sanga sian do ro sora i, diida ia ma hambeng na sangkot tandoekna di andor-andor. Djadi ditangkoep ia hambeng i baen ali ni anaknia haoelkononnia djadi dipanggoarkon Si Abraham inganan i : „disarihon Debata do i.”

Doeng i saelak nari dope tarbege sora i mandok : „o Abraham, dibaen dioloi ho Aoe, pola dilehe nko anak haholongan ni rohamoe, Aoe ma mangalehen di ho pasoe-pasoe na godang. Songon bahat ni bintang di langit dohot pasir di topi laoet, songon i moese ma bahat ni pomparanmoe. Djadi markite-hite pomparanmi dapotan pasoe-pasoe soede djolma manoesia,” ning ia.

Asa songon i ma pamalos ni Debata di boerdjoe ni roha dohot di godang ni haporsajaän, targoar ma Si Abraham : ama ni angka na porsaja, astoeanna : nada adong na mangalompoi haporsajaännia.

## PONGGOL 10.

### Taringot toe Si Isak.

Asa doeng toek oemoer ni Si Isak toloe poeloe taon, mate ma inangnia. Marsak sadjo roha ni Si Abraham, pala na oemboting dilala ia, na so mamboeat boroe dope Si Isak. Bahat do nian boroe di loeat inganannia, tapi nada adong na tama. Djadi adong dope bona ni ari ni halahi di tano na dao, tano Mesopotamia, disoeroe Si Abraham ma naposonia Si Eliëser toe si mangaligi. Na doeng tobang do Si Eliëser on boti na boerdjoe rohana, apala ia ma haposan ni Si Abraham.

Djadi didokkon Si Abraham di sia : „o Eliëser ! ma matobang aoe, sadia lolot nari, antjo malos boeloeng na hoegolom-golom on, langka ma ho toe loeat Mesopotamia manopot moranta na di sini manga-loeloei boroe di anakta Si Isak,” ning ia.

Doeng i laho ma Si Eliëser, diboan ia sampoele oento lomboeton, sere dohot abit, angka na tama boanon, moeda giot mangkobar boroe halak. Godang do nian roha ni Si Eliëser dibaen na nipasahat di sia hata boroe, tapi laing adong haskasna saotik. „Moeda marsoehat di aoe soede, betak adong antong solsolan di poedi,” ning rohania, hara ni i mangido tolong ia di Debata, antjo Debata ma nian patoe-doehon boroe na tama boeaton.

Asa doeng bolkas ia toe hoeta ni mora ni Si Abraham, maradian ma ia di parikna i di lamboeng pantjoer na di sini. Djadi martangiang ma ia toe Debata : „o Toehan Debatangkoe, diboto Ho do na hoetopot toe son, moeda ro boroe ni halak koeta on moehat, moeda hoepangido di boroe na ro i aek inoemon saotik, djadi ringgas ia manolong aoe, ringgas moese mangalehen aek di oento, na hoeoban on, antjo sian i ma nian hoeboto boroe na tama di anak ni morangkoe Si Abraham,” ning ia. Hoem sidoeng didokkon ia hata tangiang nangkinan i, bo ro ma da boedjing-boedjing moehat. Djadi dipangkoelingkon Si Eliëser ibana, ning ia ma : „atehe ompoeng, sajang djolo rohamoe di na tobang on, lehen djolo aek inoemonkoe saotik,” ning ia. Ro boedjing-boedjing i : „olo da ompoeng!” ning ia, djadi dilehen ia. Doeng i didokkon boedjing-boedjing i : „ma dao aropkoe na niboloesmoenoe, atehe? tama de he hoepainoem oentomoenoe on, antjo hoetarochon aek toe palangka an?” ning ia. Ro Si Eliëser : „tama moeda ibo rohamoe,” ning ia. Djadi dibaen ia aek toe palangka i, antjo minoem oento i.

Anggo Si Eliëser ma longang sadjo paida-ida ringgas ni boroe i. „Na bia do loeai, na doeng marpasoe-pasoe langkangkoe dibaen Debata?” ning rohania. Djadi doeng sidoeng boroe i manaroe aek, diboeat Si Eliëser ma pamonting dohot golang sere, dilehen ia di sia : „Na bo inang, hara ni djop ni rohangki paida-ida ringgasmi, on ma djolo siloeangkoe di ho,” ning ia. Alang djolo roha ni boroe i mandjagitsa, tapi laing didjagit ia. Doeng i didokkon Si Eliëser : „paboa djolo di aoe, boroe ni ise do ho?” ning ia. Ro boroe i : „boroe ni Si Betoeël do aoe,” ning ia. Doeng i ro Si Eliëser : „ise goarmoe?” ning ia. Ro boroe i : „Si Rebekka dibaen halahi goarkoe,” ning ia. Doeng i didokkon Si Eliëser : „loengga de he bagas ni amanta ho? diloas do marborngin aoe di si?” ning ia. Ro boroe i : „diloas,” ning ia.

Djadi daboe ma roha ni Si Eliëser, dipoedji ia ma Debata, na paboeloes langkana.

Djadi dilodjong Si Rebekka ma toe bagas, dipaboa ia soede di inangnia. „O inang, adong bajo boto ho di pantjoer an, nada hoeboto sanga halak dia, mangido aek ia, hoelehen; disapai ia boroe ni ise aoe, hoepaboa. Doeng i mangalehen siloea ma ia di aoe pamonting dohot golang sere, indon ma bo!” ning ia. Djadi adong ma ibotonia Si Laban, dibege ia barita ni Si Rebekka, diida ia moese siloea i,



bo impol ma matania. „Roepana halak na mora do bajo on,” ning rohania, dilodjong ia ma toe pantjoer an mangaligi, sanga di si dope bajo i, dapot ia dope antong. Djadi didokkon Si Laban : „biasa laing di son hamoe, beta toe bagas, antjo mangan kamoe djolo,” ning ia. Ro Si Eliëser : „djadi”, ning ia. Djadi disoeroe Si Laban mardahan, anggo ia kehe ma paoeli oento ni Si Eliëser.

Asa doeng masak, diabing halahi ma panganon i, antjo mangan Si Eliëser. Djadi didokkon ia : „godang rohangkoe marnida on soede, mangan pe da aoe, tai angkon djolo lapang rohangkoe, antjo tarbaen aoe sonang mangan. Pangidoankoe nian mangkobar ma hita djolo,” ning ia. Djadi ro simatobang ni Si Rebekka : „songon i pe pade,” ning halahi. Djadi didokkon Si Eliëser : „antong, on ma da dalanna dibaen na ro aoe toe son, na nisoeroe ni morangkoe Si Abraham do aoe manjapai boroe di anaknia Si Isak. Djadi dibaen so tangkas hoeboto, sanga ise na toemboek sapaänkoe di anak ni morangkoe, mangido tanda aoe di Debata. Djadi ibo rohana nian, dapot aoe do tanda i, toemboek ro Si Rebekka, boroemoenoe hape. I pe, na manjapai ma aoe saonari di hamoe, sanga holong rohamoenoe di morangkoe mangalehen Si Rebekka on, oelang sai markamarsahan halahi,” ning ia. Djadi ro aloes ni halahi : „taringot toe na nidokkonmoenoe i, na ro sian Debata do i antong, bia ma panoelaknami be di hatamoenoe ! Toemboek do rohanami, boan hamoe ma Si Rebekka,” ning halahi. Djadi ro Si Eliëser : „toeani ma i dioloi hamoe pangidoan ni morangkoe,” ning ia. Djadi mangalehen siloea ma ia di halahi soede, doeng i asa mangan ia.

Asa doeng torang ari, markobas ma Si Eliëser, angke giot sigop ia. Djadi didokkon simatobang ni Si Rebekka : „atena di son dope Si Rebekka bagi tar sampoele borngin nari,” ning halahi. Ro Si Eliëser : „oelang ma nian, gonan kehe hami saonari, harana madoeng dipaboeloes Debata pardalananki” ning ia. Doeng i didok halahi : „antong, moeda songon i, tasapai djolo Si Rebekka, sanga bia roha nia, ning halahi. Djadi disapai halahi, olo do ia manigor dohot. Doeng i dipatoere halahi ma barang sibaoannia bope pandongani radingnia i.

Djadi laho kehe boroe i didok halahi ma hata pasoe-pasoe, antjo sonang rohania moeda doeng bolkas.

Ia Si Abraham pe roemia ma rohania doeng ro halak paroemaennia. Honok dope ia mangoloe, djabat diida ia pahompoenia Si

Esaoe dohot Si Jakob. Djadi saratoes pitoe poeloe lima taon ma oemoernia di na mate ia.

## PONGGOL 11.

### Taringot toe Si Esaoe dohot Si Jakob.

Doea do anak ni Si Isak dohot Si Rebekka, na sada Si Esaoe goarna, na sada nari Si Jakob ; silindoeat do nian, tapi tompana dohot rohana paäsing-asing sitoetoe. Si Esaoe na tar bolon-bolon do halakna, soede pamatangnia marimboeloe ; dao toemeger anggo Si Jakob, na limoesan hoeling-koelingnia.

Djadi doeng magodang halahi, parboeroe ma Si Esaoe ; Si Jakob tinggal di bagas pareso-reso koboen sanga marmahan, i do djop ni rohana. Hara ni i hoemolong do roha ni Si Rebekka di Si Jakob, tapi Si Esaoe haholongan ni roha ni amangna do, angke na djopañ roha ni i mangan na nioban ni Si Esaoe moeli sian parboeroean.

Djadi saolak moeli Si Esaoe sian na marboeroe, lodjana so doeng, dapotan pe soada bope horsang dilala ia dibaen las ni ari, male moese. Djadi manaek ma ia toe bagas, bo diida ia ma angginia mangalompma di dapoer djadi didokkon ia ma di sia: „na maroentoeng dope aoe hape, anggi, mangalompma ho hoedapot, tagaskoe boese do. Sajang ma djolo rohamoe, di aoe ma na nilompamon, angke male sadjo do aoe,” ning ia. Ro angginia : „djadi, tai angkon aoe do siangkaän toe djoloan on, moeda nada songon i nada hoelehen,” ning ia. Ro Si Esaoe : „di ho toe si, saratna mangan aoe,” ning ia. Ro Si Jakob : „soempahon bo!” ning ia. Ro Si Esaoe : „marimbar i, nisoempahon pe djadi,” ning ia, djadi doeng disoempahon ia, dilehen Si Jakob ma panganon i.

Nada pade antong na binaen ni Si Jakob, mangadang di na gonting do ia, tapi Si Esaoe pe sala do, harana lajas rohania di sangap dohot tohapnia. Na doeng diloembahon Debata hian do i di Si Rebekka, taran so sorang dope dakdanak i. „Oloan ni siangkaän do sianggian i,” ninna. Atik pe adong hata na songon i, nada patoet marbisoeak ia, antjo doempang na niloembahon ni Debata. Si Isak pe, harana ma holong toe rohania di Si Esaoe, nada haroe diingot ia hata loemba-loemba i.

. Asa doeng matobang Si Isak, disoeroe alap ia Si Esaoe, djadi didokkon ia di sia : „dibaen na hoesoeroe alap ko, amang, ma matobang aoe, sadia lolot nari antjo malos boeloeng na di tanganki, gonan hoelehen di ho pasoe-pasoengkoe sadari on, antjo sonang rohangkoe, ampot mate aoe. On pe amang, marboeroe ma ho djolo, mardohar ma ho, antjo adong panganonkoe anon songon na somal dipaoeli ho, doeng hoepangan hoepasoe-pasoe ho,” ning ia. Doeng i laho ma Si Esaoe marboeroe.

Djadi dompak mangkobari halahi, manangi-nangi ma Si Rebekka, tarsonggot ma ia oembege parkobaran i, angke didok rohania nada patoet so di Si Jakob pasoe-pasoe i. Djadi didokkon ia di Si Jakob: „hoebege nangkin didok amangmoe lehenonnia ma sadari on pasoe-pasoe di angkangmoe, tadjoloi ibana, angke toe ho do patoet kehenan. I pe, tangkoop ma hambeng, sambol ma, antjo taompot tapaoeli panganon di amangmoe, djadi ho ma mangalehensa di sia, dapot ko ma pasoe-pasoe i”, ning ia. Ro Si Jakob : „inda na tarboto ma i di amang, angke haroe rambon pe parnidaännia betak didjama ia aoe. Na marimboeloe do pamatang ni Si Esaoe, pamatangkoe limoes, djadi na paoto-otohon ma aoe, singkat ni na dapotan pasoe-pasoe hona boerania ma aoe,” ning ia. Ro inangnia : „aha he sak ni rohamoe di si, sandok boera aoe ma hahonaänna. I pe, baen sadjo ma na hoedokkon i,” ning ia. Djadi dibaen Si Jakob ma i. Doeng i dipaoeli Si Rebekka ma bobak ni hambeng i, diholtingkon ia toe tangan dohot tolonan ni Si Jakob, antjo songon na marimboeloe moeda nidjama. Doeng i disoeroe ia Si Jakob manaroehon panganon i toe amana.

Asa doeng di lamboeng ni podoman ni amangnia Si Jakob, ning ia ma : „o amang!” ning ia. Ro amangnia : „bo, ise do ho, amang?” ning ia. Ro Si Jakob : „Si Esaoe do aoe, anakmoe siangkaän i; noem-ma hoebaen na nidokmi nangkin, amang, pangan ma i saonari; doeng boetong ko, pasoe-pasoe ma aoe”, ning ia. Ro Si Isak: „na tiboe ma dapot ko i, amang!” ning ia. Ro Si Jakob : „i ma da doharki, amang! dibaen Debata sanoli on,” ning ia. Ro Si Isak : „padonok djolo toe son, antjo hoedjama ho, sanga toetoe anakmoe Si Esaoe ho,” ning ia. Djadi doeng didjama ia, didokkon ia, : „sora i sora ni Si Jakob, tai tangan i tangan ni Si Esaoe do; toetoe Si Esaoe ho?” ning ia. Ro Si Jakob: „toetoe,” ning ia. Doeng i didokkon Si Isak: „antong, baen ma panganon i di djolengkoe, antjo hoepangan. Doeng hoepa-

ngan hoepasoe-pasoe ma ho," ning ia. Djadi dibaen Si Jakob ma songon i ; asa doeng boetong Si Isak, dipasoe pasoe ia ma Si Jakob.

Asa adong ma sangombas doeng i, moeli ma Si Esaoe sian na marboeroe i, has ma rohania paoeli panganon i di amangnia. Doeng si-doeng i diboan ia i toe djolo ni amang nia, didokkon ia ma: „o amang! ma di son da na nipangido ni rohamoe, pangan ma i djolo, antjo dipasoe-pasoe ho aoe," ning ia. Ro amangnia : „ise do ho lakna ?" ning ia. Ro Si Esaoe: „Si Esaoe anakmoe siangkaänta i," ning ia. Bo, tarsonggot ma Si Isak oembegesa, djadi didokkon ia: „ise do anggo songon i na maroban panganon nangkin? Angke doeng hoepangan i, hoepasoe-pasoe do na maroban i. Bia ma pangoelak ni i ?" ning ia. Bo, manompoeck andora ma Si Esaoe, toematangis ma ia gogo, robak ma iloenia,ni ng ia ma : „o amang, amang ! dohot aoe pasoe-pasoe amang !" ning ia. Ro amangnia : „marbisoeck do anggimi hape mandjoloi ho mamboeat pasoe-pasoe i," ning ia. Ro Si Esaoe: „hona ma antong goarnia Si Jakob (astoeanna sitiop tambihoel sanga sibisoeck) padoeanoli on ma dibisoehi ia aoe. O amang, hoem pasoe-pasoe na sada i lakna dipadjop ko ? Dohot aoe, amang, angkon dohot da aoe maroeli, amang !" ning ia. Ro Si Isak : „adong dope nian, amang, tai na doemenggan i ma hoelehen i di anggimoe," ning ia. Djadi si-an ibo ni rohana dipasoe-pasoe ia dope Si Esaoe, haroe pe so sadia toea ni i.

## PONGGOL 12.

### Taringot toe Si Esaoe dohot Si Jakob (oedoetna).

Lajak ma hosom roha ni Si Esaoe di angginia. „Hoem mate pe amang, angkon hoeboenoe ibana," ning rohania. Djadi doeng tarboto di Si Rebekka na di roha ni Si Esaoe i, dipaboa ia i di Si Jakob, didokkon ia : tagonan da, amang, morot ko djolo sian on, painte so momboen roha ni angkangmoe, harana boenoeon, nia ma ho. Di toelangman ma ho djolo, moeda doeng borgo roha ni Si Esaoe hoe-soeroe alap pe ho," ning ia.

Asa doeng didok Si Rebekka songor i, markobas ma Si Jakob ; doeng markobas, didjalang ia ma simatobangnia antjo kehe. Djadi ro amangnia : „songon on ma da amang, laho ma ho djolo, torkis ma



ho. Taringot toe pasoe-pasoe na hoelehen di ho, totop noma i di ho, didongani Debata ma ho. 'Doeng i on ma sipaingotkoe di ho, moeda mamboeat boroe ho, oelang boeat boroe ni halak, angkon boroe ni toelangmoe hoemani do," ning ia. Ro Si Jakob : „olo amang," ning ia. Doeng i laho ma ia.

Na daoan do anggo hoeta Haran, hoeta ni toelangnia i, sagogo ni halak mardalan adong ma sapardoeaärian. Djadi dipoepe Si Jakob na mardalan i lopes samon ; dibaen na so dapot ia parbornginan, marborngin ma ia di padang i, tano i ma podomannia, bantalan batoe, tai laing sinok ia. Djadi ro ma nipinia, diida ia ma tangga na hintjat sanoli, bonana di tano on, oedjoengna soengkot di langit. Djadi manaek midjoer ma sian tangga i soeroe-soeroean ni Debata. Dompok songon i, dibege ia ma sora ni Debata na mandok di sia : „o Jakob, oelang ko mabiar, saonari toetoe markantjit ko, tai soede tano on angkon ho do nampoenasa moese ; donganankoe do ho, paoelahonkoe pe ho toe tano hagodanganmi!" Djadi tarsoenggoel ma Si Jakob, didokkon ia : „habiaran do hape inganan on, Debata do hape di son," ning ia. Djadi dibaen ia ma goar ni inganan i „Bethel." Asa doeng torang ari, mardalan ma Si Jakob, djadi marajak golap pe asa bolkas ia toe Haran, hoeta ni Si Laban toelangnia i.

Djop do roha ni Si Laban, na ro baberenia i, didokkon ia di sia : „denggan ma i di son ko djolo, bere ! songon anakko hoeëtong ho," ning ia.

Djadi adong ma saboelan, mangkobari ma halahi. dipangido Si Laban oelang so hot di si baberenia, harana na malolan do ia paeli pahan-pahanan, boti pe na oegoel do ia markaredjo. Si Jakob pe madaboe pade ma dilala ia na tinggal di si, harana laing so ro dope tona ni inangnia mandokkon moelak.

Djadi didokkon Si Laban : „o Jakob, laloe tinggal di son noma ho, hoebaen pe oepamoe sanga sadia na tama," ning ia. Ro Si Jakob : „djadi, tai indangkon maroepe aoe, hoepambaenkon pe ho, asal dilehen ko boroemoe Si Rahel di aoe," ning ia. Djadi mardomoe ma hata ni halahi, pitoe taon ma djandjina maninian Si Jakob hara ni Si Rahel.

Asa doeng salpoe na pitoe taon i, dipangido Si Jakob ma Si Rahel, tapi dilehen Si Laban Si Lea, boroenia siangkaän, harana ning ia, nada adat djoemolo nipabagas sianggian sian siangkaän, tapi moeda mangoelahi pitoe taon dipambaenkon Si Jakob ia, ra ia mangalehen

moese Si Rahel. Tolpoek do nian roha ni Si Jakob, tai bia ma dibaen ia, ditolopkon ia noma hata ni toelangnia i.

Doeng salpoe hatiha na maninian i, adong dope onom taon nari tinggal Si Jakob di bagas ni toelangnia. Djadi dipasoe-pasoe Debata ibana, moer manamba ma sinadongannia. Dompak di si ia, topak ma sabolas anaknia, i ma Si Roeben, Si Simeon, Si Lepi, Si Joeda Si Dan, Si Naptali, Si Gad, Si Aser, Si Isasar, Si Seboelon dohot Si Josep; doeng i boroenia sada, Si Dina goarna. Pahan-pahanannia pe bahat do, dohonon dos ne ma hamoraännia dohot hamoraän ni toelangnia, pola maranjok ni roha toelang dohot toengganenia midasa. Hara ni i mandjagahon oelang moer toe djatna, toeboe ma di roha ni Si Jakob moelak toe hoetania. Sada moese, doeng na morot sian i, nada oendjoeng be marsoeo ia dohot simatobangnia.

Djadi saelak borngin dipalagoet ia ma dakdanaknia dohot so-rangannia dohot barangnia, djadi gilo ma halahi. Doeng pe torang ari asa habotoan di Si Laban, manigor diajak-ajak ia halahi. Doeng dapot, didokkon ia ma di Si Jakob: „biasi songon i parangemoenoe, sip-sip hamoe kehe, oempe marpaboa, nada tola be hoedjalang bo-roengkoe dohot pahompoengkoe laloe hoetoeloetkon hamoe. I pe, doeng na dipangido rohamoe moelak, nada hoeantak, oelang djat pe hita. Torkis-torkis ma hamoe di adoe i, hami pe nian songon i moese,” ning ia. Doeng i marsidjalanan ma halahi asa kehe be.

Di tongan-dalan padoempang moese dope Si Jakob dohot angkangnia Si Esaoe, djadi mardenggan ma halahi. Doeng i laloe ma Si Jakob dohot dongannia saripe dohot dakdanaknia dohot barangnia toe hoeta ni amangnia, dapot ia dope mangoloe simatobangnia i. Dangol do ia na kehe i, gabe do ia moelak, harohaonna dohot parangena pe ma dao moeba.

Nada sadia lolot doeng moelak ia, mate ma amangnia. Djadi ditanom Si Esaoe dohot Si Jakob ma ibana, sangap ditanom halahi, dibaen do adatna soede.

---

### PONGGOL 13.

#### Taringot toe Si Josep.

Sian soede anak ni Si Jakob apala Si Josep ma haholongan ni rohana na goemodang, dipasoeroeng ia ibana tongtong ro di para-



bitonna. Hara ni i nada mardomoe Si Josep dohot angkangnia, didok halahi pidong djabia-djabia mangalap manaroehon do ia, angke moeda adong na so toere dibaen halahi, djahoet dipaboa ia i di amangnia. Djadi gigi ma roha ni halahi mida Si Josep, nada ra halahi be mangkoelingkon ibana, mari-ari ma doeng dipaboa ia saolak nipinia. Diipi ia mangolting sagean ia di saba rap dohot kahangginia, djadi dipadjongdjong ia ma sagean na niholtingnia i, bo marroan ma sagean na niholting ni kahangginia i marsomba toe sageannia. Djadi doeng dipadjodjor Si Josep nipinia i, ro ma hata ni halahi djoedjar-djoedjar, mandok : „na godangan do ate-atemoe, ho lakna radjanami ?” ning halahi.

Doeng i marnipi ma ia saolak nari, diida ia ro mata ni ari, boelan dohot sabolas bintang manjomba ibana. Doeng dipadjodjor ia i, soen ma gojak ni roha ni kahangginia, pola dohot amangnia mamintjang ibana, ning ia : „ma poran toe do i amang, aropmoe lakna dohot aoe dohot inangmoe ro manjomba ho ?” Toetoe do nian anggo nipi djotdjotán paoto-otohon na modom do, tapi idaonta do i moese nipi na doea on na ro sian Debata do. Djadi intap ni i martoeptoeptoe ma kahangginia i mambaloskon toe sia gindjang ni rohania i.

Asa adong ma sadia lolot doeng i, kehe ma kahanggi ni Si Josep marmahan pahan-pahanan toe djalangan na dao, marborngin-borngin pola. Djadi dibaen honok nada oendjoeng moeli halahi, ro ma dok ni Si Jakob toe Si Josep : „kehe ho djolo, amang, mangaligi angkamoe sanga bia do halahi, honok ma nada ro hobarna, tai tiboe ho moelak, da !” ning ia. Ro Si Josep : „olo amang !” ning ia. Djadi laho ma Si Josep mandjalahi kahangginia i, dapot ia donokkon hoeta Dotan. Djadi doeng ditatap halahi na ro Si Josep, didok halahi ma : „adoe ma siparnipi i, bia tapalaloe saonari tahinta naingkan i, mare taboenoe ibana, taämbaengkon bangkena toe piloebang, tadok di amanta binatang manjoro ia. Taboto ma sanga mangoloe nipinia sanga nada,” ning halahi. Ro Si Roeben : „oelang taboenoe, ale ! nada tola saboe moedarnia, tai moeda didaboehon hamoe ibana toe piloebang i, nada mahoea anggo i,” ning ia. Si-angkaän do anggo Si Roeben, giot pangoloeonna angginia, didok rohania : moeda doeng didaboe halahi Si Josep toe piloebang i, elaonkoe do ibana sian i, antjo moelak ia.

Djadi hoem mardomoe tahi songon i, laloe ma Si Josep ; nada

djabat dope mangkoeling ia, ma ditangkoop halahi ibana, diboeka halahi badjoenia, disarat halahi ma ibana toe piloebang na di sini, laloe didaboe halahi ibana toe si. Anggoek ni Si Josep nada na boti-boti, tapi inda ro di si halahi. Doeng i kehe ma halahi mangan. Djadi tongkon dompak na mangan i, mamoloes ma saeodagar, na maroban djagalan toe tano Misir. Djadi ro Si Joeda : „aha ma labona moeda mate angginta, nada he gonan tagadis ia toe saeodagar, na mamoloes an ?” ning ia. Djadi maradoe olo ma halahi laloe digadis ma Si Josep. Anggo Si Roebe, dibaen so di si ia, nada adong pamotoannia, na doeng targadis Si Josep, djadi ro ia toe piloebang i paloeahon angginia i, hape nada di si be. Djadi ditompoe ia ma andorania. disoeak-soeak ia ma abitnia, dilodjong ia ma toe kahangginia, ning ia ma : „nada di si be Si Josep, bia noma hoebaen, aoe do siangkaän, tardok so aoe diboera amanta”, ning ia. Ro kahangginia : „oelang marsak ko anggo hara ni i do, tasambol hambeng, tarondjomkon badjoenia toe moedar ni hambeng i, tadok di amanta babiat manjoro ia, aha dope!” ning halahi. Djadi dibaen halahi ma songon i, disoeroetaroeon halahi ma badjoe na sap moedar i.

Asa doeng laloe halak soeroean i, dipatodahon ia ma badjoe i di Si Jakob, djadi didokkon ia : „atehe, badjoe ni ise do on? dapot kami do i di padang i, nada he badjoe ni anakmoe ?” ning ia. Ro Si Jakob, dipatangkas ia, didjanka ia, manigor bo giot tarkatos ma, manggoek-anggoek ma ia gogo, ning ia ma : „iale, badjoe ni Si Josep do on toetoe, disoro babiat ibana ! iale Josep, amang na poso boeloeng, andap oelang hoesoeroe ho nian ! O amang, lolos ni rohangki da, amang, marsoeroe ho !” ning ia. Djadi diandoengi ia ma anaknia, margoendongpong ma rohania, ro pe halak mandok hata, na so haäpoan do. Doeng honok-honok pe asa soemabo rohania.

---

#### PONGGOL 14.

### Si Josep di tano Misir.

Anggo Si Josep laloe ma dioban saeodagar i ibana toe tano Misir. Dompah i mardjagal hatoban dope halak, songon dia ma barang djagalan di poken, songon i ma somal mardjagal djolma. Si Josep pe dioban ma toe poken, ampot adong na giot manoboesi ibana, djadi

hara ni posona dohot tompana tiboe do ia lakoe di halak na mora Si Potipar.

Asa doeng di si Si Josep, diida Si Potipar ma toere ni parangena dohot ringgasna markaredjo, holong ma rohania di sia. Apala na goemodang lomo rohana di Si Josep, sorangan ni Si Potipar do i. Dompak mardalanan saolak Si Potipar, dinoengnoeng dadaboroe i ma Si Josep mambaen na so oehoem. Djadi ro ma dok ni Si Josep : „nada tarbaen aoe songon i, nada poeloek aoe mambaen na djat harana mardosa ma aoe adop Debata”, ning ia. Ila dirasa dadaboroe i, doeng ro aloes ni Si Josep songon i, sego ma rohania, djadi dipabalik ia noma, Si Josep didokkon ia na giot mambaen na so oehoem toe sia. Djadi doeng moelak Si Potipar sian na mardalanan i, diadoehon ia ma Si Josep. Djadi tarrimas ma roha ni Si Potipar, disoeroe oban ia manigor Si Josep toe hoeroengan.

Dangol ma antong dilala Si Josep, tapi dibaen na marsigantoeng ia toe Debata, dapotan pasoe-pasoe ma ia, angke doeng di hoeroengan i ia, hara ni todas ni parangena ibo ma roha ni sidjaga hoeroengan i di sia, djadi dipabangkit ia ma ibana gabe mondoer ni na tarkoe-roeng i.

Asa nada sadia honok doeng i, tarkoeroeng ma doea halak na marpangkat ; na sada, paelihon inoemon ni radja i ma karedjona na sada nari, paelihon panganonna. Tartoe has do halahi giot mangarasoen radja i, tapi nada torang binoto sanga ise halahi na doea na songon i rohana. Djadi dipasahat sidjaga hoeroengan i ma di Si Josep mamareso dohot mangoloi halahi. Asa doeng djoemotdot marsoeo roemosoe ma halahi, ganop markaredjo Si Josep di bilik ni halahi mangkobar-kobar ma halahi. Djadi saolak ro ma Si Josep manjogot, diida ia nada songon na somal panaili ni halahi. Djadi disapai ia : „nada songon soeat ni ari hoeida panailimoenoe manjogot on, aha do na masa ?” ning ia. Ro halahi : „rap ro nipi di hami na potangin, mangasa roendoetna nada hai boto sanga aha na nidokna. Soera adong ma nian na malo mangastoei nipi,” ning halahi. Ro Si Josep : „anggo na mangastoei nipi, pangalehen ni Toehan do i, tapi bo songon i padjodjor hamoe ma !” ning ia. Djadi dipadjodjor sipaoeli inoemon i ma pardjolo nipinia, ning ia ma : „hoeipi hoeida hajoe anggoer sabatang, dangkana toloe, martoe mboer ma dangka na toloe i laloe marboenga, doeng marboenga marmoetik, doeng marmoetik marbatoe ma. Djadi hoepoetik batoena i, hoeporo,

ækna i hoebaen toe panginoeman ni radja i, doeng i hoesoerdoehon i di radja i. Songon i ma da nipingki," ning ia. Ro Si Josep : „on ma da astoeanna, dangka na toloe i mandok toloe ari ; di bagasan na toloe ari on maloea ma ho sian hoeroengan on, moelak ma pangkat i toe ho. Djadi saboeli-boeli pangidoankoe nian, moeda doeng moelak marpangkat ko, sajang ma djolo rohamoe, ingot aoe, holoskon djolo pardangolanki di radja i, antjo maloea noma aoe sian hoeroengan on. Hara ni tigor ni rohangkoe do dibaen na mago aoe, so adong salangkoe," ning ia. Ro sipaoeli inoemon i : „pos ma rohamoe, anggia ! nada loepa aoe di si, hoepaboa pe di radja i," ning ia.

Doeng dibege sipaoeli panganon i. denggan dipatorang Si Josep nipi ni dongannia i, dipadjodjor ia moese ma nipinia, ning ia : „aoe hoeipi mandjoedjoeng toloe ampang na marisi pangan-panganon do aoe, djadi di na mandjoedjoeng ampang i aoe, bo rongom ma songgop toe si oenggas, na giot mangankon sian na di ampang par-gindjang i. I ma da nipingki, aha do astoeanna diboto ho ?" ning ia. Ro Si Josep : „na samboran do anggo nipimi. Na toloe ampang i mandok toloe ari moese do. Di bagasan na toloe ari on disoeroe radja i manggantoeng ko, rongom ma ro oenggas i mangankon siboeckmi," ning ia. Djadi tarkohom ma bajo i, langan ma ia manigor oembege hata ni Si Josep, songon na so martondi be idaon.

Djadi peto do na nidok ni Si Josep, doeng adong toloe ari moelak didjama sipaoeli inoemon i karedjonja, anggo sipaoeli panganon i toeloes nigantoeng.

---

## PONGGOL 15.

### Maloea Si Josep sian hoeroengan i.

Asa doeng sonang sipaoeli inoemon i, nada diingot ia be pangidoan ni Si Josep. Gari oelang Debata na marningot di sia, mate di hoeroengan i noma ia. Adong ma doea taon dipatama Debata ma dalan, antjo tarsingot roha ni sipaoeli inoemon i.

Saoelak marnipi ma radja ni halak Misir, d'ipi ia djongdjong ia di topi ni batang aek, diida ia ro sian aek i pitoe lomboe na denggan na mokmok. na mandjampal di napa na di topi aek i. Doeng i ro ma sian aek i pitoe lomboe na djat na marniang, na manolon lomboe



na denggan i. Djadi tarsoenggoel ma radja i, homang-komang ma ia. „Bia do loeai nippingkon,” ning rohania, tai dibaen nono matania, tarpodom ma ia mangoelahi. Doeng tarpodom, bo ro ma da nipinia mangoelahi, diida ia ma toeboe eme sabatang pitoe boerirna, godang-godang do boerirna i bope porngis. Doeng i toeboe ma eme sabatang nari pitoe boerirna moese tai na lambang. Djadi dipangan na lambang i ma na porngis i. Doeng i tarsoenggoel ma radja i, ning rohania ma : „na mahoea de he aoe ? padoeanoli on ma ro nippingkoe, paäsing-asing do nian, tai songon na tar dos do na nidokna, hoesapai ma na malo mangastoei ripi, nada sonang rohangkoe moeda so hoeboto i,” ning ia.

Djadi disoeroe alap radja i borngin i dope na mamboto ; doeng ro, dipadjodor ia nipinia i, tapi oempe adong na mangastoei nipi na doea i, doet sadjo roha ni halahi, radja i moeroek-moeroek ma antong. Djadi dompak mangkobari halahi tarsingot ma roha ni sipaoeli inoemon i di Si Josep. Djadi dipoeragai ia mangkoelingkon radja i, ning ia ma : „santabe di radja i sampoele noli, dibaen sompit hoeida roha ni radja i bope roha ni datoe-datoe on soedena, aropkoe hoeboto do na malo manorangkon nipi. Moeda toemboek rohanta i ma djolo nisapaän,” ning ia. Ro radja i : „ise i ? anggo na hoeboto nada adong be na so nisapaän,” ning ia. Ro sipaoeli inoemon i : „tabe di radja i, bajo na hoedokkon i halak na tarkoeroeng do i, Si Josep goarna. Nippingki pe dipatorang ia na djolo dompak tarkoeroeng aoe,” ning ia. Ro radja i : „antong, alap kamoe ibana, antjo binoto sanga na peto hata ni sipaoeli inoemon i,” ning ia. Djadi dialap halahi ma Si Josep.

Asa doeng di adopan ni radja i ia, didokkon radja i ma di sia : „atehe, hoebege didok kalak malo do ho mangastoei nipi, peto de he ?” ning ia. Ro Si Josep : „santabe di radja na sangap i, marsoehat di Toehan Debatå do i nian, tapi betak tarpatorang aoe do nipi i di radja i. Santabe di radja i, dipadjodjor radja i ma djolo nipi i,” ning ia. Djadi dipadjodjor radja i. Doeng sidoeng dipadjodjor radja i, didokkon Si Josep : „na denggan do na nidokkon ni nipi i. Dos do anggo astoeanna. Asi do roha ni Debata mida radja i bope mida na nigomgomanna. Ia na nidok ni nipi i on do : lomboe na pitoe na mokmok i bope boerir ni eme na pitoe na porngis i mandok pitoe taon eme na mardonaon. Lomboe na pitoe na marniang i bope boerir ni eme na pitoe na lambang i mandok pitoe taon eme haleon. Djadi na

pitoe taon on markalobian ma halak di eme, tapi salpoe i pitoe taon honokna nada dapotan eme halak oempe sangkamata. I ma astoeanna, lani ! Sada moese, dibaen na pola doea noli ro nipi i, mandok na marsitoetoe ma roha ni Debata di si. Hara ni i moeda tama dibege radja i hatangki, nipabangkit ma sada, na mandasdas halak soede paloehoet-loehoet eme di bagasan na pitoe taon on dompak markalobian, djadi saparlima ni eme na dapot angkon nipasahat toe radja i, antjo adong toboesan ni halak moeda ro haleon i," ning ia.

Asa doeng dibege radja i hata ni Si Josep, homang sitoetoe ma rohanian, didokkon ia ma : „denggan sadjo do hoebege hatami, ho ma toetoe sada na pistar, na niasian ni Debata do ho, djadi ho ma hoe-pabangkit saonari mandjama karedjo na songon i. I pe, nada djadi so dioloi halak ho, sintap ni on toe djoloan on sahat di ho patoerehon sasoedena i, oelang hoerangan halak di panganon, moeda ro haleon i.

Hormat dohot sangap angkon dilehen halak di ho," ning ia. Djadidi paniho-nihohon radja i ma i di soede hoeta na di haradjaän-nia, oelang adong na so oembotosa.

Asa songon i ma halak na godang na markoeaso Si Josep dibaen dihaposi ia Debata tongtong. Tambana dipatama radja i boroe na mora di sia.

## PONGGOL 16.

### Kahanggi ni Si Josep toe tano Misir.

Asa doeng salpoe taon na pitoe na mardonaon i, ro ma na haleon i. Di moela-moelana nada sadia tarkilala dope di halak, tapi doeng doea toloe taon marpoepoe manaon, mamoeangka markantjit ma halak Misir, ro ma halahi toe adopan ni Si Josep manoboesi eme. Mangasa poranna pola digadiskon halak barangna toe eme.

Nada hoemon di tano Misir masa i, dohot di loeat na dao songon di loeat hagodangan ni Si Josep. Anggo amang dohot kahangginia mangoloe dope. Saidanna i nada parkaleon halahi,pareme na bahat do, tapi dibaen na manangging logo ni ari sai lolot, martahi ma Si Jakob dohot anaknia mamboeat eme di tano Misir. harana ma tarbortik toek dope eme sitoboesan di si. Djadi ro ma dok ni Si Jakob toe anaknia: „kehe ma hamoe majeme toe tano Misir, oelang mate so mangan



hita, tapi oelang boan hamoe Si Benjamin," ning ia. Djadi kehe ma halahi.

Asa doeng laloe toe tano Misir, ditopot halahi ma radja pandoea i, harana barang ise na giot manoboesi eme angkon djolo dapotan isinna. Nada didjanga halahi Si Josep, angke doeng digadis halahi ibana, inda djoengada marsipadaän be, boti madoeng marsangap ia, goarna pe madoeng dipaoeba radja i. Anggo Si Josep, hoem diida ia kahangginia manigor ditanda ia, tapi sip do ia, dipaoela-oela ia songon na so ditanda ia, baliksa disonggak-songgak ia.

„Halak dia do hamoe ?” ning ia. Ro halahi : „sian tano Kanaän do hami, lani, giot manoboesi eme do nian,” ning halahi. Ro Si Josep : „ah! nada toetoe i, pangkahap do hamoe! Na ro do hamoe toe son, hoem antjo diboto hamoe, sanga sian dia na oemmomo tarbaen manjoloek,” ning ia. Ro halahi : „santabe di hita, nada songon i nian lani! manoboesi eme, i do na hami toentoe toe son,” ning halahi. Ro Si Josep : „gaboës do i soede, giot aropanmoenoe do hami,” ning ia. Ro halahi : „celang moeroek radja i di hami, doea bolas do hami saäma, sianggian i rap dohot na tobang i dope; na toemodohon i madoeng djoemolo,” ning halahi. Ro Si Josep : „niligi ma djolo, sanga na tigor hamoe. Anggo nada hoeida anggimoenoe i, nada porsaja aoe di hamoe. Hoehoeroeng ma hamoe soede, hoem sada na tola moelak mangalap ibana,” ning ia. Djadi tarkoeroeng ma halahi.

Asa doeng toloe ari disoeroe alap Si Josep halahi, didokkon ia ma : „songon on noma rohangkoe, moeda toetoe halak na tigor hamoe, sada pe tinggal di hoeroengan i, na asing i tola moelak maroban eme sanga sadia hasaja, tapi moeda saaelak nari toe son hamoe, nada djadi so nioban anggimoenoe i, hoem i do tandana na tigor hamoe,” ning ia.

Djadi didok halahi sama halahi : „mamoengka marbalos ma toe hita na tabaen na djolo di angginta Si Josep, i do dibaen na ro soesa toe hita,” ning halahi. Ro Si Roeben : „nada he hoedok di hamoe, oelang hahoea dakdanak i ningkoe, tapi nada ditangihon hamoe, sannari bo, marloeloe ma moedarnia!” ning ia.

Nada diboto halahi na torang di Si Josep hata ni halahi, harana marpande-pande do ia. Djadi didokkon Si Josep Si Simeon na angkon tinggal di hoeroengan. Doeng i disoeroe isi ia haroeng ni halahi, hepeng garar ni eme i didokkon ia baenon toe haroeng i, tapi oelang

dibotosa. Doeng sidoeng, diangkat halahi ma eme i toe halode i djadi langka ma halahi.

Asa doeng bolkas toe parbornginan, dioengkap sada ma haroengnia giot mamboeat panganon ni halodenia saotik, bo diida ia ma pajak di gindjang ni eme i hepeng i. Djadi didokkon ia di dongannia : „ma sambang kita, ale ! ma moelak di aoe hepengki, di son do bo dapot aoe di haroengki,” ning ia. Djadi bobos dilala halahi, taroe so malo mangkoeling. „Bia do loeai pambaen ni Toehan toe hita,” boti be do pandjarkai ni roha ni halahi.

Asa doeng bolkas toe hoeta, dipadjodjor ha'ahi ma soede di ompoe i, marsak ma rohania oembegesa, mari-ari ma doeng dapot hepeng garar ni eme i di haroengna be. Djadi didokkon Si Jakob : „iale ! dipamboeati hamoe dakdanakkoe soede ! Si Josep ma mate, Si Simeon ma tarkoeroeng di tano ni halak, Si Benjamin boanonmoenoe moese — dapot di ari ma aoe antong !” ning ia. Ro Si Roeben : „aoe do anakmoe siangkaän, anakmoe na doea i tola boenoeonmoe, moeda so hoepaoelak Si Benjamin. Pasahat sadjo ma ibana di aoe,” ning ia. Ro Si Jakob : „nada djadi boanonmoe Si Benjamin ; Si Josep na toemadohon ia, ma mate ; hoem halahi doea na saina. Moeda mate moese Si Benjamin, aoe pe na mate ma,” ning ia.

## PONGGOL 17.

### Si Benjamin dohot toe tano Misir.

Djadi marajak soede eme na nialap i, didokkon Si Jakob di anaknia : „laing manaon do haleon i, oelahi hamoe toe tano Misir maieme,” ning ia. Ro anaknia Si Joeda : „anggo nada diloas ko Si Benjamin dohot, hoin daroeng sadjo ma hami toe si, angke pir didokkon radja i nada djadi so dohot ia, tai moeda dilehen ko asa langka hami,” ning ia. Ro Si Jakob : „hoemon aoe diarsak kamoe, biasi antong diroengkaskon hamoe adong dope anggimoenoe ?” ning ia. Ro Si Joeda : „doeng ke sihir dipareso radja i soede partoetoeronta, nada hai paboa ? So hai boto na giot ro dohononnia angkon nioban Si Benjamin. I pe amang, pasahat ma ia di aoe, aoe mangokoe moeda nada denggan hoepaoelak ibana, maroetang aoe di ho matoea tano on,” ning ia. Ro Si Jakob : „moeda na songon i ma pangalahona, bia

ma binaen! Boan hamoe ma, boan moese ma siloea, na tama lehenon toe radja i, bope hepeng garar ni eme naon i, na tarsoeng moelak toe son. Ibo ma roha ni Debata mangalehen lambok ni roha di radja i, antjo diloas ia hamoe sonang moelak," ning ia.

Asa doeng sidoeng markobas, langka ma halahi. Djadi bolkas ma halahi toe tano Misir, mangadap ma halahi manigor toe Si Josep, djadi didokkon Si Josep di naposonia : „boan ma halahon toe bagus, dokkon na mardahan, angkon rap dohot aoe do halahi mangan anon tonga ari," ning ia. Djadi dioban naposo i ma halahi toe bagus ni Si Josep. Dosar-dosar do taroktok ni halahi, sak moese roha hara ni hepeng i, djadi didok halahi ma di naposo i: „santabe di hita ! dibaen na ro hami toe son naingkan i, toetoe antjo manoboesi eme do. Djadi laho moelak, dampak di parbornginan, hai boeka haroengnai, bo dapot kai di si hepeng garar ni eme i, sapitis nada moerak ! Saonari hai boan i moelak, nada hami boto sanga sian dia ro i toe si," ning halahi. Ro naposo i : „pos ma rohamoenoe da, Debata do aropkoe mambaen i toe si, anggo hepeng toehor ni eme i, ma bolkas toe hami," ning ia. Dibaen na songon i pangaloesinia, na nipodaän ni Si Josep do ia taringot toe si.

Djadi marajak tonga ari moeli ma Si Josep sian kantor, disapai ia ma manigor : „bia do, torkis do ompoe i ?" ning ia. Ro halahi : „torkis do nian, lani, hami tinggalkon," ning halahi. Djadi doeng diida Si Josep Si Benjamin disapai ia : „on do lakna anggimoenoe na menekna i na nidokkonmoenoe na baroe on ?" ning ia. Ro halahi : „i ma ibana, lani," ning halahi-Djadi didokkon Si Josep ma di Si Benjamin : „asi ma roha ni Debata di ho, amang !" ning ia. Hoem didokkon ia songon i, mantak ma ia manigor, harana manombo dilala ia loengoen ni rohania paädop-adop dohot angginia saäma saina, giot manetek ma iloenia, djadi oelang diida halak, kehe ma iat oe bilik, tangis ma ia di si lopoës loemoeboeng dilala ia. Doeng i marsoeap ma ia oelang tanda, djadi ro ma ia mangkobar dohot halahi, dipapir ia ma rohania.

Doeng i disoeroe abing ia panganon i, dipadjoegoek ia ma halahi mangihoetkon tobangna be. Homang do roha ni halahi, mari-ari hara ni na dipasoeroeng ia Si Benjamin, toempoek ni i lima lipat dibaen si Josep sian toempoek ni na asing i.

## PONGGOL 18.

**Dipatandahon Si Josep ibana di kahainggina.**

Asa doeng simpoel mangan markobas ma halahi. Djadi dihoesipkon Si Josep toe naposonia, antjo mangoelahi dibaen ia hepeng i toe haroeng i, tambana moese panginoemanna perak i angkon nipama-soek toe haroeng ni sianggian i. Djadi dibaen naposo i songon i.

Torang arina i langka ma halahi. Nada sadia lolot doeng kehe halahi, didokkon Si Josep ma di naposonia : „kehe niajak halahi, doeng dapot, dok di halahi: biasi dibaloskon hamoe na djat toe na denggan, biasi ditangko hamoe panginoeman ni morangkoe, na somal dipake ia ari-ari, paralamatannia moese do ! Na doeng godang do salamoenoe nimmoë,” ning ia. Ro naposo i : „djadi,” ning ia. Doeng i laho ma naposo i mangajak halahi, doeng dapot, didokkon ia ma : „biasi dibaloskon hamoe na djat toe na denggan ? biasi ditangko hamoe panginoeman ni morangkoena somal dipake ia ari-ari, paralamatannia moese do. Na doeng godang do salamoenoe adop morangkoe !” ning ia. Aha dope, tarsonggot ma halahi oembege hata ni naposo i, djadi didok halahi : „biasi didok ko songon i toe hami ? nada ra hami mambaen i. Di dia ma patoet hami tangko sere sanga perak sanga aha pe sian bagus ni moramoe ! I pe, sanga di haroeng ni ise dapot ko panginoeman i, maroetang kosa ma ia, na asing i hatobanmoenoe ma i soede,” ning halahi. Ro naposo i : „pade, sanga di haroeng ni ise dapot aoe panginoeman i, hatobannami ma i !” ning ia. Djadi diharkari halahi ma haroeng i, doeng i diligi naposo i, bo dapot ia panginoeman i di haroeng ni Si Benjamin. Nada be antong, taroe so toek be roha ni halahi bagi na mahoea ! Marsisoeak abitna be ma dibaen dele ni roha, djadi rap moelak ma halahi toe hoeta i.

Asa doeng di djolo ni Si Josep halahi, ro ma doknia : „na bia de he rohamoenoe adop aoe ? gail dope aropmoenoe hapistaranki ?” ning ia. Ro Si Joeda : „aha dope hami boto dohononnam, hatobanta ma hami soede !” ning ia. Ro Si Josep : „nada songon i, hoem na manangko panginoemanki do hatobankoe, na asing i tola do kehe,” ning ia. Harana didokkon ia songon i mangoedji, sanga toetoe holong roha ni halahi di Si Benjamin. Djadi ro ma aloes ni Si Joeda : „soegari moelak hami nada dohot angginami, na mamoenoe ompoe i sadjo



do i. Aoe do mangokoe ia, antong aoe ma gontinia di son hatoban ni radja i, tapi anggo anggingki oelang so moelak ia. Moeda nada moelak ia, aoe pe nada moelak, angke nada tarligi aoe bohi ni damang," ning ia.

Asa doeng dibege Si Josep hata ni Si Joeda, nada taralo ia be rohania. Djadi doeng dipakehe ia halak Misir i, antjo hoem halahi di si, dipatandahon ia ma ibana, ning ia ma : „aoe do Si Josep, mangoloe dope amanta ?" ning ia, laloe tangis ma ia pangoentjombopon. Djadi nada diboto halahi mandok bagiaha, ma songon na maöto. Ro ma hata ni Si Josep mangoelahi : „aoe do Si Josep anggimoenoe, na nigadismoenoe na djolo, oelang mabiar hamoe, oelang aha rohamoenoe, harana Toehanta do na mambaen i, antjo adong na pangoloehon hamoe sannari. On pe, tiboe ma moelak hamoe, tangkas-tangkas paboa di amanta pangalahongkoe di son, dokkon sigop ia ro, harana maloengoen sitoetoe do aoe, diboto hamoe na so tartinggalkon aoe dope karedjongki," ning ia. Doeng i dihaol bope didjatang ia halahi sada-sada, honok dope mangkobar-kobar halahi martaringot-taringot.

Djadi doeng dibege radja Parao baritana i, dohot ma ia mardjop ni roha, disoeroe ia mandokkon toemboek sitoetoe rohania, moeda boengkas halahi sian tano Kanaän toe tano Misir. Ditongos ia siloea tanda ni godang ni rohana, dohot dope kareta ditongos ia, oelang ma lodja toe Si Jakob laho toe tano Misir.

Asa doeng daboe be roha, moelak ma kahanggi ni Si Josep. Laho kehe dipaingot Si Josep halahi, oelang marbada di tongan-dalan.

Djadi doeng bolkas, marbarita ma halahi di ompoe i. Songon na so toetoe dibege Si Jakob barita i, tapi doeng diida ia siloea dohot kareta na nitongos ni radja i, porsaja ma ia. Ro ma doknia: „anggo na mangoloe dope anakko Si Josep, kehe ma aoe toe si mangaligi ibana taran so mate aoe," ning ia.

---

## PONGGOL 19.

### Si Jakob na boengkas toe tano Misir.

Asa doeng songon i dihobas Si Jakob ma barangnia, angke madoeng mardomoe tahi ni halahi, antjo boengkas toe tano Misir. Bangkol dope

djolo dilala Si Jakob na maninggalkon hoetania i, tapi doeng marborngin halahi di hoeta Berseba, soemada ma rohania dibaen ro amalnia borngin i, didokkon Debata ma di sia : „o Jakob ! oelang aha rohamoe na boengkas toe tano Misir i, bangso na godang do hamoe moese di si baenonkoe. Aoe do donganmoenoe toe si, Aoe maroban hamoe moelak sian i. Sada moese, anakmoe Si Josep pe mangampoe ho laho mate ho,” ning ia. Djadi sada ma roha ni Si Jakob.

Asa nada piga borngin nari laloe ma halahi toe tano Misir, djadi disoeroe Si Jakob ma anaknia Si Joeda djoemolo paboahon di Si Josep, na doeng donok halahi. Djadi manigor kehe ma Si Josep mangalo-alo amangnia. Asa doeng marsoeo, dihaol ia ibana, rap tangis ma halahi sian djop ni roha. Djadi didokkon Si Jakob : „anggo saonari sonang ma rohangkoe mate, harana madoeng marsipaidaän hita, boti na mangoloe do ho hape markatorkisan,” ning ia.

Asa doeng daboe be roha na mangkobar i, martahi ma halahi sanga songon dia na toemama baenon. Ro Si Josep : „aoe ma djolo mandok timbangan, gonan djoemolo aoe paboahon di radja Parao, na doeng ro hamoe, laloe hoepangido, antjo diloas ia hamoe markoeta di loeat Gosen ; na napoe do tano di si, djalangan ni pahan-pahanan pe lomak sadjo. Ampot disapai radja i, sanga aha pantjarianmoenoe, dok kamoe na marmahan,” ning ia.

Djadi doeng dipaboa Si Josep di radja i, na doeng ro amangnia, didokkon radja i : „toeana ma i ro halahi ! toemboek rohangkoe moeda giot halahi markoeta di loeat Gosen,” ning ia. Djadi doeng ro Si Jakob, dioban Si Josep ma ibana toe adopan ni radja i. Djadi doeng didokkon Si Jakob hata sombania, disapai radja i : „sadia ma oemoermoenoe ?” ning ia. Ro Si Jakob : „anggo oemoerkoe ma toek saratoes toloe poeloe taon, tai toetoe bahat doempang di aoe hamarsahan,” ning ia. Doeng i marsantabe ma ia laloe mandok hata pasoe-pasoe, djadi moelak ma ia.

Djadi markoeta ma halahi di loeat Gosen. Sagogonia dibaen Si Josep pasonang halahi. Anggo Si Jakob pitoe bolas taon nari dope ia mangoloe, djadi soede oemoernia toemboek saratoes opat poeloe pitoe taon. Hara ni roemoek ni pamatangnia moer djotdjot ma ia marnjae-njae, pola saeolak ditonahon ia Si Josep. Doeng ro ia, didokkon Si Jakob ma di sia : „ampot na mate aoe, amang, ibo rohamoe di aoe, oelang tanom aoe di tano Misir on, angkon rap dohot da-



ompoeng aoe modom. Doeng mate, boan aoe toe tano parkoeboeranta, liang na di haoema ni Si Epron i, haoema Makpela goarna, donok toe Mamre di tano Kanaän. Djadi antjo diboto ho, haoema i ditoboesi daompoeng Si Abraham sian Si Epron baen tano parkoeboerannia bope parkoeboeran ni soede sidonoknia. Di si tanom aoe, da amang !” ning ia. Ro Si Josep : „olo amang !” ning ia. Doeng oemaha saotik dilala Si Jakob, moelak ma Si Josep toe karedjonja.

Nada sadia lolot doeng i, mangoelahi ma ditonahon Si Jakob Si Josep, harana moer manamba njaenia dilala ia. Djadi kehe ma Si Josep toe si mangaligi, diboan ia anaknia na doea i, Si Manasse dohot Si Epraim. Djadi doeng dipaboa halak di Si Jakob, na doeng ro Si Josep rap dohot pahompoenia, dipatogar ia ma, djoegoek ma ia di podomanna marsisande. Djadi didokkon ia di Si Josep : „anggo anakmoe na doea on, na topak taran so toe son aoe, bagian anak do lehenonkoe di halahi,” ning ia, laloe dipasoe-pasoe ia dakdanak i. Doeng i didokkon ia di anaknia, na marlagoet di lamboengnia : „anggo aoe, na kehe ma aoe saonari, tapi Debata do dongan, moenoe, boannonnia do moese hamoe moelak toe tano ni ompoenta,” ning ia. Doeng i djodjor dipasoe-pasoe ia anaknia. Dipasoeroeng ia Si Joeda di pasoe-pasoe i, didokkon ia pomparan ni i radja godang boese. Pakjak toe halahi do haradjaän i marsoendoet-soendoet, lopees ro Radja na soemangap i, oloan ni sandok djolma manoesia, i ma Toehanta Jesoes. Doeng i tos ma hosa ni Si Jakob, djadi moelak ma ia toe Debata. Doeng i disoeroe Si Josep mangkapoeri bangkena i, djadi dian-doengi diondasi halahi ma ibana pitoe poeloe ari pitoe poeloe borngin. Doeng i ditaroehon halahi ma ibana toe tano Kanaän, ditanom halahi ma ibana di liang Makpela mangihoetkon pangidoannia i.

Djadi doeng mate Si Jakob, mabiar ma kahanggi ni Si Josep, harana didok roha ni halahi, betak ra Si Josep mambaloskon djahat ni halahi na djolo. Djadi disoeroe halahi ma mandok di sia; pandok ni amanta, sobarkon ma sala ni kahanggimoe. Marsak ma roha ni Si Josep, harana oempe saotik adong rohania songon i. Doeng i ro ma kahangginia manopot ia mandok : „hatobanmoe ma hami !” ninna. Ro Si Josep : „oelang dok songon i, aoe lakna Debata ? Toetoe do nian dipingkirkon hamoe na djat toe aoe, tapi maroedjoeng toe na denggan do hape dibaen Debata. Oelang mabiar hamoe, hoepangoloe pe hamoe dohot dakdanakmoenoe !” ning ia.

Intap ni i laing saroha satahi ma halahi. Djadi doeng saratoes

sampoeloe taon oemoer ni Si Josep, marnjae ma ia hantjit. Djadi dipalagoet ia kahangginia, didokkon ia di halahi: „aropkoe na kehe ma aoe, tapi toengkiron ni Debata do hamoe, diboan Ia do hamoe moelak toe tano Kanaän na nibagahonnia di ompoenta. Sada do na hoepangido: moeda toeloes moelak hamoe toe si, boan holi-holingkoe, tanom di sadoe i,” ning ia. Ro halahi: „olo anggi,” ning halahi. Doeng i tos ma hosana, moelak ma ia toe Debata.‡

## PONGGOL 20.

### Taringot toe Si Moses.

Di na boengkas Si Jakob dohot soede halahi sabagas toe tano Misir, onom poeloe onom do halahi. Di hatiha na mate Josep dao oembahat halahi, nada adong be roha moelak toe tano Kanaän, harana ma sonang halahi. Doeng pe mate radja na basa i, na pabangkit Si Josep, asa moeba roha ni halak Misir. Dibaen na marpoepoe manamba halak Israel, mabiar ma halak Misir, djadi martahi-tahi ma radja i dohot parripenia, sanga bia ma baenon, oelang moer bahat halak paisolat i.

„Hita do antong nampoena tano, halak na ro do halahi, moeda tapadiar sadjo, tardok so satahi halahi dohot moesoenta mamoenoe hita, moeda masa hamoesoeon,” boti be ma roha ni halak Misir i. Djadi dipamilas radja i ma rodi i di halak Israel, soen milasna dibaen ia, oelang tahan halahi, ning rohania. Doeng songon i, bo, tahan do halahi hape, balik noma te he, moer hantjit rodi i moer gogo moer bahat ma halahi, oempe mangasi na binaen ni radja i.

Doeng i ro ma parenta na imbaroe na hoemantjit dope mandok: soede dakdanak halak lahi, na sorang di halak Israel, angkon niajoep di batang aek Nil. Moeda dadaboroe, na baroe sorang i, tola do nipa-ngoloe. Nada na boti-boti anggoek-anggoek ni ina-ina i hara ni parenta i. Haroe djotdjot pe diboenihon halahi dakdanak i, moeda hoem habotoan di oeloebalang ni radja i, manigor niboeat do laloe niajoep.

Asa adong ma dompahi halak, na margoar Si Amram, goar ni donganna saripe Si Jokabet. Djadi sorang ma di halahi dakdanak halak lahi. Sai tangis-tangis do halahi marningot parenta i, tapi nada toroes

roha ni halahi mambaen i. Djadi diboenihon halahi dakdanak i, loepoes maroemoer toloe boelan, tapi doeng i moer mabiar ma halahi, angke sai adong do na goetgoet rohana paboahonsa.

Djadi dibajoe halahi ma hirang togoe sitoetoe, dirapot halahi dohot imbalo, oelang masoek aek. Djadi doeng dipamasoek halahi dakdanak i toe si, ditaroehon halahi toe batang aek i, dipajakkon halahi di tonga-tonga ni aroeng i, oelang manigor majoepe dibaen doras ni aek. Sada moese, dipili halahi do hapajahanna i, angke donok toe si adong tapian ni boroe ni radja i. Djadi dipadjagahon halahi hirang i di Si Mirjam, iboto ni dakdanak i, na maroemoer doea bolas taon, ning inangnia di sia : „djago anggimoe, da inang, oelang bagi mahoea, santongkin nari ro ma boroe ni radja i maridi, tapi moeda ro ia mondjap ko, oelang raso rohana,” ning ia. Djadi moelak ma natoras ni dakdanak i toe hoeta.

Asa nada piga dan, ro ma toetoe boroe ni radja i rap dohot dongan-nia boedjing-boedjing maridi. Djadi dompak marmajam-majam di topi aek i, tarbege ma sora ni dakdanak i di halahi tangis-tangis di tonga-tonga ni aroeng i. Djadi ro dok ni halahi : „aha do loelai na tangis i ?” ning halahi. Djadi disoeroe ligi boroe ni radja i, bo dapat ma hirang i. Djadi doeng dioengkap, diida halahi ma dakdanak na menek di bagasan. Ibo sitoetoe ma roha ni boroe ni radja i midasa, ning ia : „dakdanak ni halak Heber do on, na giot ajoepan mangihoetkon parenta ni amanta,” ning ia. Djadi dompak mangkobari halahi tar-ingot toe si, ro ma Si Mirjam, iboto ni dakdanak i, djadi didokkon ia di boroe ni radja i : „tabe ma di boroe ni radja i, toemboek dilala hamoe hoedjalahi ina-ina, na ra patagoekkon dakdanak on?” ning ia. Ro boroe ni radja i : „toemboek, djalahi ma,” ning ia. Djadi di-alap Si Mirjam inangnia, diboan ia toe boroe ni radja i, djadi didokkon ia : ma dapat aoe na hoedok nangkin, indon ma,” ning ia. Ro boroe ni radja i mandok ina-ina i : „moeda toemboek rohamoe, boan ma dakdanak on, paoeli-oeli denggan, hoelehen pe oepamoe, tapi moeda mantak managoek ia, paoelak ia di aoe, antjo aoe pagodangkon,” ning ia. Aha dope, na djop ma antong roha ni dadaboroe i maroban anaknia moeli, djadi doeng di bagas mandok tarima kasi ma halahi toe Debata.

Asa doeng goemodang dakdanak i, dipasahat inangna i ma ibana toe boroe ni radja i, djadi dibaen boroe ni radja i ma goarna Si Moses, astoeanna : na hoeëla sian aek. Djadi disoeroe boroe ni radja i ma

ibana manggoeroehon soede hapistaran ni halak Misir. Sonang do dilala Si Moses di moelana i, tapi doeng toemobang ia, nada sadia mararga be di sia hasonangannia i. harana markantjit diida ia halak Israel pambaen ni halak Misir. Djadi moer disarihon ia i moer so tahan be ia di bagas ni radja i, djadi gonan di sia markantjit rap dohot dongan sabangsonia sian na marsonang-sonang rap dohot halak Misir.

Djadi doeng opat poeloe taon oemoernia, kehe ma ia saaelak mangaligi dongannia halak Israel. sanga na bia pangaeen ni halahi di rodi na milas i. Djadi diida ia, dioemban halak Misir halak Israel, bo aha dope, manigor ro ma poetoengnia, djadi doeng dipatangkas ia, sanga adong halak na asing donok, diboenoe ia ma halak Misir i, ditoetoep-toetoepi ia bangkena dohot tano. Sapetona giot dipapatar Si Moses do rohania, antjo satahi halak Israel dohot ia mangalo halak Misir, mandjalahi haloeaän sian parkantjitan. Adong do nian roha ni Debata mambaen Si Moses oeloenna paloeahon halak Israel, tapi nada podo doempang hatihana, boti pe anggo halak na songon i, sioekna nada toemboek di roha ni Debata.

Torang arina i marlaho-laho ma Si Moses mangoelahi, padoempang ma ia dohot doea halak Israel na marbada. Djadi disapai ia ma na sada : „biasi diboenoe ho donganmoe ?” ning ia. Ro bajo i : „ise do pabangkit ko oloan dohot paroehoemnami ? Giot boenoeonmoe aoe lakna songon na diboenoe ho halak Misir i nantoeari ?” ning ia. Djadi tarsonggot ma Si Moses dibaen madoeng mehet toe djae toe djoelce na binaennia i, mari-ari ma mabiar ia, doeng dohot radja i oembotosa, djadi gilo noma ia toe tano Midian.

Djadi bolkas ma ia toe hoeta ni malim Reguel sanga Jetero, maradian ma ia di soemoer na donok toe hoeta i. Djadi adong ma sangombas doeng di si ia, ro ma boroe ni malim i mangajak biri-biri toe si painoemsa. Djadi adong ma santongkin, doeng ro boedjing-boedjing i, bo ro ma halak siparmahan, giot disoloek halahi ma boedjing-boedjing i, antjo djoemolo halahi. Djadi dioeroepi Si Moses boedjing-boedjing i, tarbaen halahi djoemolo sanoli on. Djadi doeng moeli halahi, homang ma roha ni malim i, didokkon ia ma : „biasi songon i sigopna hamoe ro ?” ning ia. Ro halahi : adong bajo, na ro sian tano Misir, na manolong hami, ditahoe ia aek painoem biri-birinta i,” ning halahi. Ro malim i : „di si dope bajo i ? biasi nada dipiohon hamoe ? kehe ni, piohon ia mangan,” ning ia, djadi dipiohon halahi.



Asa i ma dalanna laloe tinggal Si Moses di bagas ni malim i, djadi doeng hoemonok ia di si, dilehen malim i boroenia Si Sipora di sia.

## PONGGOL 21.

### Disoeroe Debata Si Moses paloeahon halak Israel.

Opat poeloe taon tinggal Si Moses di bagas ni toelangnia. Dompok di bagas ni radja Misir i digoeroehon ia roepa-roepa hapistaran tano on na hasaja soede ; di tano Midian dapot Si Moses roha na lambok, na goeroe di Debata sambing.

Djadi doeng salpoe na opat poeloe taon i, dipasahat Debata ma di sia karedjo na godang, na maol moese. Moer poran ma parkantjitan ni halak Israel, moer dipangidohon halahi ma toe Debata, oelang so asi rohania mangalehen haloeaän. Djadi dibaen na toemboek di roha ni Debata pangidoan i, disoeroe Ia ma Si Moses patoerehon na hasaja toe si.

Saoelak diboan Si Moses biri-biri ni toelangnia toe djalangan na dao, djabat laloe ia toe bona ni dolok Horeb. Djadi sindorang dipaihoet-ihoet ia pahan-pahanan i, diida ia di padang-padang i haramonting saroemboen-roemboen na gor. Gara-gara diida ia api i mardjilam-djilam, tapi nada mosok haramonting i. Homang rohania midasa, giot dipadonok ia ma patangkaskon, bo tarbege ma di sia sora, na ro sian tonga-tonga ni haramonting i, mandok : „o Moses! o Moses!” ninna. Ro ma aloes ni Si Moses : „di son do aoe,” ning ia. Doeng i ninna ma : „oelang padonok be toe son! harkari ma tapak-tapak na di patmi, harana na badia do tano hadjongdjonganmi. Aoe do Debata na nisomba ni ompoengmoe,” ninna. Djadi doeng dibege Si Moses songon i, digoepgoepi ia bohinia, harana mabiar do ia manaili toe si. Djadi mangoelahi ma dipangkoelingkon Debata ibana, ning Ia ma : „madoeng bolkas toe Aoe pangidoan ni halak Israel, ma Hoeboto panaonan ni halahi, kehe ma ho saonari manopot radja Misir i, dok dipaloea ia halak Israel. Aoe do donganmoe, Jahowa do goarkoe,” ning Ia.

Bahat dope djolo sidalian ni Si Moses, oelang disoeroe Debata ibana, tapi moeli-moeli so hagagaän ia be. Djadi dilehen Debata di sia koeaso mambaen toloe tanda hahomangan. Na pardjolo i :



moeda diamboengkon ia toengkotnia toe tano, djadi oelok do manigor toengkot i; moeda didjampoet ia di lailaina, moelak djadi toengkot. Tanda padoeahon: moeda dipamasoek ia tangannia poeroeon ma tangan i; moeda mangoelahi dipamasoek ia, maloem ma poeroena i, moelak denggan songon na djolo. Tanda patoelohon: moeda ditahoe ia aek saotik sian batang aek Nil, didoeroeskon ia toe tano, djadi moedar ma aek na nitahoenia i. Tanda na toloe i angkon dipatidahon ia, moeda hoerang porsaja halak di sia. Djadi diloas Debata moese diboan Si Moses angkangnia Si Aäron dongannia, harana oemmalo i markata.

Asa doeng i diboan Si Moses ma dongannia saripe dohot anaknia na doea i, djadi laho ma halahi toe tano Misir.

Djadi doeng laloe, dipalagoet Si Moses ma na tobang-tobang ni halak Israel, dipadjodjor Si Aäron ma na nidokkon ni Debata, dipatidahon Si Moses moese ma tanda hahomangan na toloe i, djadi porsaja ma halahi.

## PONGGOL 22.

### Taringot toe oehoem na sampoeloe i.

Asa doeng mardomoe tahi, dipangido Si Aäron dohot Si Moses ro toe adopan ni radja Misir i, djadi didok halahi ma di sia: „pandok ni Toehan Jahowa, Debata ni halak Israël, loas djolo kehe halahi toe halongonan manjomba Ibana,” ning halahi. Doeng dibege radjai pangidoan ni halahi, moeroek ma ia, didokkon ia ma: „ise he Jahowa? nada hoeboto oloankoe i, nada hoetanda i; i pe, nada tola morot halak Israel!” ning ia.

Doeng i nada piga ari nari mangoelahi dipangido halahi, laing nada diloas. Djadi disoeroe alap radja i mondoer rodi i, diparentahon ia, angkon dipadokdok halahi rodi i di halak Israel. Salolotna radja i pasingkop parkokas soede, tapi olat ni i toe poedi angkon dipasingkop halak Israel sendiri sasoedena i, tambana bagian na somal sidoeng sadari, nada djadi moerak. Moeda adong na so sidoeng, hona poekoel do na tobang-tobang i.

Hara ni hantjitna mangadap ma halak Israel mangido sajang ni roha, tapi ro hata ni radja i: „ah! na losok do hamoe, pasigop pasi-

doeng hamoe rodi moenoe ! Songon dia hoedok na baroe on, songon i moese saonari," ning ia. Djadi moelak boti ma halahi. Djadi disolsoli halahi ma Si Moses dohot Si Aäron, didok halahi ; „biasa antong dihoer hamoe hami, hape mandjalak toe segona do," ning halahi.

Doeng i martangiang ma Si Moses toe Debata mangido ibo ni rohana, djadi ro ma dok ni Debata di sia : „oelang ganggoe rohamoe, paloeaonkoe do halak Israel, antjo tangkas di hamoe, Aoe do Toehan Debatamoenoe. On pe, oelahi ma topot radja i, dok dipaloea ia halak Israel. Moeda nada ra ia, gogo do Hoebaen," ning Ia.

Djadi dibaen Si Moses dohot Si Aäron ma na nidok ni Debata, diamboengkon Si Moses ma toengkotnia toe tano i di djolo ni radja i, antjo gabe oelok. Djadi oelok do nian toengkot i, tapi nada pola sadia homang roha ni radja i, harana datoe dohot paralemoenia pe malo mambaen i. Goemodang do nian alemoe ni Si Moses, angke toengkotnia, na doeng djadi oelok, manolon toengkot ni halahi. Djadi dipaingot Si Moses dohot Si Aäron radja i, oelang dipapir ia rohana, oelang moer ro moeroek ni Debata toe sia. Ro radja i : „garogokmoe do i," ning ia.

Asa doeng i dipadalan Debata ma hagogoannia, diparo Ia ma sampoeloe oehoem na posi, na mangonai toe halak Misir. Songon on ma pangalahona ; oehoem na *pardjolo* i : gabe moedar do soede aek na di tano Misir, aek inoemon pe nada adong be, ihan soede marmatean. Mantak i, ro ma oehoem *padoeahon* : tohoek na lobi bahat, nada adong bagas na so gok tohoek, rongkomna so doeng ! Salpoe i, ro ma oehoem *patoloehon* : manamboes masa rongit na mandoit. Mantak i, ro ma oehoem *paopatkon* : masa roepa-roepa pandoit, na lobi hantjit pandoitna. Doeng i ro ma oehoem *palimahon* : masa ma bala 'ni pahan-pahanan ni halak Misir, tapi na halak Israel nampoena nada hona. Salpoe i, ro ma oehoem *paonomkon* : baro-baroön ma halak soede bope pahan-pahanan. Mantak i, ro ma oehoem *papitoehon* : madaboe ma oedan ambolas mardongan ronggoer na gogo, bahat sego soean-soeanan, djolma dohot pahan-pahanan bahat mate disoro porkas. Doeng i ro ma oehoem *pasalapankon* : mangarongom ma ro siapor na lobi tobal, abis ma soean-soeanan i, suda na so sego dope dibaen oedan ambolas i. Salpoe i, ro ma oehoem *pasambilankon* : masa ma hagolapan boelita toloe ari toloe borngin, oempe bagiaha niida, soen ma biar ni halak. Anggo radja i na

balik-balik bontar do, ganop tongkin moeba rohana. Moeda di hahantjitanna i, lambok ma rohana, dibagahon ia ma na tola kehe halak Israel, sonang mantak oehoem i, tapi moeda hoem mantak, dipoeter ia ma hatania i, nada diloas ia be. Songon i ma dibaen ia lopoer ro oehoem *pasampoeloehon*, i dope na djoemorboet. Doeng mantak oehoem pasambilankon i, moer dipadjogal radja i ma rohana, hatania pe moer pir ma adop Si Moses. Doeng honok martangkang halahi, ro ma dok ni radja i : „patiboe morot sian on, moeda poeloek ko saaelak nari toe son, boenoeonkoe do ho,” ning ia. Ro Si Moses : „olo, toetoe na nidokmi, nada idaonmoe be aoe !” ning ia. I do dalanna dipadokdok dipahantjit Debata oehoem pangabisan i. Marmatean do antong soede anak siangkaän, manganggoehi ma halak Misir soede, harana djodjor bagas adong na mate, bo radja bo halak parditoroe, nada marimbar, rap hona do soede.

Hoem halak Israel na so hona, harana disoeroe Debata Si Moses mamodai halahi, angkon dipili ma anak ni biri-biri na so adong gasana sanga tihasna, doeng disambol angkon nidaiskon moedarna toe tiang ni pintoe ni bagas ni halahi sian balian, ganop bagas na martanda songon i, nada hona nampoenasana i. Doeng i, borngin haroro ni oehoem i, angkon dipangan halak Israel biri-biri i hoem nitoetoeng sadjo mardongan roti na so niasoman dohot ingkajoe na paet. I pe, nada tola djoegoek mangan, angkon djongdjong do, hobas hoemani songon halak na giot mardalanan dao. Djadi dibaen halak Israel ma songon i.

Djadi borngin i martangisan ma halak Misir, disoeroe alap radja i ma Si Moses, ning ia ma : „kehe ma hamoe, baen kamoe ma na nidokmoenoe i, boan barang-barang moenoe soede, nada hoerarang be,” ning ia. Dohot halak Misir i manosoi halak Israel, oelang so tiboe kehe halahi. Mangalehen siloea do halak Misir i, abit dohot sere dohot na asing-asing, saratna morot.

Djadi parningotan godang ma dibaen halak Israel borngin i ganop taon, margoar ma i : „PESTA PASKA”, harana disalpoei soeroe-soeroean ni Debata bagas ni halahi, oelang dohot tarkona.

## PONGGOL 23.

**Taringot toe pardalanan ni halak Israel.**

Dibaen na markobas hian halak Israel, tarbaen halahi ma mardalan manigor. Na bahatan do halahi, hoem ama-ama i pe dapot ma onom ratoes riboe halak, sadia bahat dope barang dohot pahan-pahanan. Adong ma opat ratoes toloe poeloe taon honokna maringanan halahi di tano Misir. Laho kehe diingot halahi maroban holi-holi ni Si Josep mangihoetkon pangidoannia, laho mate ia.

Madoeng ro dok ni Debata toe Si Moses, nada pade boanon halahi sian dalan na toemigor, moesoe dohot panjamoen bahat di si, djadi moeda doempang ragam hasoesaän hoem morot, manolsoli ma roha ni halak Israel laloe mandele. Sada moese, Debata do patoedohon dalan boloeson ni halahi, arian dipatama Ia omboen, na tongtong mardalan di djolo, api do gontina bornzin.

Asa doeng kehe halak Israel, manolsoli ma roha ni radja Misir i, nada be diingot ia angka oehoem i, harana ma roegi dilala ia na morot halahi, nada adong be parrodi. Boti pe, dibaen sian dalan na mangalit dioban Si Moses halak Israel i, diambang ia na liloe halahi, djadi diompot ia palagoetkon soridadoenia, antjo diajak ia halahi. Sangkap ni rohania, moeda doeng dapot, boannonnia ma halahi moelak. Dapot ia ma halak Israel i, dompak maradian halahi di pasir ni Laoet Aroengan.

Asa doeng diida halak Israel na ro radja Misir i maroban soridadoe, hepoet ma halahi, didok halahi ma di Si Moses : „mate ma da hita dibaen halak Misir i ! biasi antong dioban ko hami toe son ? Inda gonan marrodi hami di tano Misir sian na mate sambing di halongonan on ?” ning halahi. Ro Si Moses : „oelang mabiar hamoe, pir ma tondimoenoe ! Idaon moenoe do saonari panolongi ni Debata. Indangkon hamoe, Debata do alo ni halahi, so sadjo ma hamoe,” ning ia. Doeng i didokkon Debata ma di Si Moses : „dok di halak Israel mardalan halahi, pahortang moese ma toengkotmoe di gindjang laoet i, mabola ma aek i, tarbaen halahi ma mardalan di laoet i songon di darat on,” ning Ia.

Omboen i pe na somal di djolo, mimbar ma toe poedi dibaen Debata, antjo di holang-kolang ni halak Israel dohot halak Misir inganan-



na. Djadi nada tarbaen halak Misir i doemonok ; hara ni hapal ni omboen i golap anggo sian bariba ni halak Misir, tapi torang sian bariba ni halak Israel.

Asa doeng dipahortang Si Moses toengkotnia di gindjang ni laoet i, ro ma haba-haba toenggal sian poerba na, manjerakkon aek i, djadi dapot ma na hiang di tonga-tonga ni aek i na tama pamoloesan ni halak Israel. Djadi sonang taripar halahi. Anggo halak Misir, diihoetkon halahi do halak Israel, tapi doeng laloe taripar halak Israel, bo moelak mardomoe ma aek i, djadi mate mogap ma halak Misir i.

Doeng diida halak Israel, na maloea halahi sian moesoe i, djop ma roha ni halahi, dipoedji halahi ma Debata na mangoercepi halahi.

---

## PONGGOL 24.

### Sian Laoet Aroengan i lopoes toe dolok Sinai.

Bahat dope angka pangoedjian na asing ro toe halak Israel, bia ma moeda halongonan boloeson. Sabolak ni mata adong do panatapan na tardas hara ni saena, manalese noma toe baribana. Harangan parsilaoengan ranggo do, doehoet pe maol, taroe na soada anggo aek. Barang ise na giot mamoloes halongonan, angkon maroban panganon dohot inoemon, oelang mate tangkoeraparan ; hoeta pe so adong, aha ma hangoloean di si !

Maroban bohal do nian halak Israel, tapi sadia ma tarpasingkop di halak na marratoes riboe, oelang nihobar djolo pahan-pahanan i. Hoem di paradianan asa soemonang.

Doeng mardalan halak Israel tolloe ari, bolkas ma halahi toe Adian Mara. Aek inoemon na nioban i ma soede, djadi moga ma halahi, doeng dapot moeal di si, hape paet sira do aekna i, nada tarinoem. Djadi hara ni oengoet-oengoet ni halahi hoemolos ma Si Moses toe Debata, djadi dipatodahon Debata ma saroepa hajoe di sia, moeda disom-samkon ia i toe aek i, tonggi ma daina, pade inoemon.

Na so holang do marmoengoet-moengoet halak Israel, sanoli hara ni panganon, dibaen so djoengada be boetong mangan djoehoet dohot roti. Dipasonang Debata moese do halahi taringot toe si, angke potang ro ma leto na lobi tobal, momo sadjo tangkoepon; manjo-



got dapot halak Israel ma saroepa panganon na margoar Manna, tar hiboel bope bontar tompana, daina tar songon aer ni loba. Ganop manjogot dapot na imbaroe pajak di tano i ; moeda hoemonok nipadjop sian sadari, oelohon ma. Hoem na nidjompoe di pantjalong ni ari Sabbat i manaon doea borngin.

Nada sadia lolot doeng i, masa ma hasoesaän dibaen halak Amalek, na ro mamorangi halahi. Djadi disoeroe Si Moses Si Josoea pala-goetkon ama-ama i soede, antjo rim dialo halahi halak Amalek i. Djadi didokkon ia ma di Si Josoea : „moeda toeloes na marporang i antjogot, manangkok ma aoe toe dolok an, hoeboan Si Aäron dohot Si Hoer dongankoe, djadi hoetangiangkon ma hamoe, antjo dioeroepi Debata hamoe,” ning ia. Torang arina i marporang ma halak Israel dohot halak Amalek, dibaen Si Moses ma na nidoknia. Sahonok hortang tangannia adop gindjang dompak marsimora-mora, soemoeroet ma halak Amalek ; tapi moeda madaboe tangannia hara ni na lodja, soemoeroet ma halak Israel. Djadi djoegoek ma ia, ditiop dongan i ma tangannia antjo tongtong adop gindjang lopoës loesoet mata ni ari.

Aha dope, taloe ma halak Amalek, monang ma halak Israel, djadi lopoës bolkas toe dolok Sinai diondingi Debata halahi.

---

## PONGGOL 25.

### Taringot toe Hata na Sampoeloe i.

Doea boelan doeng morot sian tano Misir, bolkas ma halak Israel toe dolok Sinai. Djadi dipaingot Si Moses ma halahi di si, oelang so dioloi halahi Toehan Debata, disoeroe ia moese halahi marsipaias abitna be bope marparange na tama, antjo tardjagit halahi patik dohot atoeran, na giot lehenon ni Debata.

Asa tolœ ari doeng i, tarbege ma ronggoer na gogo sahali, hilapkilap nada marnamantak hoemaliang oedjoeng ni dolok i, manjorop moese omboen na lobi golap, pola hoemoetoer dolok i bope martimoës. Djadi dioban Si Moses ma halak Israel i toe bona ni dolok i, doeng i so ma halahi di si, angke nada tola manangkok, salang dais toe dolok i nada, djadi mabiar ma halak socde.

Doeng i tarbege ma sora na gogo na mandok :

- 1°. Aoe do Toehan Debatamoe, na paroea ko sian tano par-katobanan tano Misir i, nada djadi mardebata na leban di balikoe.
  - 2°. Oelang ko manggana-ganai, maniroe pe nada tola, bo na di gindjang di langit, bo na di toroe di tano on, bo na di aek na di toroe ni tano on. Nada djadi sombaonmoe soedena i, harana Aoe, Toehan Debatamoe, Debata parrimas do Aoe, na mangaloeloeon dosa ni ama toe anakna lopes toe soendoet patoloeon dohot paopatkon pomparan ni ha'ak, na magigi mida Aoe, tapi holong do rohangkoe sapandjangna mida pomparan ni halak, na markolong ni roha di Aoe, bope na mangoloi hatangkoe.
  - 3°. Oelang dokkon goar ni Toehan Debatamoe moeda soada dalanna, angke dioehoem Debata do ha'ak, na mandokkon goarnia, moeda soada dalanna.
  - 4°. Ingot ma ari Sabbath i, antjo diparbad'ai ho ari i. Onom ari ma lolotna na mambaen barang aha baenonmoe, tapi ari papitoehon, i ma ari Sabbath ni Toehan Debatamoe, nada djadi mambaen di na sadari i, bo ho, bo anakmoe, bo bo-roemoe, bo naposomoe halak lahi, bo naposomoe dada-boroe, bo pahan-pahananmoe, bo ha ak na mardagang di hoetamoe. Harana di bagasan onom ari ditompa Debata langit dohot tano dohot laoet dohot isina soedena ; doeng i maradian ma Ia di ari papitoehon. Hara ni i dipasoe-pasoe djana diparbadiai Debata ma ari Sabbath i.
  - 5°. Oelang so pantoen ko di amangmoe dohot di inangmoe, antjo lolot ko mangoloe di tano na nilehen ni Toehan Debata-moe di ho.
  - 6°. Oelang ko mamoenoe djolma.
  - 7°. Oelang ko markarosoean.
  - 8°. Oelang ko manangko.
  - 9°. Oelang ko margaboes adop donganmoe.
  - 10°. Oelang impol rohamoe di bagas ni donganmoe. Oelang impol rohamoe di dadaboroe ni donganmoe, bo di naposona halak lahi, bo di naposona dadaboroe, bo di lomboena, bo di hadjaranna, bo di barang aha pe na ia poena.
- Asa i ma na margoar *Hata na Sampoeloe*, di bagasan ni i dipaboa

Debata rohana taringot toe parange na patoet dohot harohaon na tama di sandok djolma manoesia.

Djadi doeng dibege halak Israel hata nangkinan i, songgop ma biar ni roha toe halahi, djadi soemoeroet ma halahi. Mangasa tongamna dipangido halahi di Si Moses, sasada ia noma toe djoloan on mangkobar dohot Debata, antjo ia pabolkaskon i toe halahi. Doeng i manangkok ma Si Moses toe dolok i, tinggal ma ia di si opat poeloe ari opat poeloe borngin.

## PONGGOL 26.

### Taringot toe gana-ganaän lomboe sere.

Nada diboto halak Israel songon i lolotna di dolok i Si Moses, djadi ganggoe ma roha ni halahi, didok halahi ma : „nada binoto sanga aha na masa di oeloenta Si Moses, betak na doeng mate do ! Aha ma sombaonnami hami boto ? Gonan dibaen ko di hami gana-ganaän sombaonnami, antjo adong parsimora-moraän,” ning halahi.

Soehar do nian hata i di roha ni Si Aäron, tapi nada poeloek ia manggagai, hoem dipamaol-maol ia, angke dipangido ia sere pakean ni halahi sanga sadia ma adong. Arop rohania holongan do roha ni halahi di sere oelang di gana-ganaän, hape maradoe olo halahi. Dipaloehoet halahi ma barang sere i, dipasahat halahi ma di Si Aäron. Doeng didjagit ia, dipalala ia i, ditoeang ia sian i gana-ganaän gambaran ni lomboe. Toemboek do i di roha ni halak Israel, angke somal diida halahi dipasomba-somba halak Misir na songon i.

Asa doeng sidoeng gana-ganaän i, didok halahi : „on noma sombaonta toe djoloan on, on do debata, na paroeear hita sian tano Misir !” Djadi marpesta-pesta ma halahi ari-ari manortori gana-ganaän i.

Madoeng diida Debata na binaen ni halak Israel, djadi tarrimas ma rohania dibaen i, didokkon Ia ma di Si Moses ; „manoeat ma ho sarorari, angke madoeng mardosa halak Israel, disomba halahi do debata na leban. Djadi diamboengkon halahi Aoe, antong, Hoetimpas-kon ma halahi soede, antjo ho Hoebaen ompoe parsadaän ni bangso na imbaroe !” ning Ia. Ro Si Moses : „oelang songon i, ale Toehan ! ibo ma djolo rohamoe di halahi !” ning ia. Djadi hara ni pangondihon ni Si Moses nada dipalaloe Debata rohania i.

Djadi di na manoeat i Si Moses, ditatap ia ma halak Israel marmoga-moga hoemaliang lombœ sere i, tarmilas ma rohania midasa, djabat di bagasan moeroeknia ditombomkon ia batœ panjoeratan ni Hata na Sampœloe i toe tano i, djadi matapor ma i doea-dœa.

Doeng i dilodjong ia ma toe gana-ganaän sere i, diroempak ia, disego-sego ia, diamboengkon ia toe api, siraboenna i disaboerkon ia toe aek inœmon ni halahi. Djadi disolsoli ia Si Aäron, dibaen dioloi ia hata ni halahi. Ro Si Aäron: „bia ma hoebaen, nada taralo aœ roha ni halahi, diboto ho do djogalna i,” ning ia.

Djadi dipalagoet Si Moses ma halak Israel soede, didokkon ia di halahi: „barang ise na ra manjomba Toehan Debata, ro ma ia toe lamboengkœ,” ning ia. Djadi ro ma toe lamboengnia soede halak marga Levi. Doeng i didokkon Si Moses ma di halahi: „sintak kamœ podangmoenœ be, boenœ barang ise na manjimbil sian Toehan Debata,” ning ia. Djadi dibaen halahi songon i, adong ma hira-hira tolœ ribœ halak mate.

Torang arina i didokkon Si Moses di halahi: „godang sitoetœ do dosamoenœ, disomba hamœ na so patœt, antong, kehe ma aœ toe dolok Sinai mangido toe Debata, oelang mamboeat mosal Ia,” ning ia. Doeng i manangkok ma Si Moses, djadi didjagit Debata ma pangidoannia i. Adong ma opat poelœ ari opat poelœ borngin mangoelahi ia di si, djadi digonti Debata ma batœ panjoeratan na matapor i dohot na imbarœ, momosan ni halak Israel baen siingotan ni halahi.

## PONGGOL 27.

### Taringot toe bagas djoro i.

Sada na godang na nidok ni Debata di Si Moses di dolok Sinai, i ma na mambaen bagas parsombaän sanga bagas djoro. Hara ni na di pardalanan halak Israel, nada tarbaen dope na togœ ingananna, angkon na momo boekaon do. Paratoeranna i nada djadi so toedoes toe tiroean na nilehen ni Debata. Pandoknia moese, angkon ditoempoer halak Israel soede na hasaja toe si. Djadi sian djop ni rohana dilehen halahi tohapanna be, adong na mangalehen sere sanga perak sanga toembaga sanga batœ intan; adong na mangalehen



abit dagangan, soerto, bobak, hajoe dohot na asing-asing. Doeng singkop soede, dikaredjohon doea halak na malo martoe kang ma i, dibaen halahi ma bagas djoro i, toloe poeloe elak do oendjoerna, sampoe elak bohangna, sampoe elak hintjatna, dorpina papan na nilampisan dohot sere, taroe pna abit soerto na bontar dohot bobak ni hambeng na nipadomoe, pintoena abit na aloes. Doea do bilikna; bilik na sian djolo margoar *bilik na badia*; bilik na sada nari i margoar *bilik na badia sanoli*. Hire-hire parbolatan ni bilik na doea i. Maralaman bope marparik do bagas djoro i, nihandang haliang, handangna i saratoes elak oendjoerna, lima poeloe elak bohangna.

Bahat do barang-barang dohot parkokas pakeon ni malim, na totop be ingananna. Na di *bilik na badia sanoli*, on do :

Sada poti na nilampisan dohot sere sian balian bope sian bagasan, *Poti parpadanan* goarna. Toetoe pna sere mata. Di gindjang ni toetoe pna i djongdjong doea gambaran ni soeroe-soercean, *Keroebim* goarna. Paadop-adop do na doea i boti oendoek pardjongdjongna, angke i do tanda ni na marsomba. Di bagasan poti i dimomos halahi batoe panjoe-ratan ni Hata na Sampoe i, sada katjo sere na marisi Manna, doeng i toengkot ni Si Aäron, sintoea ni malim i.

Na di *bilik na badia i*, on do :

- 1°. *Sada parlampoean sere*, na pitoe dangkana; di ganop dangka sada lampoe. Tolee lampoe nada djadi marnamintop, angkon tongtong gara arian na borngin. Borngin bope di ari Sabbat angkon nitoetoeng i pitoe-pitoe. Karedjo ni malim do i patoerehon i.
- 2°. *Sada medja pajahan ni roti sipaidahononkon*. Tongtong angkon pajak di medja i doea bolas kamata roti, gontion di ganop ari Sabbat. Harana didok roti sipaidahononkon, antjo tongtong diida Toehan Debata, angke tanda ni na mandok tarima kasi do i.
- 3°. *Sada parkaoelan parasapan*, na nilampisan dohot sere. Ganop manjogot dohot potang ditoetoeng malim pamoerpoeri na hoeskoes di gindjangna i.

Na di *alaman* ni bagas djoro i, on do :

- 1°. *Sada parkaoelan panoetoengan*. Hajoe do parkaoelan i na nilampisan dohot toembaga. Di gindjangna i nibaen tano, nada hoti tataring. Hasaja sitoetoe do i di halak Israel, ha-



rana na nihaoelkon ni halahi, somalna lombœ do sanga biri-biri sanga hambeng. Doeng disamboli malim i, ditoetoeng ia i di parkaoelan i lopoës abis dipangan api i.

2°. *Sada parboerian toembaga*, na bahat pantjoerna baen paridian ni malim.

Mangihoetkon pandok ni Debata, hoem marga Levi do na tola mandjama karedjo na di bagas djoro i. Malimna i angkon sian horong ni Si Aäron moese. Radja ni malim i margoar *Sintoea ni malim*. Atoeran ni i, tongtong anak siangkaän manggonti amana.

Bahat do ari na godang di halak Israel. Toloe do na goemodang, na masa saœlak sataon, i ma *Ari Paska*, *Ari Pentakoste* dohot *Ari Bandar*.

Di *Ari Paska* diingot halahi haroeroear sian tano Misir.

*Ari Pentakoste* i, donok do i toe na didok di hita on oeloe ni taon.

Di *Ari Bandar* i diingot halahi na marbandar i di halongonan i.

## PONGGOL 28.

### Taringot toe halak Israel dompak di halongonan.

Goeroe di Debata do hatiha mardalan dohot maradian halak Israel. Sapandjang dok ni Debata, moeda manaek omboen i diida halak Israel, mandok na langka ma ; moeda moelak toe toroe laloe so, mandok na maradian ma. Djadi doeng sidoeng bagas djoro i, di gindjang ni i noma omboen i tongtong.

Adong ma hira-hira sataon, doeng di bona ni dolok Sinai halak Israel, manaek ma omboen i diida halahi, djadi manigor markobas ma soede. Bagas djoro i dirorak halahi, asa doeng simpan parkajoena dohot parkokasna, dihaldoeng halak Levi soedena i.

Sangkap ni roha ni Si Moses oelang so tiboe nian laloe toe tano Kanaän, tano na nibagahon ni Debata. Djadi doeng mardalan halahi tolœ ari, bolkas ma toe halongonan Paran, maradian ma halahi di si. Sahonok di bona ni dolok Sinai halahi, adong dope sonangna saotik, tapi doeng mardalan mangoelahi, ro moese ma na markantjit. Hara ni na so holang marmoengoet-moengoet halahi, djotdjot dipatidahon Debata rimas ni rohana. Songon i ma saœlak gor padang na

di lamboeng ni paradianan i, nada binoto sanga aha dalanna, djabat dipangan api i bandar dohot barang-barang i deba. Soesa ma roha ni halak Israel, harana na maolan intopan. Djadi diokoe halahi, oehoem na ro sian Debata do i, djadi ditopot halahi Si Moses, antjo ia mangido di Debata, oelang moer rarat api i. Djadi dipangido Si Moses ma, mintop ma sigop doeng i.

Nada piga ari doeng i, hoemolos ma halak Israel mangoelahi, dibaen so djoengada mangan djoehoet be. Didok halahi : „tarsingot rohanami di hasonangan dompak di tano Misir. Momo ni goelaen antong di si, mamili sadjo ma ! Ingkajoe pe marroepa-roepa ! Aha ma na dapot di son ? Manna i, i ma ia, dai aha ma i ?” ninna. Doeng dibego Si Moses na so gon i, diholoskon ia i toe Toehan Debata, angke manoes rohania patangi-tangi bahat ni oengoet-oengoet i.

Djadi didokkon Debata di sia : „paboa ma, dapotan djoehoet do halahi antjogot, nada hoem sadari sanga doea ari, tapi saboelan lolotna lopoos sobalan. I ma antjo diboto halahi na mangan djoehoet,” ning ia. Ro aloes ni Si Moses : „bahat ni halahi adong ma onom ratoes riboe, patoepaonmoe ma lakna djoehoet di halak na sai bahat, saboelan moese lolotna ? Dapot di dia ma lomboe sanga biri-biri sambolan. antjo toek santanggo be ? Moeda ihan lehenonmoe, inda na paloehoetonmoe ma soede ihan na di laeet na godang i ?” ning ia. Ro Debata : „na hoerang koeaso he Debata ? Idaonmoe do i, sanga toetoe sanga nada,” ning Ia.

Aha dope, peto ma nada piga dan ro ma haba-haba toenggal. na maroban leto na lobi tobal, barang na piga hoelanan pe, nada tarra-djoem. Tongkon hoemaliang paradianan i mangkadaboe leto i, sapadang i. Djadi marsidjolo-djoloan ma halak mandjompotsa. Hara ni hisapna dipoernas halahi ma na mangankon i, na lobi do tjongkok ni halahi. Djadi masa ma hantjit ni boetoeha dibaen i, na bahatan na marnjae laloe mate. Djadi digoar halahi ma paradianan i „Tano-man ni na hisapan.”

---

## PONGGOL 29.

### Disoeroe Si Moses mangkahap tano Kanaän.

Doeng i mardalan ma halak Israel mangoelahi. Djadi doeng donok halahi toe tano Kanaän, didokkon Debata di Si Moses, angkon disoeroe

ia doea bolas halak djoemolo mangkahap tano i. Djadi dipili Si Moses ma doea bolas halak, didokkon ia di halahi : „tangkas-tangkas pareso hamoe soede sanga na bia pangalaho ni tano i, napoena, gariangnæ, bahat ni halakna, harohaonna, pandaramanna, parkoetaänna, soedena i nada djadi so sihir diboto hamoe, moeda moelak kamoe”, ning ia. Doeng i kehe ma halahi.

Djadi dompak di tano Kanaän pangkahap i, laloe ma halak Israel toe hoeta Kades na di parbalohan ni tano Kanaän, dipainte halahi ma di si hamoemoelak ni sipangkahap i. Tama moese hoemonok halahi maradian, angke ma sabolas borngin, doeng boeat sian dolok Sinai.

Asa doeng moelak pangkahap i, disapai halak Israel ma manigor. „Bia do, pade de he tano i diida hamoe ? napoe do?” ning na sada. „Lajak mangoloe do hita di si dipingkir hamoe ?” ning na sada. „Taralo hita de he halak Kanaän ?” ninna deba. Djadi songon i ma marsisosahan halak hoemaliang pangkahap i. Djadi marbarita ma pangkahap i, didok halahi : „anggo tano i denggan do, napoe moese ! Indon ma bo batoe ni hajoe, na hami boan sian i, inda na pade ma diida hamoe ? Songon i ma soede ! Saotik do salana, hoeta ni halak di si na togoean, benteng do cardok, halakna pe na bolonan !” ning halahi. Ro Si Kaleb, i ma sada na dohot mangkahap, ning ia ma : „olo, toetoe do i, tapi bo songon i, taralo hita do i !” ning ia. Ro pangkahap na asing i : „ah ! nada toetoe i, siapor do hita na soada gogo soada bisoek martimbangkon halak Kanaän,” ning halahi.

Asa doeng dibege halak na torop barita i, gaor ma halahi, disolsoli halahi ma Si Moses, didok halahi ma di sia : „ho do maroban hami toe son, na manosoi hami maninggalkon tano Misir, aha do lakna sangkap ni rohamoe ? Antjo mate dakdanaknami diboenoë halak Kanaän, ning halahi. Djadi giot diamboengkon halahi ma Si Moses, antjo nipabangkit oeloëan na asing gontina, na maroban halahi moelak toe tano Misir. Djadi tarkohom ma Si Moses dohot Si Aäron, hoem doea halak na poeloek mangkoeling, Si Josoea dohot Si Kaleb, didok halahi ma : „ia hami, dongan ! nada he dohot hami mangkahap tano i ? Oelang gaor hamoe hara ni soada. Nada patoet songoan i pangkoelingmoenoë adop Si Moses dohot Si Aäron, angke toetoe do, na denggan sadjo do tano i. Moeda ditolong Debata hita, taloe hita do halak Kanaän i. Moeda mabiar hamoe, poeraga ma moesoe i, tapi moeda poeraga hamoe, moesoe i maporoës ma !” ning ia.

Lodja sadjo do Si Josoea na mandok hata i, ma songon na habandolan roha ni halak Israel. Giot didanggoeri halahi noma Si Josoea dohot Si Kaleb, djadi soegari nada diambat Debata, laloe diboenoe halahi. Angke hoem didjempoet halahi dope batoe danggoer-danggoer i, manjorop ma omboen i toe bagas djoro, tanda na doeng ro toe si hasangapan dohot hamoeliaän ni Toehan. Djadi didokkon Debata di Si Moses: „sadia honok nari tarligi Aoe parange ni halak Israel, gonan mate rontjo Hoebaen soede!” ning Ia. Djadi diam-poe Si Moses halahi, dipangido ia oelang langlang pangoesajang ni Debata di halahi. Djadi dioloi Debata do nian, tapi nada tarbaen so hona oehoem halahi. Oehoemna sanga na piga ari tinggal pangkahap i di tano Kanaän, sa i ma bahat ni taon angkon diingani halak Israel halongonan i, toemboek opat poeloe taon do i. Soendoet na mangoloe dompahi, nada djadi masoek toe tano Kanaän, soendoet na ro pe. Hoem Si Josoea dohot Si Kaleb na tola hara ni boerdjoe ni roha ni halahi.

Doeng dipaboa Si Moses oehoem i, boeloes tirdang ma pangkahap na sampoeleoe na mangirang-irangi roha ni halak na torop i. Djadi mabiar ma halak soede, dilodjongi halahi ma sian i toe bandarna be, nada piga na tarpodom saborngin i, habatanna martoengkol isang ma manolsoli diri, dibaen ditangkangi halahi hata ni Si Josoea dohot Si Kaleb.

Torang arina i ditopot halahi ma Si Moses, didok halahi ma: „ma marsala hami toetoe adop Toehan, saonari ra ma hami toe tano Kanaän, ma tadjom sendjatanami,” ning halahi. Ro Si Moses „nada tarbaen be, anggo roha ni Debata, angkon moelak kamoe saonari toe Laoet Aroengan i”, ning ia. Ro halak Israel: „bo songon i, laing kehe do hami mamorangi halak Kanaän i,” ning halahi. Ro Si Moses: „nada dohot aoe, poti parpadanan i pe nada tola dohot, oelang diarop rohamoenoe na marnidok langkamoenoe on,” ning ia.

Laing. kehe do toetoe halak Israel mamorangi halak Kanaän, tapi potang, napodo loesoet mata. ni ari, moelak ma halahi lebak sadjo, angke diajak moesoe i halahi, bahat na mate sadari i.

Torang arina i manaek ma omboen i, na di gindjang ni bagas djoro i, dioeloeon i ma halahi moelak toe halongonan.



## PONGGOL 30.

**Moelak toe halongonan.**

Aha dope, toengki be do panaili ni halak Israel dibaen ilana dohot tolpoekna, na so tola masoek toe tano na nitodo ni roha i. So adong be na niparajak, hoem na hoemadal-kadal sadjo noma di halongonan i hara ni oehoem i.

Djadi adong ma na djoemoengkat roha, na mandjadjang halak na torop, oelang sai dipaolo-oloi halahi hata ni Si Moses dohot Si Aäron. Toloe halak do djodjonangna, Si Korak, Si Daton dohot Si Abiram, dapot halahi ma doea ratoes lima poeloe halak namora-mora dongan ni halahi.

Djadi ro ma dok ni halahi di Si Moses : „na boting ma antong pambaenanmoe, hoem na pasoeroeng diri do ho, angke adop Debata na doeng dos do soede. Didok ko boanonmoe do hami toe tano Kanaän, na djabaran do dadi dohot aer ni loba di si nimmoe, tombom toe na sadarion so adong dope na hami ida, oempe saloepak saba pambaenannami sanga tano santoempoek parkoboenan dilehen ko di hami, aha goenana radja ho !” ning halahi.

Ro aloes ni Si Moses : „ro ma hamoe antjogot toe alaman ni bagas djoro i, diboto hamoe ma, sanga ise dipoeldit Debata oeloean dohot malimmoenoe,” ning ia.

Torang arina i marlagoet ma halak Israel toe alaman ni bagas djoro i, asa tarida ma hasangapan dohot hatongaman ni Toehan, didokkon Toehan ma di Si Moses : „padao ho, Moses ! bope ho, Aäron ! antjo Hoetimpaskon halak Israel soede di na santongkin on,” ning ia.

Djadi marsimora-mora ma Si Moses, ning ia ma : „o Toehan ! sada do na marsala, angkon nioehoem ma he soede ?” ning ia. Ro Debata : „antong, padao ma halak soede sian Si Korak, Si Daton dohot Si Abiram oelang dohot taroehoem,” ning ia. Djadi morot ma halak Israel sian sipanggaori i. Doeng i didokkon Si Moses di adopan ni halak soede : „moeda mate halah on songon na somal djolma mate, peto ma na so disoeroe Debata aoe, tapi moeda mabola tano i laloe dibondoetsa halahon rap dohot bagas dohot barang-barang ni halahi,, peto ma disoeroe Debata aoe,” ning ia. Hoem didok Si Moses songon i, mabola ma tano i toetoe, dibondoetsa ma halak na tolloe i rap dohot bagas dohot barang-barang ni halahi, djadi mago ma di na san-



tongkin i. Hara ni biarna dilodjongi halak Israel noma sian i. Doeng i madaboe ma api, dipangansa ma na doea ratoes lima poeloe halak namora-mora i na saroha dohot na toloe i. Djadi dibaen marmoe-ngoet-moengoet halak Israel hara ni posi ni oehoem i, masa moese ma bala di halahi, manamboes mate.

Asa doeng i dipatangkas Debata moese ma, na nipoelditnia Si Aäron gabe sintoea ni malim. Mangihoetkon pandoknia ro dok ni Si Moses di na tobang-tobang ni na doea bolas marga ni halak Israel i, ganop marga angkon mangalehen sada toengkot di sia. Goar ni margana i angkon nisoeratkon di ganop toengkot, tapi di toengkot ni marga Levi goar ni Si Aäron do baenon toe si. Djadi doeng dibaen halahi songon i, didokkon Si Moses ma : „iabo, madoeng hoedjagit doea bolas toengkot, sian ganop marga sada. Hoepajakkon ma toengkot na doea bolas i di bagas djoro i di djolo ni poti parpadanan i, sanga toengkot ni ise moelak rata, marboeloeng laloe marbatoe antjogot manjogot, nampoenasa i ma na nipabangkit ni Debata gabe sintoea ni malim,” ning ia. Djadi dibaen Si Moses ma songon i.

Torang arina i diligi halahi, bo dapot ma toengkot ni Si Aäron moelak rata, songon dia ma hajoe na mangoloe marboeloeng marbatoe denggan. Djadi longang ma roha ni halak midasa. Djadi dibaen Si Moses ma toengkot i toe bagasan poti parpadanan i, antjo momosan ni halak Israel baen tanda hasaksian dohot parningotan.

Asa marajak salpoe na opat poeloe taon i, bolkas ma halak Israel toe halongonan Sin, donok toe hoeta Kades. Djadi dompak maradian halahi di si, hoerangan aek ma halahi sanoli. Djadi soelpi ma hata ni halahi toe Si Moses hara ni i, djadi hoemolos ma ia toe Debata. Ro dok ni Debata : „paloehoet ma halak Israel soede toe batoe mamak i ; doeng marloehoet di si, pangkoelingkon sadjo ma batoe i, asa mabaor ma aek sian i inoemon ni halahi,” ning ia.

Djadi dipaloehoet Si Moses ma halak Israel toe si, didokkon ia ma : „hamoe halak na tangkang, ligi hamoe, sanga dapot hami aek sian batoe on,” ning ia. Doeng i dilipat ia ma batoe i doea noli, djadi godang ma aek marboeldak-boeldak sian i.

Anggo saoe lak on marsala do Si Moses. Pandok ni Debata, hoem pangkoelingkononkon do batoe i, nada anggo lipatan. Hara ni i hona oehoem ia, ro dok ni Debata toe sia : „dibaen so diparbadi ai ho Aoe di djolo ni halak Israel, nada djadi dohot ho masoek toe tano Kanaän,” ning ia.

Matondo do nian roha ni Si Moses dibaen i, tapi diboto ia moese na lidang do Debata.

Djadi dipangoarkon halahi ma aek i Aek Meriba, astoeanna Aek Parbadaän.

Asa doeng morot halak Israel sian halongonan Sin, bolkas ma halahi toe Dolok Hor. Mate di si ma Si Aäron, sintoea ni malim i. Rosros do roha ni Si Moses marningot angkangnia i, angke laing i do dongannia sian na hinan. Djadi diandoengi halak Israel ibana tolloe poeloe borngin.

Djadi moer donok noma halak Israel toe tano Kanaän. Hoem tano ni halak Edom di holang-kolangna, angke i do torbing balok ni halak Kanaän. Djadi dibaen so dipaloas radja ni tano Edom i diboloes halak Israel tanonia, dioban Si Moses ma halahi sian dalan na mangalit. Djadi diagan halahi na moelak toe halongonan, bo mandele ma halahi, marmoengoet-moengoet ma adop Si Moses, ninna ma: „mangoelahi ma lakna boanonmoe hami toe halongonan, antjo poesa hami di si ? Panganon dohot inoemon so adong, anggo Manna i, na hami pangan sahonokna i, ma biasan hai di si !”

Djadi moeroek ma Debata, marroan ma oelok todoeng api na lobi bahat dibaen Ia, na mamagoeti djolma i. Marragean ma djolma i dibaen bisana. Djadi ro ma halak Israel manopot Si Moses, didok halahi : „tangiangkön ma hami toe Debata, antjo mantak on !” Djadi ditangiangkön Si Moses.

Djadi didokkon Debata di Si Moses : „paeli ma gambaran toembaga ni oelok, baen i toe oedjoeng ni tonggol, pagohon i toe tano i. Barang ise na manatap toe oelok toembaga i, nada bagi mahoea !” ning Ia. Djadi dibaen Si Moses ma songon i.

Toetoe do, sada na manatap toe oelok toembaga i maloem do manigor.

---

### PONGGOL 31.

### Taringot toe Si Bileam.

Barang na sian bariba dia pe giot masoek halak Israel toe tano Kanaän, laing na boloeson do tano ni halak. Djadi doeng bolkas halahi toe Aek Arnon, batas ni tano ni halak Amor, disoeroe Si Moses

ma mangido di Si Sihon radja i, antjo dipatola ia mamoloes tanona i. Haroe diokoe Si Moses pe nada manjimbil sian dalan baloboeng i, manangko sanga mansalong pe nada, laing so ra radja i patolahonsa, hapogan noma ia palagoet halaknia mamorangi halak Israel i. Djadi taloe ma ia, tanona diboeat halak Israel.

Songon i moese ma Si Og, radja Basan, giot mangalo ia, tapi taloe moese, tanona pe dapot ma di halak Israel.

Doeng i maradian ma halahi di Padang Moab di topi Aek Jordan, tontang ni hoeta Jeriko na di tano Kanaän. Djadi bahat ma radja hoemontji-hontji, doeng sar barita na monang i halak Israel.

Djadi adong ma radja Moab, Si Balas goarna, na soen biarna marnida halak Israel. Nada na lajak taralo ia halahi dipingkir rohana, tapi anggo na patoe sadjo, ila dilala ia. Djadi toeboe ma rohania mangalap Si Bileam, na markoeta di loeat Aram, paralemoe godang do i, habiaran ni soede halak. Djadi disoeroe Si Balas ma manopot ibana mangido, antjo ro ia toe tano Moab. Djadi didokkon soeroean i ma di sia : „pangidoan ni radja i, ro ma hamoe djolo toe sadoe i mamoeai halak Israel, angke goemogo do halahi oelang radja i; binoto do, barang ise na nipasoe-pasoemoenoe, martoea ; na niboe-raänmoenoe, mardjaja,” ning halahi. Ro Si Bileam : „di son ma hamoe djolo saborngin on, antjogot pe hoealoesi hatamoenoe i,” ning ia. Djadi borngin i ro ma dok ni Debata toe sia, na so tola oloannia hata ni halak Moab i. Asa doeng torang ari didokkon Si Bileam ma di halahi : „nada diloas Debata aoe dohot, moelak ma hamoe,” ning ia. Djadi moelak ma halahi.

Asa doeng dibege radja Balas barita ni soeroeannia, na so olo Si Bileam dohot, raso ma rohania, hara ni na hoerang mora soeroean i sanga hara ni na hoerang bahat hepeng pangelekna. dibaen ditoelak Si Bileam pangidoannia. Djadi mangoelahi ma disoeroe ia na oembangso dope oelang na pardjolo i, hepeng i pe ditamba ia. Djadi doeng laloe soeroean i, didok halahi ma di Si Bileam : „mantjot bia ma dibaen hamoe antjo dohot, sarohamoenoe ma. Anggo doeng diboerai hamoe halak Israel i, sagodang ni rohania nada djadi so dipatidahon radja i,” ning halahi. Ro Si Bileam : „sagok ni bagasnia pe dilehen radja i sere sanga perak, nada halaosan aoe hata ni Debata, tapi di son ma hamoe saborngin on, ampot ro dope parsoeroe ni Toehan, inda hoepaboa i antjogot,” ning ia. Djadi borngin i ro ma dok ni Debata toe sia : „dohot ma ho, Bileam ! tapi i Hoedok di ho, hoem

i na tola dohononmoe toe halak Israel," ning ia. Torang arina i kehe ma Si Bileam rap dohot soeroean i toe tano Moab.

Djadi tongan-dalan, tongon dompak na mamoloes gonting, ompot nada ra mardalan be halode na nilomboet ni Si Bileam. Djadi dilipat ia halode i, tapi dibaen so adong panjimbilan hara ni hohot ni dalani, montjong-ontjong ma halode i, bo tarkapit ma pat ni Si Bileam di holang-kolang ni boetoeha ni halode i dohot tobing nidalan i. Ahadope, milas ma roha ni Si Bileam, dilontjing ia halode i mangoelahi, tapi moer so ra be halode i mardalan, dipagompang ia moese ma. Asa di na santongkin i malo ma halode i mangkobari hara ni pambaen ni Toehan, ninna ma : „aha de he salangkoe dibaen dilipat ko aoe pola toloe noli ?" ning ia. Ro Si Bileam : „gari maroban podang aoe, ma hoetiham ko mate !" ning ia. Ro halode i : „nada he halcdemoe aoe na nipalomboet-lomboetmi sai honok, djoengada he marparange aoe?" ning ia. Ro Si Bileam : „nada nian," ning ia. Doeng i dipatorang Debata ma parnidaän ni Si Bileam, diida ia ma soeroe-soeroean ni Debata djongdjong di dalan i maniop podang. Djadi mabiar ma Si Bileam. Djadi ro ma dok ni soeroe-soeroean i toe sia : „biasi dilipat ko halodemoe pola toloe noli ? Aoe do na mangolat ko di son," ning ia. Ro Si Bileam : „nada hoeboto antong ho mangolat aoe. Moeda nada toemboek di rohamoe langkangkön, moelak pe djadi do," ning ia. Ro soeroe-soeroean i : „palaloe ma, tapi ingot ma, i Hoedok di ho, hoemi do na tola dohononmoe di halak Israel," ning ia.

Asa doeng dibege radja Balas, na ro ma Si Bileam, dialo-alo ia ma ibana, diambangi ia godang-godang. Torang ari diboan radja i ma ibana toe gindjang ni tor Baäl, harana tartatap ma sian i parbaroeng-baroengan ni halak Israel. Djadi doeng di si, didokkon Si Bileam : „bia ma pambaenkoe mamorai na so hona boera ni Debata, bia ma panjaor-njaorkoe di na so nipanjaor-njaor ni na Sangkiboeng i ! Poendjoeng do bangso Israel on, nada tola dos nietong i dohot halak sisomba begoe," ning ia. Djadi doeng dibege radja Balas hata i, ning ia : „na bia do ho ? Hoesoeroe alap ko mamorai halak Israel, hape dipasoe-pasoe ho !" ning ia. Ro Si Bileam : „nada he dohononkoe na nidok ni Debata di aoe ?" ning ia. Ro Si Balas : „antong, tapaimbar ma hadjongdjonganmi, beta ma toe panindoan na asing," ning ia. Djadi kehe ma halahi toe tor Pisga. Doeng di si, laing hata pasoe-pasoe didok ia. Toloe noli mimbar panindoan halahi, toloe noli ro hata pasoe-pasoe. Djadi gojak ma roha ni Si Balas, didokkon ia



ma di Si Bileam : „nada hasaja be di son ko, angke nada ra ho mam-baen na hoedok, gonan moelak ko !” ning ia. Ro Si Bileam : „nada he hoepabibi hoemani di ho, hoem na nidok ni Debata do dohonon-koe,” ning ia. Doeng i moelak ma Si Bileam.

## PONGGOL 32.

### Taringot toe hamamate ni Si Moses.

Sian soede halak Israel na haroea sian tano Misir, hoem toloe nari noma na mangoloe, Si Moses, Si Josoea dohot Si Kaleb. Ma-doeng taboto, Si Moses pe nada tola masoek toe tano Kanaän, harana dilaosi ia sanoli na nidok ni Debata. Mangasa por ni rohania dipangidohon ia i toe Debata, ning ia : „ale Toehankoe ! ma datdat dipatodahon Ko sangap gogomoe di aoe naposomon, pangidoankoe nian, dohot ma aoe taripar, antjo hoeida tano na denggan i,” ning ia. Ro Debata : „toek ma di Ho na doeng Hoelehen i, oelang be taringoti i di Aoe, tapi manangkok ma ho toe dolok Pisga, tatap ma sian i tano i, angke nada dapotan ko dohot taripar. Doeng diida ho, mate ma ho,” ning ia. Ro Si Moses : „antong, ale Toehan, pangidoankoe pabangkit ma gontingkee, oelang songon biri-biri na so niparmahan halak Israel i,” ning ia. Ro Debata : „olo, pabangkit ma Si Josoea gontimoe, pabotohon ma i di seede halak Israel”, ning ia. Djadi dipabangkit Si Moses ma Si Josoea baen gontinia.

Doeng i mangalehen sipaingot ma Si Moses di na tobang-tobang dohot di halak na torop, ning ia ma : „oelang so holong rohamoenoe di Debata sian soede gogomoenoe, sian soede ate-ate-moenoe dohot sian soede pingkiranmoenoe. Oelang ta'does rohamoenoe sian Debata. Barang ise na padonok dirina toe Ibana, dapotan pasoe-pasoe di soede parkaredjoanna. Barang ise na padao dirina sian Ibana. mardjaja tonan. Ingot hamoe ma na hoepodahon di hamoe. podahon moese ma i di dakdanakmoenoe. Langit dohot tano hoebaen sakingkoe saonari, basa na so oendjoeng dope hatinggalan aoe paboa-hon di hamoe dalan hangoloean dohot hamatean. Poeldit hamoe ma hangoloean i !” ning ia.

Asa doeng sidoeng didokkon Si Moses hatania, manangkok ma

ia toe dolok Nebo lopies toe oedjoengna i, antjo ditatap ia tano Kanaän. Djadi mate ma ia di si. Nada dapot halak Israel bangkena sanga tanomanna, hara ni i didok halahi Debata do mananom ibana. Anggo oemoer ni Si Moses saratoes doea poeloe taon. Lopies tos hosania laing na sior ma matana, gogona pe oempe moerak. Tardok Si Moses ma djolma na soemolkot toe Debata. Di poedinia nada adong be na songon i sahalana.

Djadi diandoengi halak Israel ibana toloe poeloe ari.

### PONGGOL 33.

#### Taringot toe Si Josoea.

Djadi doeng Si Josoea oeloan ni halak Israel, dipaingot ia ma halahi, antjo marrim ni tahi, harana tardok so bahat moesoe i na ro mangalo, moeda masoek toe tano Kanaän. Djadi olo be ma halahi.

Djadi taran so ditaripari halahi Aek Jordan, disoeroe Si Josoea ma doea halak djoemolo mangkahap hoeta Jeriko, hoeta na pardjolo dapot haroroan sian Aek Jordan i. Djadi doeng laloe pangkahap i toe hoeta i, tinggal ma halahi di lopo ni Si Rahab. Dipaoela-oela halahi do nian songon halak na ro mardjagal, tapi laing tarbege di radja ni hoeta i na nitopot ni halahi, disoeroe ia manigor oeloebalangnia manangkoepsa. Djadi didokkon oeloebalang i di anakboroe nampoe-na lopo i : „atehe, di dia do bajo na doea na baroe ro i, paboa, antjo hami tangkoop,” ning halahi. Ro anakboroe i : „toetoe ro nangkin doea halak, nada hoeboto sanga halak dia, tapi madoeng kehe, baroe dope,” ning ia. Ro oeloebalang i : „nada toetoe i, di son dope halahi, hai ligi ma djolo bagasmi,” ning halahi. Djadi diligi halahi, tapi nada dapot halahi bajo na doea i, harana diboenihon anakboroe i halahi di toroe ni baiionnia.

Asa doeng kehe oeloebalang i, dipiohon ia ma pangkahap i, didokkon ia : „angkon moelak dope hamoe borngin on, tapi mondjap hamoe djolo doea sanga toloe borngin on di harangan i, harana didjalahi halahi do hamoe. Doeng i moese, sada na hoepangido, moeda ro hamoe halak Israel mamorangi hoeta on, hoeboto hian do na monang hamoe, angke Debata do donganmoenoe, tapi ibo ma rohamoenoe, pangoloe aoe dohot sisolkotkoe, toembas ni na hoebaen di hamoe

saonari," ning ia. Ro pangkahap i : „anggo i pos ma rohamoe, tapi baen ma tali na rara gantoeng di djandela sian balian, antjo adong tandana di hami," ning halahi. Djadi doeng golap, hatiha sampinodom, midjoer ma pangkahap i sian djandela i, tali do tangga ni halahi, angke di gindjang ni tano bato ni hoeta i do bagas i. Djadi di baritahon halahi ma di Si Josoea bope di dongan i, na doeng hepoet hoemani halak Jeriko.

Aha dope, oembege barita i has ma roha ni halak Israel markobas manaripari Aek Jordan. Djadi doeng laloe halahi toe batang aek i, bo nada tarbолоes, harana tongkon ari nonat, djadi magodang aek i boti na lobi doras. Djadi tolpoek ma roha ni halak Israel.

Djadi ro ma hata ni Debata toe Si Josoea mandok :,mamoengka ma di ari sadarion, pasangaponkoe ma ho, antjo diboto halak Israel, na Hoedongani ho songon na Hoedongani Si Moses na djolo. Dok ma di malim i, dioesoeng halahi poti parpadanan i, asa halahi ma djoemolo masoek toe aek i, doras so doras, hoem dais pe pat ni halahi toe aek i. meroes ma i manigor lopoos marsik. Doeng di tonga-tonga ni batang aek i so ma halahi painte so taripar halak soede, doeng i pe asa tola morot malim, i," ning ia.

Asa doeng taripar halak Israel, dibaen halahi ma doea bolas batoe tanda parningotan di godang ni panolongi ni Toehan.

Na papatoehon hoeta Jeriko i pe, hara ni panolongi ni Toehan do dibaen na momo dapot. Didokkon Debata di Si Josoea, angkon disoe-roe ia halak parangan i mardalan sanoli sadari hoemaliang hoeta i, malim i di djolo mangoesoeng poti parpadanan i. Di djolo ni i pitoe malim na maroban saroene. Dompak na mardalan i, angkon dipaloe halahi saroene i, tapi halak parangan i nada djadi mangkoeling, angkon sip sadjo. Di ari papitoehon i angkon pitoe noli halahi mardalan hoemaliang hoeta i, papitoenolihon i tola ma halak soede marsoerak gogo asa magargar ma tano bato i, talak ma hoeta i, halakna pe patoe ma.

Djadi dibaen halak Israel ma na nidok ni Debata, toetoe di ari papitoehon, doeng pitoe noli mardalan hoemaliang hoeta i, magargar ma tano batona i, masoek ma halahi toe si, djadi diboenoehalahi ma soede na markosa, hoem anakboroe Si Rahab dohot sitondongna nipangoloe. Doeng i disoerboehalahi hoeta i. Sere dohot perak na dapot di si diboeat halahi baenon pandjamaän toe bagas djoro i.

## PONGGOL 34.

**Taringot toe halak Israel, doeng baroe masoek toe tano Kanaän.**

Pir do nian didokkon Debata, na so tola boeaton bagi aha barang-barang ni halak Jeriko, laet adong na mangalaosi hata i. Si Akan do goar ni bajo i. Abit na godang arga, sere dohot perak diboeat ia. Djadi oelang habotoan, dilodjongkon ia na nitangkon ia i toe bandarnia, ditanom ia di si. Boeni pe dibaen ia, moeli moeap do.

Adong ma dompahi hoeta Ai, hoeta na menek, na giot mangalo, djadi disoeroe Si Josoea ma mamorangisa, bo taloe ma hape halak Israel. Lebak sadjo dirasa Si Josoea dohot na tobang-tobang i, sadari laing na gompang ma halahi di tano i hara ni marsakna. Djadi ro ma hata ni Debata toe Si Josoea : „tardok so taloe hamoe saodelak on, harana adong do djajamoenoe. Songon dia ma hadongan an Ae halak na manangko. Angkon djolo dipaorot hamoe panangko i, asa tarbaen Ae donganmoenoe,” ning ia. Djadi dipareso Si Josoea sanga ise i, dapot ma Si Akan. Djadi didokkon Si Josoea di sia : „O Akan! okoe ma salamoe, paboa ma sanga di dia diboenihon ko na nitangkomi,” ning ia. Ro Si Akan : „toetoe marsala aoe, impol matangkoe marnida barang i, nada tarorom be so hoeboeat, djadi hoetanom di bandarki,” ning ia. Djadi disoeroe Si Josoea mangkalisa, dapot ma toetoe barang i. Djadi doeng torang sala ni Si Akan, dioehoem na tobang-tobang i ibana, antjo nidanggoer ia bope donganna sabagas bope barang-barangnia. Djadi mate didanggoer halak ibana. Posi do dibaen oehoem i, antjo mabiar halak toe djoloan on.

Doeng i dioeroepi Debata ma halak Israel mangoelahi, momo noma toendoek soede tano Kanaän.

Sian soede bangso na mangingani tano Kanaän, halak Gibeon ma na oembisoek. Didok roha ni na tobang-tobang ni halahi, nada hasaja nipaälo-alo halak Israel, gonan marale-ale. Djadi disoeroe halahi ma manopot Si Josoea. Abit ni soeroean i abit na boeroek do, panganon na doeng bari hian diboan paoela-oelahon songon na dao na niboloes ni halahi.

Djadi doeng di adopan ni Si Josoea, didok halahi : „santabe di radja i, oelang moeroek djolo radja i, dibaen na hoerang tama haroronami toe adopanta. Di na kehe hami imbaroe dope pakeannami, indahan na hami oban pe baroe nilompa, tapi hara ni daona inda



hasaja be. I pe, parsintaännami oelang so toemboek roha ni radja i bope namora-mora i marale-ale dohot halak kami," ning halahi.

Djadi doeng dibege Si Josoea hata ni halak Gibeon i, martahi ma ia dohot na tobang-tobang i, toemboek ma roha ni halahi marale-ale. Doeng i moelak ma soeroean i.

Asa doeng moer toe tonga an diboloes halak Israel tano Kanaän, hape djolko sadjo do tano Gibeon. Djadi didokkon na tobang-tobang i di Si Josoea : „ma diakali halahi hita, bia ma binaen ! Anggo padan i nada tarsegohon be, atena mangoloe halahi, tapi timbangannami pade ma i taparkatoban halahi," ning halahi. Djadi toemboek ma roha ni Si Josoea songon i.

Asa doeng patoe tano Kanaän i, dibagi Si Josoea ma i, di ganop marga ditoedohon ia loeat ingananna, bagas djoro i totop do dibaen di hoeta Silo.

Djadi doeng marondjolan marga ni halak Israel di loeatna be, dipiohon Si Josoea ma halahi toe djolonia, antjo marsipaingot ia di halahi. Djadi didokkon ia : „hamoe dongan ! na tobang-tobang bope sitoean na torop, na godang dohot na menek, oelang paihoet-ihoet kamoe halak na manjomba begoe. Dok kamoe saonari, sanga ise oloan-moenoe, Debata sanga begoe. Anggo di aoe dohot di dongan sabagas-koe, Toehan Jahowa do oloannami," ning ia. Djadi rim ma aloes ni halak: „hami pe, Toehan Jahowa do oloannami." Djadi disoerat-kon Si Josoea ma i toe poestaha, dibaen ia moese batoe na bolon di toroe ni haroeaja na di lamboeng bagas djoro i, didokkon ia : „batoe on ma hasaksian toe djoloan on, na so ra hamoe maning-galkon Debata," ning ia.

Nada piga dan doeng i, mate ma Si Josoea, saratoes sampoele taon ma oemoernia.

---

## PONGGOL 35.

### Taringot toe Si Gidion.

Asa doeng sonang di loeat dohot hoetana be halak Israel, tar-baen halahi ma marsaba, markaoema sanga markoboan. Di moelana i laing oemolat ma halahi sian halak Kanaän, nada marbaoer dohot sisomba begoe i. Doeng mate pe dongan sasoendoet ni Si Josoea, asa

moer langkot roha parbegoe, tarihoet ma halahi di na manjomba begoe i. Tiboe do tarkilala rimas ni roha ni Debata hara ni i, angke masa ma hamoesoeon, markantjit ma halahi. Doeng soen hantjitna, manolsoli ma halak Israel, moelak disomba halahi ma Debata na sasada i. Djadi ibo ma roha ni Debata, dilehen Ia ma halak na poeraga mangoeloehon halak Israel i mangalo moesoe i. Halak na songon i, didok ma oeloebalang sanga paroehoem.

Apala na hoemantjit, pambaenan ni halak Midian do, djabat mang-oeraba halak Israel. Dohonon ganop tongkin ro halak Midian mamoehar sanga manjoerboe hoeta i, pangisina dipangoes halahi. Na djoemotdjot ro moesoe i di hatihasabion mangkoroessoede. Adong ma salapan toe na pitoe taon na masa na songon i, moer so tartaon be, diingot halak Israel ma Debata, djadi sian ibo ni rohana dipatoepa Ia halak na malo parim tahi mangalo moesoe i, Si Gidion, ma goar ni bajo i. Saoelak ro ma soeroe-soeroean ni Debata toe Si Gidion, didokkon ia : „didongani Debata ma ho, ale oeloebalang na poeraga!” ning ia. Ro Si Gidion : „doeng na toetoe ma Debata dongannami, biasi masa parkantjitan di hami ? Di dia ma tarida tanda hahomangan na binaennia na hinan songon na nibaritahon ni ompoenami,” ning ia. Ro Debata : „kehe ma ho di bagasan gogomon paloeahon halak Israel sian tangan ni moesoe halak Midian i,” ning ia. Ro Si Gidion „iale Toehan, bia ma panolongingkoe di halak Israel, apala hami na sahorong ma na so margogo, aoe boese dope na oemmenek hami saparkahamaranggion !” ning ia. Ro Debata : „baen ma na Hoedok, Aoe do donganmoe,” ning ia. Doeng i sada ma roha ni Si Gidion.

Djadi adong ma parkaoelan na margana-ganaän donok toe hoeta ni Si Gidion, parsombaän ni halak, na nipadjongdjong ni amangnia. I ma djoemolo diroempak ia. Torang ari diida halak hoeta i na ni-roempak gana-ganaän begoe Baäl i, dipareso halahi, sanga ise mambaen i, dapot ma Si Gidion. Djadi didok halahi di amangnia ; „anakmoe do hape mambaen i, boan ia toe son, antjo hami boenoe!” ning halahi. Ro amangnia : „ra ma hamoe marbada hara ni begoe Baäl i ? Na oto ma hamoe ! Moeda toetoe Debata ia na margogo, ia ma mam-balossa toe anakki, indangkon hamoe !” ning ia. Djadi tarkohom ma halahi.

Asa nada sadia lolot doeng i, ro ma halak Midian i marmoesoe, djadi soesoer ma Tondi ni Debata toe Si Gidion, dipalagoet ia ma halak Israel, sada na margogo toe porang. Djadi mangido tanda

ma ia toe Debata, na papos rohania laho toe porang i, ning ia ma : „moeda toetoe dongan nami Ho, ale Toehan, hoepajakkon ma bobak ni biri-biri di tano i borngin on, moeda hoeligi antjogot manjogot, dapot aoe bobak i marnamboer, tano i hoemaliang nada, tanda ma i di aoe, na doeng peto dongannami Ho,” ning ia. Djadi dibaen ia ma songon i. Torang ari diligi ia, toetoe marnamboer bobak i, tano i hoemaliang nada. Diporo ia bobak i, dapot ia aek sasambong. Djadi antjo sada rohania, didokkon ia toe Debata : „o Toehan, oelang djolo moeroek Ko di aoe, saaelak nari ma hoepajakkon bobak ni biri-biri i, djadi on ma pangidoankoe, moeda hiang bobak i, tano i marnamboer hoemaliang, sonang ma rohangkoe,” ning ia. Djadi dioloi Debata moese. Torang ari diligi ia, dapot ia ma bobak i hiang, tano i maraek haliang.

Asa doeng i langka ma ia rap dohot dongannia mangalo moesoe i, adong ma halahi toloe poeloe doea riboe halak. Djadi ro hata ni Debata toe sia: „ma bahat toe do hamoe, ra didok hamoe, hara ni bahatmoenoe na maporoes moesoe i, soeroe moeli angka na mabiar i,” ning ia. Djadi adong ma doea poeloe doea riboe halak na moeli. Doeng i ro mangoelahi hata ni Debata : „laing na ma bahat toe dope hamoe ! Pili na doemenggan i, songon on ma pamilina baen : sada na manjaoek aek i moeda minoem ia, painding manigor ; sada na manosop songon horbo, painding moese,” ning ia. Djadi adong ma toloe ratoes halak na manosop songon horbo di na minoem i. Djadi didokkon Debata : „markite-hite na toloe ratoes i pasahatonkoe halak Midian i toe tanganmoe, na asing i soeroe moeli,” ning Ia. Djadi dibaen Si Gidion ma songon i.

Asa doeng i kehe ma Si Gidion mangaligi moesoe i, diboan ia doea sanga toloe halak dongannia. Djadi dapot ia moesoe i maradian di padang na hornop. Na lobi bahat halahi songon halilinge tonan. Djadi dipainte Si Gidion loepoes golap, antjo dipadonok ia toe si. Doeng golap manjoeroek-njoeroek ma ia rap dohot dongannia loepoes donok sitoetoe, manangi-nangi ma ia di parik ni bandar ni moesoe i, tongkon marsipaboahon nipina be halahi dibege ia. Adong ma na mandok : „taloe do hita antjogot da, dibaen halak Israel! sambor do nippingki !” ninna. Ro na mangaloesi : „aoe pe songon i do ! Podang ni Si Gidion tangkas hoeida,” ninna. Djadi diboto Si Gidion ma, na doeng hepoet hoemani halak Midian i.

Asa doeng moelak Si Gidion toe dongannia, dibaen ia ma halak-

nia na toloe ratoes i toloe toempoek, antjo sian toloe bariba ro halahi mandapotkon moesoe i. Djadi dilehen ia di halahi be saroene sada, hoedon tano sada dohot hedje sada soemboengonkon toe pamangan ni hoedon nangkinan i. Djadi didokkon Si Gidion di halahi: „tonga borngin anon, moeda sampinodom, langka hita. Rap masoek hita tompoe-tompoe toe inganan ni moesoe i. Moeda hoepaloe saroenengkoe dibege hamoe, paloe hamoe moese ma saroenemoenoe. Doeng i marsita-porkon hoedonta be ma hita antjo soen gaorna i, marsoerak moese ma hita gogo mandok : „podang ni Toehan dohot Si Gidion !” ning ia. Djadi dibaen halahi ma songon i. Djadi tarkanjongnjong ma moesoe i, hara ni gaorna bope hara ni tompoena nada diboto halak Midian, sanga dia djoemolo baenon. Djadi maporoes ma halahi.

Doeng i nada poeloek be halak Midian mamorangi halak Israel. Djadi doeng moelak Si Gidion dohot dongannia sian na mangajak moesoe i, giot dipabangkit halak Israel ma ibana djadi radja, tapi nada toemboek rohania, ning ia: „oelang songon i, dongan! Debata do radjamoenoe.”

---

## PONGGOL 36.

### Taringot toe Si Roet.

Adong ma na djolo, sindorang di na itom na robi, halak na margoar Si Elimelek, na maringanan di hoeta Betlehem di loeat Joedea. Si Naomi do goar ni sorangannia, doea do anaknia Si Maklon dohot Si Kildjon. Djadi masa ma haleon potir, toeboe ma roha ni Si Elimelek boengkas toe tano Moab, harana didok rohania mangoloean do halahi di si oelang di hoeta Betlehem. Djadi boengkas ma halahi toe si.

Asa nada sadia honok doeng di tano Moab, mate ma Si Elimelek. Djadi mardomoe ma tahi ni Si Naomi dohot anaknia na doea i tinggal di si. Doeng i mamboeat boroe ma Si Maklon dohot Si Kildjon. Si Orpa do goar ni boroe na bineat ni Si Maklon. Si Roet goar ni boroe na bineat ni Si Kildjon. Djadi adong ma sampoele taon, mate moese ma anak ni Si Naomi na doea i, rap matilpok di harapotan, hoem Si Naomi noma tinggal dohot paroemaennia i. Djadi dibaen so adong be na mamareso halahi di tano Moab, didok roha ni Si Naomi, gonan ia moelak toe Betlehem toe kahangginia i.



Asa doeng di tongan-dalan, ro ma hata ni Si Naomi toe paroemaennia: „aha ma he labona dohot hamoe markantjit di sadoe i, moelak ma hamoe toe kaoemmoenoe, angke na so adong be hoeboto na lajak ra paoelihon hamoe. Betak tarbaen hamoe dope marbagas di tano hagodanganmoenoe i. On pe da, maen ! nada tarbalos aoe holong ni rohamoenoe toe na kehe i, Toehanta ma mambalossa di hamoe. Anggo aoe na siak panamoean, hoetaonkon pe soedena i, bagiankoe noma i dibaen Debata,” ning ia. Djadi gogo toematangis bope mangandoeng paroemaennia i, didok halahi ma : „o namboroe, nada ra hami sirang sian ko, dohot do hami toe sadoe i !” ning halahi. Ro Si Naomi : „aha ma hasajana manamba-nambai marsak, moelak ma hamoe,” ning ia. Djadi mangoelahi mangandoeng ma halahi. Doeng i dioemma djana didjalang Si Orpa ma namboroenia, djadi moelak ma ia. Anggo Si Roet, nada tartinggalkon ia namboroenia, ditiop ia ibana togoe-togoe. Djadi ro Si Naomi : „madoeng moelak angkamoe, gonan diihoetkon ko !” ning ia. Ro Si Roet : „iale namboroe, oelang be dok moelak aoe, sanga toe dia ho, toe si aoe ; sanga di dia hoetamoe, di si hoetangkoe ; bangsomoe bangsongkoe, Debatamoe Debatangkoe,” ning ia. Doeng diida Si Naomi na songon i roha ni paroemaennia, nada diantak ia be, djadi rap ma halahi toe hoeta Betlehem.

Asa doeng bolkas toe si, nada didjangka halak be Si Naomi, harana ma moeba sadjo tompania hara ni bahat ni pardangolannia i, pola ro hata ni ina-ina : „ile baja, i de he Si Naomi na hinanan ?” Djadi harkar ma sipareon ni Si Naomi, didokkon ia : „oelang be dok hamoe aoe Si Naomi, Si Mara noma goarkoe toe poedi on, angke songon on ma iba hadonsaon. Bahat na paet na barnit dibaen Debata toe aoe, gabe do aoe na kehe i, dangol dipaoelak Debata aoe toe son,” ning ia.

Djadi maringanan ma Si Naomi rap dohot paroemaennia di hoeta Betlehem markantjit-kantjit. Na padot do Si Roet, na ringgasan mangomo marbabo sanga mardege. Moeda hatiha sabion kehe ma Si Roet toe saba ni halak mamoeai hajoe ni eme, na marderetan dibaen na manjabi i. Anggo hasomalan ni halak Israel i, moeda halak namora, parsaba na bolak, diloas ia ro na pogos toe sabania di sabion i paloehoetkon hajoe ni eme, na marderetan i, boannonnia moeli. Nada digorahon panjabi i, angke toempoek ni na pogos do i.

Djadi dompak mamoeai hajoe ni eme Si Roet di saba ni Si Boas, ro ma nampoena i toe si mangaligi na manjabi i. Djadi disapai ia

ma sanga ise anakboroe i na mamoeai eme di sabania i. Ro na manjab i : „i ma Si Roet, boroe Moab i, paroemaen ni Si Naomi. Dipangido ia mamoeai eme na deret i, hami loas. Na ringgasan ia, nada marnalodja ia sian na sogot lopoos saonari,” ning ia.

Djadi dipangkoelingkon Si Boas Si Roet, didokkon ia : „indangkon toe saba ni halak ko, inang, di sabangkon pe ho paihoet-ihoet na manjab i. Moeda male sanga mangoeas ko, adong do na nipaoeli di sopo an, pangido ma toe si,” ning ia. Ro Si Roet : „nada hoeboto dohononkoe mangasa ibo ni rohanta di aoe boroe dagang on,” ning ia. Ro Si Boas : „madoeng dipaboa halak di aoe denggan ni rohamoe adop namboroemoe markajahon ibana. Dibalos Debata ma i toe ho, inang !” ning ia. Doeng i dihoesipkon ia di na manjab i : „sanga di dia giotna mamoeai, oelang gorahon. Oentil deretkon oembahat,” ning ia. Djadi marajak potang ari mantak ma Si Roet, antjo djabat didege ia dope na nipamoeaännia taran so moeli. Djadi disoehat ia, dapot ia lobi saharoeng godang. Djadi doeng diida Si Naomi eme i didokkon ia : „bahat ni eme i da dapot ho ! Mamoeai di saba ni ise ho nangkin?” ning ia. Ro Si Roet : „di saba ni Si Boas !” ning ia, djadi dipaboa ia moese na nidokkon ni Si Boas. Ro Si Naomi : „di-pasoe-pasoe Debata ma halahi. Halahi ma na waris di hita,” ning ia. Djadi opoes simpoel sabion i, laing toe saba ni Si Boas ma Si Roet. Asa doeng simpoel sabion i, dipaboa Si Naomi di Si Roet parsolkotna toe Si Boas. Djadi didokkon ia moese : „dibaen na waris halahi di hita, patoet dipaoeli halahi ho, maen ! Tama aropkoe tasoenggoel i, betak na so toe si dope roha ni halahi,” ning ia. Ro Si Roet : „aropkoe pe te he, sanga na dia ma haenonkoe nimmoe, hoebaen pe,” ning ia. Ro namboroenia : „antong mamake ma ho, topot ma halahi, hoem niida pe ho, ra diingot halahi,” ning ia. Doeng i kehe ma Si Roet manopot Si Boas mangkoloskon dangolnia, didokkon ia ma : „dibaen na ro aoe toe son, mangido ibo ni roha do aoe harana hamoe do nampoena aoe,” ning ia. Ro Si Boas : „toetoe do nian na nidokmi, tai adong dope na soemolkot oelang aoe. I do dibaen na hohom aoe sahonokna. On pe, pot so giot ia di ho, aoe paoelihon ko. Moelak ma ho saonari, sigop pe hoepareso. Boan ma dahanon saotik, siloeangkoe di namboroemoe, tanda ni denggan ni rohangkoe,” ning ia. Doeng i moelak ma Si Roet, dibaritahon ia i di namboroenia. Ro namboroenia : „antong, tapainte ma, maroedjoeng ne ma da hata i,” ning ia.

Djadi dipareso Si Boas ma na nidokkon ni Si Roet. Dompak mar-

lagoet na tobang-tobang ni hoeta i di sopo godang i, diboan ia ma na waris i toe si, dipatimbangkon ia ma hata i. Djadi didokkon Si Boas di waris i: „dibaen adong dope paninggalan ni mandiang kahangginta Si Elimelek, ra do ho paoelihon i?” ning ia. Ro waris i: „ra do aoe,” ning ia. Ro Si Boas: „pade, tai moeda songon i angkon dipatoehintjat ko Si Roet,” ning ia. Ro waris i: „anggo songon i pangalahona, nada olo aoe be, sahat toe ho noma i,” ning ia. Ro Si Boas: „toe aoe pe djadi, tapi hamoe na tobang-tobang di hoeta on, ma dibege hamoe, na doeng ditoelak halahanon paninggalan ni mandiang Si Elimelek toe aoe. Saonari hoeparsaksihon ma i di hamoe,” ning ia. Ro na tobang-tobang i: „olo, saksimoenoe ma hami, sai dipasoe-pasoe Debata ma hamoe bope boroe i, na giot ro toe bagasmoenoe,” ning halahi.

Asa boti ma panoembas ni Debata di denggan ni roha ni Si Roet.

### PONGGOL 37.

#### Taringot toe Si Eli dohot Si Samoeël.

Na doeng hasomalan do i di halak Israel, barang ise na adong pangidoanna di Toehan, ditopot ia bagas djoro i na di hoeta Silo marsombahonsa.

Djadi adong ma halak hoeta Ramataim, na margoar Si Elkana, doea do soranganna, Si Panina dohot Si Hanna. Anggo Si Panina bahat do anak dohot boroenia, tapi Si Hanna nada markaoentoe-ngan. Djadi pis do mata ni Si Panina adop Si Hanna, datdat dipapatar ia lajas ni rohana. Djadi sai na madaboe doea madaboe toloe iloe ni Si Hanna, tapi hara ni lambok dohot pohom ni rohana nada dialoesi ia i. Djadi ganop taon kehe Si Elkana toe hoeta Silo marsomba toe Toehan, tong do dohot Si Hanna hoemoloskon dangolnia i. Djadi saaelak dampak di si ia, singgang ma ia marsomba toe Toehan, ning ia ma: „o Toehankoe, moeda na asi rohamoe di aoe, patoeloes ma pangidoanki, oelang so adong anakhoe nian. Moeda dilehen Ko i di aoe, sorpaonkonkoe do ibana toe Ho, matoea ia oloannia ma Ho di bagasmon,” ning ia. Djadi dampak na martangiang i, ro ma Si Eli, sintoea ni malim i, toe si. Djadi dibaen hoem moebit-oebit Si Hanna, nada bagi na loeas sorana, diambang Si Eli na maboek do anakboroe i.

Djadi disonggak ia Si Hanna, ning ia : „nada he maila ho maboek di bagas na badia on ? Andigan ma tarkalak ko ? Djongdjong ko, antjo kehe ho !” ning ia. Ro Si Hanna : „nada bagi na maboek aoe, toean ! Na hoemoloskon dangolki do aoe toe son. Oelang didok rohamoe dadaboroe na djahat aoe,” ning ia. Ro Si Eli : „antong moeda songon i do hapeng, denggan ma i, inang! moelak ma ho, ibo roha ni Toehan, dilehen ia ma pangidoanmi”, ning ia. Doeng i moelak ma Si Hanna. Djadi adong ma sataon, sorang ma toetoe dakdanaknia halak lahi, Si Samoeël dibaen ia goarna, astoeanna : na hoepangido di Toehan. Djadi doeng godang dakdanak i, diboan Si Hanna ma ibana toe hoeta Silo, didokkon ia di Si Eli, sintoea ni malim i : „ale toean, aoe do anakboroe i, na nigorahonmi na djolo. Madoeng toe- loes pangidoankoe, ma dilehen Debata anak di aoe, on ma ibana. I pe, hatangkoe na djolo sorpaonkonkoe do ibana toe Toehan, saonari na pasahatkon ibana ma aoe di hamoe, antjo rap dohot hamoe ia mangoloi di bagas djoro on,” ning ia. Ro Si Eli : „denggan ma i, inang, tinggal ma ia di son rap dohot aoe,” ning ia. Doeng i moelak ma simatobang ni Si Samoeël.

Lomo do roha ni Si Eli marnida dakdanak i hara ni todasna. Adong do nian anak ni Si Eli doea, Si Hopni dohot Si Pinihas, na doeng marripean, tapi nada haroe toere parange ni halahi. Siloea na nioban ni halak toe bagas djoro i, diagohon halahi djadi hodar hamalimon i dibaen halahi. Nada masoek sipaingot ni Si Eli toe halahi, hoerang pir didokkon ia i, ma lambok toe rohania, nada malo ia moeroek.

Djadi saelak borngin, dompak modom Si Samoeël, tarsoenggoel ma ia hara ni adong na mamio ia, diagan ia Si Eli do i. Djadi kehe ma ia toe bilik ni Si Eli, ning ia: „aha lakna dibaen dipiohon ko aoe?” Ro Si Eli : „nada hoepio ho, amang, modom ma ho,” ning ia. Hoem pajak Si Samoeël, mangoelahi ro sora i pio-pio : „djo Samoeël ! djo Samoeël!” ninna. Djadi mangoelahi disapai ia Si Eli. Ro Si Eli: „nada hoepio ho, amang, modom ma ho,” ning ia. Patoloenolihon ro sora i, patoloenolikon diligi Si Samoeël Si Eli. Djadi markoesari ma Si Eli, mangarti ma ia, nadadjolma na mamio Si Samoeël, Toehan do i. Djadi dipodai ia Si Samoeël, ning ia : „moeda mangoelahi dibege ho sora i, on ma dok : paboa ma, ale Toehan, na manangihon do naposomon.” Djadi doeng mangoelahi ro sora i, ning Si Samoeël ma : „paboa ma, ale Toehan, na manangihon do naposomon,” ning ia. Djadi ro ma



pandok ni Debata : „oehoemonkoe do Si Eli dohot anaknia, harana so djoengada barnit bohinia adop halahi. Na lobi djat do parange ni halahi. Paboa ma i di Si Eli, antjo diboto ia hian,” ning ia. Torang ari patoerehon karedjona ma Si Samoeël songon soeat na ari, tapi hohom-kohom do ia, angke alang do rohania paboahonsa. Djadi disapai Si Eli ma ia : „aha de he na nidok ni Debata di ho borngin on ? Oelang boenihon i adop aoe,” ning ia. Djadi dipadjodjor Si Samoeël. Ro Si Eli : „Ia do Toehan na koeaso, dibaen Ia ma toemboek ni rohana,” ning ia.

Hatiha i masa ma hamoesoeon, diporangi halak Pilisti ma halak Israel, djadi dibaen marpoepoe taloe halak Israel, ro ma hata ni na tobang-tobang i : „bia taboan poti parpadanan i laho mangalo moesoe i, betak monang do hita,” ning halahi. Djadi dialap Si Hopni dohot Si Pinihas poti i, diboan halahi toe porang i. Dibaen na matobang Si Eli nada dohot ia, sambilan poeloe salapan taon oemoernia boti pe nada haroe marnida be, tapi ari-ari djoegoek ia di lamboeng horbangan ni hoeta i painte-intehon barita taringot toe porang i. Moeda diingot ia poti na badia i, hoemitir ma ate-atenia.

Djadi saaelak ro ma halak marlodjong toe hoeta i maroban barita na djat, eroek ma halak oembegesa. Djadi disapai Si Eli ma : „aha do na masa, dibaen na eroek halak di hoeta on ?” ning ia. Ro na maroban barita i : „oelang tarsonggot rohamoe, madoeng taloe hita. Di moelana i hoem diida halak Pilisti poti parpadanan i, soemoeroet ma halahi, tapi moelak pir ma roha ni halahi, djadi taloe ma hita. Marpoeloeriboe do dongan mate, anakmoe pe mate doea-doea, dohonon sasada aoe do na maloea. Na oemboting dope, poti parpadanan i ditaban moesoe i, dioban ia laloe,” ning ia. Djadi tarkalomong ma Si Eli, madaboe ma ia singgalak sian djoegoehannia, maripoek ma roengkoengnia laloe mate di na santongkin i.

Hira-hira pitoe boelan ditahan halak Pilisti poti parpadanan i. Harana hoem na maroban djaja tonan do i di halahi, ragam bage masa hasoesaän, angka bala ni djolma dohot pahan-pahanan, ra ma halahi paelakkon poti i. Intap ni i laing di toroe ni parenta ni halak Pilisti ma halak Israel, doea poeloe taon honokna. Djadi hoemos ma halahi di Si Samoeël, na manggonti Si Eli. Ro Si Samoeël : „nada ra Debata manolong hamoe, moeda so dipaorot hamoe gana-ganaän i sian tonga-tongamoenoe. Paoeba hamoe djolo rohamoenoe”, ning ia. Djadi dipaorot halahi ma gana-ganaän i, disomba halahi ma

Debata na sasada i. Doeng i pe asa dipalagoet Si Samoeël halak parangan i, dioeloehon ia mangalo halak Pilisti i djadi monang ma halahi, Djadi dipadjongdjong Si Samoeël ma batoe toenggol, tanda parningotan, di parbalohan ni tano Kanaän dohot tano Pilisti. Digoar ia ma batoe i : Eben Haëser, astoeanna : lopees toe on ditolong Debata hita.

## PONGGOL 38.

### Taringot toe Si Samoeël dohot Si Saoel.

Doeng matobang Si Samoeël dipabangkit ia anaknia paroehoem, tapi hara na hoerang pade narohaon ni halahi, ro namora-mora ni halak Israel manopot ibana mandok : „ma matobang kamoe, anak-moenoe, na nipabangkitmoenoe na baroe on, hoerang tama antong manggonti hamoe, pangidoannami, pabangkit ma sada djadi radja di hami, antjo dos moese hami dohot angka bangso na hoemaliang kita, na doeng adong radjana be,” ning halahi. Djadi tarkohom ma Si Samoeël, harana nada pade dibege ia bata i, timbangannia hoem Debata do na patoet Radja ni halak Israel. Djadi ro ma dok ni Debata toe sia ; „baen ma na nidok ni halahi, angke nada ho diam-boengkon halahi, Aoe do,” ning ia.

Asa adong ma dompahi halak na margoar Si Saoel, anak ni Si Kis, marga Benjamin, na gindjang na bolon, sandjongkal ma hagindjanganna sian halak soede. Djadi mago ma saoelak halode ni halahi, disoeroe Si Kis ma anaknia Si Saoel rap dohot naposonia sada mandjalahisa. Lodja halahi mandjalahi, laing so dapot, ro ma dok ni Si Saoel toe dongannia : „beta moelak kita, nada dapot be halode i, moer didok roha ni amanta moese ma na dohot hita mago,” ning ia. Ro dongannia : „pade, tapi bia sian hoeta Rama hita, adong di si halak na margoar Si Samoeël, na doeng tarbonggal solkot ni rohana toe Toehan, tasapai ia, betak diboto ia, sanga didia halodenta i,” ning ia. Ro Si Saoel : „aha salana, tasapai pe djadi,” ning ia.

Djadi doeng bolkas toe hoeta Rama i, padoempang ma halahi dohot Si Samoeël di horbangan ni hoeta i, nada diboto halahi. Djadi disapai Si Saoel ma ibana : „dia do bagus ni Si Samoeël ?” ning ia. Ro Si Samoeël : „aoe do ibana, rap ma hita sadari on, antjogot pe

ho moelak, doeng mangkobar kita. Taringot toe halode i, indangkon be soesa rohamoenoe, harana madoeng dapot. On pe, soede na mararga di tano Israel ise do nampoenasa ? Nada he ho dohot hamoe saparkahamaranggion ?” ning ia. Longang do nian roha ni Si Saoel oembege hata i, nada diboto ia na nidokna i, djadi sip ia. Dalanna didok Si Samoeël songon i, madoeng dipaboa Debata hian di sia na giot ro ma halak manopot ia na tama baenon radja. Djadi di na padoempang halahi, dipatorang Debata ma di Si Samoeël, basa i ma ibana.

Djadi tinggal ma Si Saoel di bagas ni Si Samoeël. Torang ari dioban Si Samoeël ma ibana toe balian ni hoeta i, doeng di si diboeat ia ma tandoek, na marisi miak na niobannia sian hoeta, dioeschon ia ma miak i toe oeloe ni Si Saoel, didokkon ia: „on ma tandana, na doeng dipabangkit Debata ho djadi radja ni halak Israel,” ning ia. Doeng i moelak ma Si Saoel dohot dongannia. Asa doeng di bagas, dipadjodjor Si Saoel do nian lodja ni halahi bope na marborngin i di bagas di Si Samoeël, tapi parkaro haradjaän i nada dihobar ia, harana didok roha nia, nipainte ma djolo ari na toemboek di roha ni Toehan pabotohonsa di halak.

Nada sadia lolot doeng i dipalagoet Si Samoeël ma halak Israel di hoeta Mispa antjo dipaboa ia, sanga ise na nipili ni Debata baenon radja. Djadi disoeroe ia halahi mardadoe hara ni i, asa binoto marga dia dohot horong ni ise na nitoedoe. Djadi dapot ma haradjaän i di Si Saoel. Anggo Si Saoel, nada di si ia dompahi, na mondjap do ia. Djadi dialap halahi ma ibana, hoem ro, marsoerak-soerak marolop-olop ma soede pahoras radja baroe i. Adong do nian sada-sada na mangiboeroe, tapi habahatanna martoemboek ni roha do.

Doeng i dioeloehon Si Saoel ma halak Israel mamorangi halak Amon, monang ma halahi, mari-ari ma godang roha ni halak mida ibana.

Doeng i dipabolkas Si Samoeël ma tona ni Debata di Si Saoel, didokkon ia, „palagoet ma mangoelahi halak Israel mamorangi halak Amalek, doeng monang, boenoe soede halahi, bo radja bo na torop, dohot moese pahan-pahanan i, poesa baen,” ning ia. Doeng i kehe ma Si Saoel dohot parangan ni halak Israel mamorangi halak Amalek, monang ma halahi, diboenoe halahi do soede halak Amalek, hoem radjana i nipangoloe. Pahan-pahanan i pe diripaskon halahi do, hoem lomboe dohot biri-biri na doemenggan i dipangoloe halahi, antjo a-

dong sihaoelkononkon toe Toehan. Djadi laho moelak sian parporangan i padoempang ma halahi dohot Si Samoeël. Djadi didokkon Si Saoel ma di sia : „madoeng hoepatoeloes na nidok ni Debata,” ning ia. Ro Si Samoeël : „moeda peto dipatoeloes ko, lombue ni ise do hoebege marmoa, biri-biri ni ise marmehe ? ” ning ia. Ro Si Saoel : „i ma tabannami, na hami pangoloe, antjo adong sihaoelkononta toe Debata,” ning ia. Djadi moeroek ma Si Samoeël, didokkon ia : „hape na marroha diri do ho, biasi nada dioloi ho hata ni Debata ? Doemenggan do na mangoloi sian na markaoel ! I pe, diamboengkon ko Debata, antong, Debata ma mangamboengkon ko, nada tola be radja ho”, ning ia. Ro Si Saoel : „toetoe marsala aoe, tapi hara ni songkal ni halahanon hoeihoetkon roha ni halahi. Oelang paila aoe, oelang tinggalkon aoe,” ning ia. Ro Si Samoeël : „angkon kehe do aoe, dibaen diapasi ho hata ni Debata,” ning ia.

Djadi laho kehe Si Samoeël ditangkoep Si Saoel abitnia, masibak ma i dibaen i, djadi ro Si Samoeël : „songon i do disibakkon Debata haradjaän i sian ko,” ning ia. Doeng i kehe ma ia, intap ni i nada marsipangkoelingan sanga marsipaidaän be halahi. Tarida moese na so didongani Debata be Si Saoel, marsala-salaän do soede karedjonia, hasonangannia pe moer mago, djat ni roha moer tarida.

---

## PONGGOL 39.

### Taringot toe Si Daoet.

Mansai marsak do roha ni Si Samoeël, dibaen ditinggalkon Si Saoel Debata. Hara ni i ro hata ni Debata toe sia mandok, „oelang sai di si be rohamoe ! Madoeng Hoepili na manggonti ibana. Kehe ma ho toe hoeta Betlehem, adong di si halak na margoar Si Isai, anak ni i ma baenonkoe radja,” ning ia. Djadi kehe ma Si Samoeël toe si. Oelang raso roha ni Si Saoel, mamoenoe lombue ma ia di si baen haoel toe Toehan. Doeng simpoel mangan, dipiohon ia ma Si Isai dohot anaknia. Djadi doeng diida Si Samoeël anak siangkaän i, didok rohania, i ma na tama hara ni bolonna dohot denggan ni tompana. Hape dipintjang Debata ma ibana, ning Ia : „nada ibana i ! Oelang ligi tompa sanga bolon ni pamatang. Djolma mangaligi tompa, Debata mangaligi roha.”



Doeng i ro ma na nitadohon ni i, i pe nada ibana! Songon i ma lima nari anak ni Si Isai ro toe adopan ni Si Samoeël, nada adong dope na toemboek di roha ni Debata mandjoedjoeng haradjaän i. Djadi disapai Si Samoeël ma Si Isai : „on do anakmoe soede?” ning ia. Ro Si Isai : „adong dope sada nari, sianggian i, Si Daoet goarna, tapi di padang i do ia noeaeng marmahan biri-biri,” ning ia. Ro Si Samoeël : „soeroe alap kamoe,” ning ia. Djadi dialap halahi. Hoem ro ia, didokkon Debata ma di Si Samoeël : „on do ibana! Bocat ma tandoek parmahan i, miahi ma ibana. harana ia do na tama radja”, ning ia. Djadi dimiahi Si Samoeël ma Si Daoet.

Hatiha i dodas do Si Daoet toe bagus na godang hara ni radja Saoel. Doeng maralo radja Saoel dohot Si Samoeël, moer liloe ma pingkiran-  
nia, pasoe-pasoe ni Debata pe ma morot sian ia, hoehoel sego akalnia laloe pasik. Manjorpc-njorpo do pasiknia i; moeda manjorpo, taroe na so hatahanan be ia, tapi moeda nipaloe arbap sanga hasapi, moelak so ma rohania, mago ma rintiknia i. Djadi Si Daoet ma sada na loemo mamaloe na songon i, hara ni i ganop tongkin nisoeroe alap ia.

#### PONGGOL 40.

#### Taringot toe Si Daoet dohot Si Goliat.

Hatiha i masa ma mangoelahi porang ni halak Israel dohot halak Pilisti, martontangan ma halahi paipar-ipar roera. Djadi adong ma oeloebalang ni halak Pilisti na margoar Si Goliat, na gindjang na bolon, gindjang ni bajo i onom eto sandjongkal. Sindjatana singkop soede, totoran ni hoedjoernia adong ma saindaloe, tahoeloeknia toembaga, badjoenia bosi marsisik songon tanggiling. Ganop manjogot dohot potang mamoloes-moloes ma ia sian inganan ni halak Israel mangoelai.

„Ise hamoe na poeloek mangalo aoe! Ro ma ia toe on! Moeda taloe ia aoe, taloe ma hami soede; tapi moeda taloe aoe ibana, taloe hamoe soede,” sai ning ia. Madoeng adong opat poeloe ari marpoepoe dipabile diintjahi ia halak Israel, laing so adong na poeloek pasip ia.

Djadi adong ma dohot di si toloe angkang ni Si Daoet, halak Betlehem i. Djadi dibaen na honok ma nada ro barita ni halahi, disoeroe Si Isai ma Si Daoet manaroehon panganon toe si laloe manjapai, sanga

hisar halahi. Djadi kehe ma Si Daoet toe si. Bolkas ia, tongkon ma mardalan halak Israel laho mangalo moesoe i. Djadi dipasahat Si Daoet na niobannia di dongannia, dihoetkon ia halak Israel i. Djadi sindorang mangkobar ia dohot angkangnia, ro ma Si Goliat mangoeai. Dibege Si Daoet soede, milas ma rohania. Anggo halak Israel soemoeroet ma hara ni biar ni halahi. Djadi disapai Si Daoet ma dongan i, sanga ise bajo i na sai djat pangkoelingna, sanga aha oepa ni na mamoenoe ibana. Ro halahi : „i ma da Si Goliat, oeloebalang ni halak Pilisti i. Pasangapon ni radjanta do na mamoenoe ibana, salang boroenia ra dilehen ia, asal mate bajo i.” Djadi dibaen sai tangi pinggol ni Si Daoet, dimoeroehi angkangnia Si Eliab ma ibana, ning ia : „hape i do dibaen na ro ho toe son ! Na djoengkat ma ho ! Biasi ditinggalkon ko biri-birinta ?” ning ia. Ro Si Daoet : „aha he salana manjapa-njapai iba,” ning ia.

Djadi adong ma na paboahon di radja Saoel, na poeloek Si Daoet mangalo Si Goliat. Djadi manigor disoeroe alap radja i ibana, disapai ia, sanga toetoe na nidok ni halak di sia. Ro aloes ni Si Daoet : „oelang sak roha ni radja i ! Aha he halak Pilisti on, aoe ma djolo alonia !” ning ia. Ro radja i : „Oea, na posoan dope ho, ho ma alona ninmoe, nada he diboto ho pandingar godang do bajo i ?” ning ia. Ro Si Daoet : „marmahan biri-biri aoe sanoli, bo ro ma babiat, ditangkoep ia ma biri-birinami sada, giot disarat ia ma. Halak na manolong nada adong, angkiboeng aoe do tongkon, tai bintoaon pe aoe soada, laing torang akalkoe, aha dope, hoedagap babiat i, hoesoeakkon babana, manganggoek ma ia, marobo ma laloe mate. Gompoe pe songon i do saoelek. Halak Pilisti i pe angkon mangihoet hoebaen di babiat dohot gompoe i. Boti pe, Debata mangoeroepi aoe mamoenoe binatang i dompahi, dioeroepi Ia moese aoe saonari mangalo bajo i,” ning ia. Doeng i didokkor radja i : „antong, doega ma i, didongani Debata ma ho,” ning ia. Djadi dilehen radja i ma badjoe bosi di sia, tapi hatoelek dirasa Si Daoet, ning ia : „santabe di radja i, nada malo aoe mamake na songon i, gonan badjoengkoe na somal i hoepake,” ning ia.

Doeng i kehe ma ia toe soenge na donok di si, dipili ia ma lima batoe na hiboel na limoes, dibaen ia toe hoentjangnia. Djadi digolom ia ma toengkotnia, ambalangnia pe ditiop ia ma, djadi songon i ma ditopotkon ia Si Goliat. Homang-komang do Si Goliat diida ia ro Si Daoet, tapi dakdanak dietong ia ibana. Djadi ro ma doknia toe Si Daoet : „andjing aoe lakna diida ho, dibaen maroban toengkot ko mangajak

aoe ? Painte so hoelehen ko panganon ni binatang !” ning ia. Ro Si Daoet : „mangasahon bahat ni sindjatamoe poeloek ko mangalo aoe, aoe hoealo ho mangasahon goar ni Debata na goemogo i, na niintjahanni. Di ari sadari on ma pasahaton ni Debata ho toe tangankoe. antjo hoebaen ko panganon ni binatang. Tangkas ma diboto halak anonna gogo do Debata, nami,” ning ia. Diroro Si Goliat ma ibana, hape ma dibaen Si Daoet batoe toe ambalangnia, diambalangkon ia toe Si Goliat. Djadi hona ma bohi ni bajo i, masoek ma batoe i toe bagasan, tinggang ma ia laloe mate na santongkin i. Djadi diboeat Si Daoet ma podang ni Si Goliat, digotap ia oeloena dohot i. Asa hoem diida halak Pilisti, na doeng mate oeloebalang ni halahi, marlodjongi ma halahi maporoës. Anggo halak Israel marsoerak-soerak ma, marolop-olop. Djadi olat ni ari na sadari i marale-ale ma Si Daoet dohot Si Jonatan, anak ni radja Saoel.

#### PONGGOL 41.

#### Taringot toe paraloan ni Si Saoel dohot Si Daoet.

Sigop do tarbortik hamonangan ni Si Daoet. Djadi di na moelak ia rap dohot parangan i, dialo-alo ina-ina dohot boedjing-boedjing manggondangi manortori ibana, marende ma halahi songon on ma hatana : sariboe halak patoe radja Saoel, sampoeleoe riboe patoe dibaen Si Daoet. Djadi menek ma roha ni radja i hara ni i. I do pangkal ni paraloan ni halahi, olat ni i laing na sego ma roha ni radja i adop Si Daoet.

Saoelak manjorpo njae ni radja i, dialap halahi ma Si Daoet mamaloë arbap i, hoem diida radja i ibana, manamba ma pasiknia, ditoeldangkon ia ma tombak toe Si Daoet. Hara ni na mangamboer noma Si Daoet nada hona ia, pantom toe dorpi i tombak i. Ila dirasa Si Saoel doeng moelak torang akalnia, angke nada ra ia dope papatar na di rohania i.

Na goemodang dihabiarkon Si Saoel sorta ni Si Daoet toe halak soede, betak mimbar haradjaän i toe sia, ninna rohania. Di moelana i diparosoe-rosoe Si Saoel djolo, tapi bisoek do i, antjo maroedjoeng toe hamagoan. Salang boroenia dilehen ia, pola didokkon ia di Si Daoet : „indangkon niserean boroengki, hoelehen sadjo, tapi angkon

diboenoe ho saratoes halak Pilisti, i ma serena," ning ia. Didokkon ia pe songon i, arop rohania, nada dapot Si Daoet, balik te he oelang so halak Pilisti mamoenoe ibana. Hape dipatoeloes Si Daoet, djadi nada hatalgangan ia be hata i, dilehen ia boroenia Si Mikal. Boroie i saroha do dohot Si Daoet, nada ra mangihoet di roha ni amana.

Moer dipasangap halak Si Daoet, moer hosom ma roha ni radja i. Nada diboenihon ia be rohania. Saoelak borngin disoeroe ia oeloe-balangnia toe bagus ni Si Daoet manangkoep ibana. Hoem tarboto di Si Mikal na nitopot ni halahi, disosak ia ma Si Daoet, antjo maporoes ia, djadi midjoer ma ia borngin sian djandela ni bagus i, nada diboto soeroean i. Doeng kehe Si Daoet, didokkon Si Mikal di oeloebalang i :, nada tarbaen ia dohot, marnjae do ia," ning ia. Djadi moelak boti halahi. Doeng dipaboa halahi di radja i, na marnjae Si Daoet, moeroek ma radja i, ning ia ma : „nada marimbar di aoe, marnjae so marnjae angkon dioban kamoe, patiboe oelahi toe si," ning ia. Djadi mang-oelahi ma halahi toe si. Asa doeng di si, dioban Si Mikal halahi toe bilik podoman i, dapot halahi na marnjae i nigoepgoepan. Doeng dioengkap halahi oelosna, hape nada di si Si Daoet, gambaran ni djolma do marabit maroelos. Songon i ma dipaoto-oto Si Mikal halahi. Lebak dirasa oeloebalang i, moelak boti halahi mangoelahi. Na milasan do roha ni radja i oembegesa, dimoeroehi ia ma Si Mikal, ning ia : „biasa antong dipaloea ho ibana?" Ro Si Mikal : „doeng so hoepaloea, bia ma ? Inda na mate ma aoe dibaen ia," ning ia.

Sintap ni i nada doempang hasonangan be Si Daoet, angke songon parkosom ni boeaja do roha ni radja i. Hara ni pangajak ni radja i hoehoel liang inganannia, hoehoel marbandar-bandar ia di tombak godang i. Na sobaran do rohania, nada ra ia mambaen na so patoet adop radja i. Marsoeo ia saoelak dohot Si Jonatan, ale-alenia, disapai ia : „dia de he salangkoe adop amanta, dibaen diloeloei ia hosangkoe?" ning ia. Ro aloes ni Si Jonatan : „nada adong anggo na hoeboto, ang-gia", ning ia.

Doea noli ma na tangkas tarida denggan ni roha ni Si Daoet adop radja i. Na doea noli i momo sadjo soegari tarboenoe ia ibana. Saoelak di halongonan Engedi, modom Si Saoel di liang na di sini, ro Si Daoet toe si rap dohot dongannia. Djadi ro ma hata ni dongan i toe sia „aha dope, onma ari na pade, dilehen Debata moesoe i toe tanganmoe," ning halabi. Ro Si Daoet : „dao ma i sian aoe mamoenoe radja i, ang-ke Debata pabangkit ia na djolo," ning ia. Hoem digotap ia abit ni



radja i sanlobong, doeng i mondjap ma ia, painte so ngot radja i. Doeng ngot Si Saoel, haroea ma ia sian liang i, pio-pio ma Si Daoet : „tabe ma di radja i ! Dipasahat Debata do hita nian toe tangankoe, momo soegari tarboenoe aoe hita nangkin, tapi nada ra aoe. Ligi ma djolo abit na sanlobong na di tanganki, i ma tandana na so adong rohangkoe na djat adop kita !” ning ia. Ro Si Saoel : „toetoe do, amang ! toemigor do ho oelang aoe. Debata ma mamalossa di ho,” ning ia. Doeng i kehe be ma halahi.

Saoelak nari i na momo sadjo soegari boenoeon ni Si Daoet radja i, dompak ro ia borngin rap dohot baberenia Si Abisai toe bandar ni radja i. Madoeng sinok modom Si Saoel bope oeloebalangnia Si Abner dohot dongan na asing i. Djadi ro Si Abisai, dihoesipkon ia toe Si Daoet : „bia he hoetoeldang Si Saoel marsangkalan toe podomannia ?” ning ia. Ro Si Daoet : „oelang, nada pade mambaen na so oehoem toe radja, tombak dohot panginoemannia pe taoban, toek ma i,” ning ia. Doeng i moelak ma hala<sup>hi</sup> asok-asok, nada adong na tarsoenggoel.

Asa doeng torang ari djongdjong ma Si Daoet di tor na di tontang ni bandar ni Si Saoel, pio-pio ma ia : „djo Abner ! nada mangaloesi be ho ?” ning ia. Ro Si Abner : „ise do na poeloek gaor saonari ?” ning ia. Ro Si Daoet : „oeloebalang aha he ho ! Na lobi denggan ma toetoe pandjagomoe di radja i na potangin. Patoetna maroetang kosa do ho, masoek halak toe bandar ni radjamoe nada diboto ho ! Ligi ma djolo sanga di si tombak dohot panginoeman ni radja i,” ning ia.

Madoeng dibege radja i na mangkobar halahi, djadi didokkon ia : „ho do i, atehe, Daoet ?” ning ia. Ro Si Daoet : „olo lani ! aoe do i, biasi sai diajak-ajak radja i aoe songon manoe<sup>k</sup> harangan ?” ning ia. Ro Si Saoel : „djora ma aoe, amang, nada be soesaänkoe ho toe djoloan on,” ning ia. Ro Si Daoet : „disoeroe radja i ma na mangalap tombak dohot panginoeman i. Arga do hosa ni radja i di aoe, hosangkoe pe nian arga ma di radja i,” ning ia. Ro Si Saoel : „olo da amang ! didongani Debata ma ho,” ning ia. Doeng i kehe be ma halahi.

## PONGGOL 42.

**Taringot toe pandelean ni radja Saoel.**

Dibaen diboto Si Daoet, na so boeaton do hata ni radja Saoel, na-da poeloek dope ia moelak toe hoetania, djadi kehe ma ia toe tano ni halak Pilisti, dilehen radja na di sini ma hoeta Siklak inganania. Si Daoet do na goemodang habiaran ni halak Pilisti, djadi doeng maralo ia dohot radja i, pola mandjalahi haporoesan ia toe tano ni moesoe, poeraga ma halahi mamorangi halak Israel.

Asa doeng dibege radja Saoel na giot ro ma halak Pilisti marporang, marsak ma rohania, angke dongan martahi nada adong be. Si Samoeël madoeng mate, ise noma sapaännia, sanga tama mangalo ia sanga nada. Disoeroe ia do nian malim manjapai Debata, tapi nada mangaloesi Debata oempe sandok.

Djadi dompak boeha-bahe boti rohania, ditopot ia ma anakboroe hasandaran ni begoe, na maringanan di hoeta Endor. Na nirarang ni radja i do na djolo mamake na songon i, tapi adong dope sada-sada marpantjarian sian i di na boeni. Djadi oelang diboto halak, borngin ma kehe radja i toe si. Anakboroe i nada diboto ia, radja i do na manopot ia. Djadi doeng mangkobar halahi santongkin, disoeroe ia ma anakboroe i manjapai begoe i taringot toe na giot masa. Djadi didokkon anakboroe i : „soemangot ni ise ma hoeparo ?” ning ia. Ro Si Saoel : „soemangot ni Si Samoeël ma,” ning ia. Ro anakboroe i : „radja Saoel do ho, oedjionmoe aoe hape, antjo adong dalan mamoe-noe aoe,” ning ia. Ro Si Saoel : „nada i, oelang ko mabiar! paboah ma sanga aha na ro diida ho,” ning ia. Ro anakboroe i : „na sangap do na hoeida i, na roear sian tano i,” ning ia. Ro Si Saoel : „bia tompana ?” ning ia. Ro anakboroe i : „halak na tobang do hoeida margobak,” ning ia. Djadi diboto Si Saoel, na doeng soemangot ni Si Samoeël do i, dipaoendoek ia ma adop i. Djadi mangkoeling ma soemangot i : „aha do na masa na moeba dibaen disoesai hamoe aoe ?” ning ia. Ro Si Saoel : „on do da ompoeng, dibaen niparo hamoe, na tarsosak do aoe, angke ma ro halak Pilisti marporang, madoeng ditinggalkon Debata aoe, nada ra Ia mamodai aoe, djadi i do dibaen hoeparo hamoe, antjo hamoe djolo marsajang ni roha paboahon di aoe, sanga aha na tama baenonkoe,” ning ia. Ro soemangot i : „moeda doeng morot Debata sian ko, aha dope sapaonmoe aoe. I pe, na mandok ma aoe di ho,

pasahaton ni Debata ma ho toe tangan ni moesoe. Antjogot mate ma ho rap dohot anakmoe," ning ia. Doeng i moeli ma ia. Djadi tartomos ma radja i dibaen hata ni soemangot i, oempe margogo be pamatangnia na gale hoemani, dibaen sadari saborngin nada rongkot rohania mangan. Doeng tarkalak radja i, disosoi anakboroe i ma ibana mangan. Djadi mangan ma ia saotik, doeng i kehe ma ia.

Djadi toeloes ma na marporang i, martontangan di dolok Gilboa. Djadi nada taralo halak Israel halak Pilisti, na bahatan halahi mate, maramparan songon i di padang i. Djadi doeng diida radja i. na doeng mate anaknia bope na margiloan parangannia i, mandele ma ia, didokkon ia ma di oeloebalangnia : „tiham aoe mate, oelang dapot halak Pilisti aoe ngoloe-ngoloe," ning ia. Alang do roha ni oeloebalang i, nada poeloek ia. Djadi diboeat radja i ma podangnia, didaboehon ia ma pamatangnia toe si. Songon i ma hamamate ni radja Saoel. Djadi doeng diida oeloebalang i, na mate radja i, ditiham ia moese dirinia, mate ma ia rap dohot radjana i. Torang ari dapot halak Pilisti ma bangke ni radja Saoel, digotap halahi ma oeloena, diboeat halahi sendjatana, dipaoban-oban halahi tanda hamonangan. Anggo bangkena i digantoeng halahi di tano bato ni hoeta Betsan.

Toloe ari doeng i, bolkas ma barita ni i toe Si Daoet, djadi manggoek-anggoek ma ia laloe mangandoeng songon on : „djo dolok Gilboa ! indangkon be dipatinggang-tinggang siroemondop oedan tombak sitoemaloen na di robaenmi, dibaen na mate maroboer na sangap ni halak Israel di gindjangmoe. Djo Saoel! djo Jonatan! na tarpalobi tarpasoeroeng dangolki dibaen na marobo hamoe, dibaen na taloe sendjatamoenoe," ning ia.

Doeng i moelak ma Si Daoet sian tano ni halak Pilisti toe tano Joeda, diingani ia ma hoeta Hebron. Djadi ro ma radja-radja Joeda toe sia mandok, na doeng dipili halahi ibana radja godang. Anggo marga na sabolas nari i nada dohot, angke madoeng dipabangkit halahi Si Isboset anak ni Si Saoel. Doeng pe mate i, asa olo halahi diradjai Si Daoet halahi. Djadi mimbar ma Si Daoet sian hoeta Hebron toe hoeta Jeroesalem, i ma dibaen ia hoeta raja ni soede tano Israel. Sonang do roha ni halak marradja toe sia, harana tigor do ia, nada hoemon sangapnia didjalahi ia, dohot hangoloean ni parripenia dihaskon ia. Sada moese, dioeloehon ia halak marsomba toe Toehan na sasada i. Djadi dibaen na boerdjoe bope pantoen rohania adop Debata di-

pasoe-pasoe Debata ma ibana. Ganop masa hamoesoeon, monang do ia djadi moer bidang ma haradjaännia.

Doeng i toeboe ma rohania padjongdjong bagas parsombaän, inganan ni poti parpadanan moese, djadi disoeroe alap ia ma panoerirang Si Natan manjapai timbanganna. Anggo na margoar panoerirang dompahi, halak na mardomoe dohot Toehan do i. Dipasahat Debata hata, nia toe halahi, antjo halahi pabolkaskon toe halak na torop, tardok pangitean do halahi.

Djadi doeng ro panoerirang Si Natan, didokkon radja i toe sia : „dalanna hoesoeroe alap hamoe, on do: denggan do bagaskoe, tapi anggo inganan ni poti parpadanan i bandar-bandar do, hara ni i didok rohangkoe padjongdjong bagas parsombaän na tama,” ning ia. Ro panoerirang i : „denggan do i, tama tapatoeloes i, Debata do donganta”, ning ia. Doeng i moelak ma panoerirang i toe bagasnia. Djadi borngin ro ma hata ni Debata mandok di sia : „topot ma radja i antjogot, dok ma di sia, nada tola padjongdjongonna bagas parsombaän. harana bahat masa porang hatiha radja ia, bahat saboer moedar ni halak. I pe, so bagi mantak dope na marporang i. Doeng pe anaknia radja, asa dapot hatiha na sae padjongdjong bagas na songon i. Totop pe baenonkoe haradjaän i di sia bope di pomparannia, nada djadi morot i sian halahi,” ninna. Torang ari laho ma panoerirang i toe bagas ni radja i pabolkaskon hata i. Djadi doeng dibege radja i, didokkon ia : „o Toehan, ise he aoe, ise he pangisi ni bagaskoe, dibaen na songon i denggan ni rohamoe manogoe aoe. Tambana moese didok Ko patoeloesonmoe do na di rohangki di hatiha anak-koe radja,” ning ia. Djadi dipoedji ia ma asi ni roha ni Debata.

---

#### PONGGOL 43.

### Taringot toe radja Daoet.

Na godang sitoetoe do hasaja ni panoerirang di halak Israel, angke na poeragaän do halahi mandok hata sipaingot di halak na marsala, nada marnida-ida bohi halahi. Poeraga pe halahi hara ni parsoeroe ni Debata do. Tarida do i sanoli di panoerirang Si Natan.

Adong ma dompahi di hoeta Jeroesalem dadaboroe na lobi denggan tompana, Si Batseba goarna. Por do roha ni radja i di anakboroe i,



tapi dibaen sorangan ni halak ia, nada poeloek radja i mangalangkoep. Djadi pake akal na djat ma radja i, antjo di sia dadaboroe i. Hatiha i masa porang ni halak Israel dohot halak Amon, dohot ma toe si na nisondoek ni dadaboroe i, Si Oeria goarna. Djadi didokkon radja i Si Oeria ma tongtong baenon di djolo, antjo momo boenoeon ni moesoe ia. ninna roha ni radja i. Djadi toetoe, mate ma Si Oeria di porang i. Doeng dapot radja i baritana i, disoeroe alap ia ma dadaboroe i baen sorangannia.

Tarrimas do roha ni Debata marnida pambaenan ni radja i, disoeroe Ia ma panoerirang Si Natan mamintjang ibana. Djadi kehe ma panoerirang i toe bagas na godang, didokkon ia ma di radja i : „adong do dohononkoe di radja i,” ning ia. Ro radja i : „dia i ?” ning ia. Ro panoerirang i : „adong doea halak, na sada halak na mora, na sada na pogos. Halak na mora i bahat do sinadonganna, angka horbo, lombue dohot biri-biri. Halak na pogos i, angkiboeng sadjo do adong biri-birina djop ni rohana. Ringgas dipareso ia biri-biri na sada i, panganonna inoemonna nada loepa ia mangalehen, barana pe ias dipasapoe-sapoe ia. Djadi sada ari ro ma bajo ni halak na mora i djadi ditangko ia biri-biri ni na pogos i baen panganon ni bajonia i. Haroe dialo na pogos i, nada taralo ia, goemogo do halak na mora i. Bia ma timbangan ni radja taringot toe pambaenan na songon i,” ning ia. Ro radja i : „sapiri so mangoloe Debata maroetang kosa do bajo i,” ning ia. Ro panoerirang i : „antong, ho do bajo i ! Disoeroe boenoe ho Si Oeria, antjo di ho sorangannia ! Tilakomoe do i toe djoloan on ! Debata do na pabangkit ko, biasi diapasi ho Ibana mambaen na so oehoem,” ning ia. Djadi tarkohom ma radja i, diokoe ia ma : „toetoe ma mardosa aoe godang adop Debata !” ning ia. Ro panoerirang i : „ra do Debata manesa dosamoe, tapi anggo dakdanak na pardjolo toeboe sian dadaboroe i, nada djadi mangoloe,” ning ia. Doeng i toengkap ma radja i toe tano i, martangiang ma ia : „o Toehan ! ibo rohamoe di aoe, sesa ma dosangkoe mangihoetkon godang ni asi ni rohamoe. Boeri aoe ias, oelang hodar be aoe dibaen dosangki. Angke ma hoeboto dosangkoe, hoeingot salangkoe. Adop ko toetoe marsala aoe, angke madoeng hoebaen na so toemboek di rohamoe. O Toehan ! djadihon di bagasan aoe ate-ate na ias, lehen di aoe roha na imbaroe djana na togoe,” ning ia.

Asa doeng adong dakdanak ni halahi, peto ma hata ni panoerirang i, nada sadia lolot, marnjae ma i, djadi marsak ma roha ni radja i, pitoe

ari pitoe borngin nada mangan ia, hoem na tangis sasadari, mangidohon toe Debata, oelang so maloem dakdanak i, tapi laing mate do. Djadi doeng mate, manigor mago marsak ni radja i, angke ning ia : „dompok mangoloe, tarpangido dope maloem, saonari madoeng dialap Debata, nada be moelak ia toe aoe, aoe noma mandapoti ibana.”

Djadi dipoedji radja i ma Debata, ning ia ma : „Poedji ma Toehan i, ale tondingkoe ! oelang loepa ho di na binaennia toe ho. Na manesa dosamoe soedena, na pamaloem njaemoe soedena, na paloea tondimoe sian hasompitan. Mardapot-dapot do di ho asi ni roha dohot denggan basa. Ia hosa ni djolma songon doehoet-doehoet do, songon boenga-boenga di padang i. Moeda mamoloes angin, maroeroes ma, salang ingananna nada binoto be. Ia asi ni roha ni Debata manongtong do di angka na mangkabiari Ibana. Totop do hatigorannia sian soendoet toe soendoet di angka na maniop padannia bope na marningot di patiknia,” ning ia.

Dakdanak padoeahon i pe na topak di halahi, torkis do, Si Salomo goarna. Djadi dipasahat radja i ibana toe panoerirang Si Natan podaënnia.

---

#### PONGGOL 44.

**Taringot tee marsak ni roha, na doempang di radja Daoet.**

Doeng loemolot Si Daoet radja, bahat ma doempang di sia marsak ni roha. Soegari hoem halak di roear paärsak ibana, adong dope, tapi na oemboting dilala ia pambaenan ni anaknia Si Absalom. Hara ni denggan ni tompana bope dibaen na malo ia parodop-rodop roha, dapot ia do roha ni halak, tai anggo toe amangnia nada mardomoe ia. Giotnia, oelang so maradian amangnia, antjo ia gontina. Djadi ragam ma bisoeknia, antjo diamboengkon halak radja na tobang i laloe dipabangkit halahi ibana. Djotdjot kehe Si Absalom toe parrapotan manondoer halak na parkaro, disapa-sapai ia, sanga aha parkarona bope sanga bia pangalahona, lambok sadjo dibaen ia hata-nia. Djadi moeda doeng dipadjodjor nampoena parkaro i, ro ma doknia : „asoera sahat di aoe da, na mangoehoem parkaromon, angkon monang ko hoebaen, harana tigor do hoebege na nidokmi.” Tabo antong dibege halak, djadi tardok so masoek elek-eleknia. Djadi

doeng sar toe djae toe djoeloe diboto halak sortania, martoeptoep ma ia dohot dongarnia namora-mora manontoehon sada ari ditoeroenkon halak amangnia laloe dipili ibana gontina. Angkor boeni do dibaen i, antjo songgot roha ni radja i oembegesa bope oelang djabat be tar-segohon radja i tahi ni halahi.

Asa doeng dapot arina i, marroan ma halak Israel marpoenpoen toe hoeta Hebron, angke i do dipadan ia hoeta pardomoean. Djadi diirang-irangi dongan ni Si Absalom ma halak na bahat, oelang ra be halahi mangoloi radja Daoet. Djadi tarihoet do halak na bahat i di na mandjadjang i, diolopkon halahi ma boeloes.

Asa doeng dibege radja Daoet na masa di hoeta Hebron, tarsonggot ma ia, djadi maporoes ma ia toe hoeta Mahanaim, diboan ia dongannia sabagas dohot argka na saroha dohot ia. Djadi dipalagoet radja i ma sada na markolong ni roha dope di sia mangalo anaknia i antjo toendoek. Laho kehe parangan i didokkon radja i dope di angka oeloebalang i: „oelang ma koras toe da rohamoenoe adop Si Absalom, na poso dope ia bope anakkoek,” ning ia.

Doeng i martontangan ma parangan ni radja Daoet dohot parangan ni Si Absalom di tombak Epraim. Djadi taloe ma Si Absalom, halaknia marlodjongi moelak maporoes. Mangasa biarnia dipahipas Si Absalom koedonia, bo dilodjongkon koedo i ma ibana toe roemboen na lobi potpot. Hara ni gindjangna alit ma oboek ni Si Absalom toe dangka ni hajoe, djadi gorg ma ia di si, koedo i laing laloe. Djadi gantoeng ma Si Absalom di dangka ni hajoe i, nada haharkaran ia. Adong ma sangombas, mamoloes ma halak parangan ni radja Daoet, diida ia ma Si Absalom gantoeng, bo marlodjong ma ia sian i paboahonsa di Si Joab, oeloebalang na toemobang i. Doeng dibege Si Joab, didokkon ia: „biasi antong nada diboenoe ho? soegari godang ma labomoe hoebaen,” ning ia. Ro bajo i: „nada poeloek aoe mamoenoe anak ni radja i haroe sadia godang pe labongkoek! Boti pe didokkon radja i, oelang ma koras toe rohanta adop Si Absalom,” ning ia. Ro Si Joab: „toek ma i, nada tarpaälo-alo ho! Keta patoedoehon ingananna, antjo aoe mamoenoe ia,” ning ia. Djadi doeng laloe toe hagantoengan ni Si Absalom i, ditoeldang Si Joab ma ibana toloe noli. Doeng i dipanampoel dongannia i dope ibana loepoes mate. Djadi adong ma piloebang donok di si, i ma tanomanna dibaen halahi, ditimboen halahi batoe di gindjangna i. Doeng i moelak ma halahi. Djadi disoeroe Si Joab ma mandjamitahonsa di

radja Daoet. Hoem dibege ia, mangangoek ma ia, didokkon ia ma : „o amang Absalom, andap soegari aoe ma gontimoe mate, gonan i amang !” ning ia. Honok mardondam radja i hara ni i.

Doeng i moelak ma radja Daoet toe hoeta Jeroesalem, djadi nada adong be na poeloek mangalo ibana.

---

#### PONGGOL 45.

### Taringot toe na masa di radja Daoet, doeng matobang ia.

Saoelak masa begoe abar di tano Israel. Dalanna masa i, disoeroe radja Daoet sanoli oeloebalangnia Si Joab mandjodjori soede hoeta dohot pagaran na di haradjaännia mamilang bahat ni parripe, na tarbaen dohot toe porang. Digorahon roha ni Si Joab do nian, tapi nada poeloek ia manggagai parenta i. Djadi diradjoemi Si Joab bahat ni na tarbaen dohot toe porang salapan ratoes riboe halak Israel bope lima ratoes riboe halak Joeda. Djadi doeng sidoeng Si Joab, dipaoa ia i di radja i, bo manolsoli ma roha ni radja i, dosar-dosar ma taroktoknia, djadi diokoe ia sian godang ni ate-ate dibaen ia i. Djadi disoeroe Debata ma panoerirang Si Gad mandokkon di radja i : „madoeng diboto Debata na binaenmi, nada pade i, hara ni i hona oehoem ma ho. Pandok ni Debata, pili ma sanga dia ma sian na toloe roepa oehoem on giotmoe : haleon pitoe taon sanga marmoesoe toloe boelan sanga masa begoe abar toloe ari,” ning ia. Ro radja i : „gonan nitaon na ro sian Debata oelang na ro sian djolma, harana parasi ni roha do anggo Debata. Na masa begoe abar i ma toloe ari anggo songor i,” ning ia.

Djadi masa ma bala na djorboet di tano Israel toloe ari honokna, pola pitoe poeloe riboe halak mate dibaensa. Na toloe ari i marpoepoe mangido ibo ni roha ma radja Daoet toe Debata paäntak bala i, ning ia : „o Toehan ! aoe do na marsala, aha ma sala ni parripengkoe dibaen na dohot tarkona halahi. Hoem toe aoe do na tama manginona oehoem i,” ning ia. Djadi mambaen parkaoelan ma ia di tor Moria, di pardegean ni Si Aroena na di sini. Djadi doeng mangalehen haoel ia, mantak ma bala i, djadi didokkon ia ma : „di son ma na tama padjongdjongon bagas djoro di Debata, on ma na pade parbagasanna,” ning ia.



Asa doeng i ditonahon radja Daoet ma namora-mora i dohot na tobang-tobang i marlagoet toe hoeta Jeroesalem, antjo mambaen partahian. Djadi doeng marlagoet soede, didokkon radja i ma : „on ma da dalanna hoepalagoet hamoe toe son, diboto hamoe do na so tola padjongdjongonkoe bagas parsombaän hara ni bahat ni porang, na masa hatiha aoe radja, doeng pe anakta Si Salomo manggonti aoe asa tola. Djadi didok rohangkoe, aha salana tapoengkahian paloehoet-loehoetkon angka na hasaja toe si, antjo ripe mambaen noma, moeda dapot hatiha padjongdjongkon. Martahi ma hamoe di hoetamoenoe be laloe mangalehen goegoean,” ning ia. Djadi olo be ma halahi. Djadi martahi ma halahi dohot parripena be, nada adong na mandali, dohonon di bagasan santongkin ro i, angka sere, perak, toembaga, bosi dohot na asing-asing i. Djadi mandok tarima kasi ma radja i di Debata, dibaen na ringgas be halak manga-lehen bagianna.

Asa doeng i moer matobang ma radja Daoet, moer roemoek ma pematangna, nada haroe morot-morot be. Djadi dipabangkit ia ma anaknia Si Salomo gontinia radja, marsipaingot ma ia di anaknia songon on : „ho amang ! oelang so radja na tigor ho, oelang tadingkon Debata, hoem toemboek ni rohanian baen,” ning ia.

Nada sadia lolot doeng i, mate ma radja Daoet, nitanom ma ia di hoeta Betlehem, hoeta hagogangannia. Opat poeloe taon didjoedjoeng ia haradjaän i. Na nihalomohon ni roha ni Debata do ia hara ni haporsajaänna djadi lopes toe ari sadari on mamboeat tiroean dope halak toe denggan dohot boerdjoe ni roha ni radja Daoet.

---

## PONGGOL 46.

### Taringot toe radja Salomo.

Sapandjang mangoloe dope amangnia, tarpargoeroehon radja Salomo di sia soede parkaro pamarentaon, tapi doeng monding i. dokdok dilala ia parobanan i. Tangkas diboto ia, anggo hoem gogo dohot pistarnia nada toek. Djadi sanoli dompak marborngin ia di hoeta Gibeon ro amalnia, dibege ia ma sora ni Debata mardok : „o Salom ! pangido ma di Aoe sanga aha toemboek ni rohamoe, antjo Hoelehen,” ninna. Ro aloes ni Si Salomo : „ale Toehan, madoeng

dibaen Ko aoe radja gonti ni damang, tapi dakdanak dope aoe na so oemboto bona dohot oedjoeng. Pangidoankoe nian, lehen di aoe roha na pistar, antjo malo aoe mangoehoem halak na sai bahat," ning ia. Ro Debata : „dibaen na songon i tama ni pangidoanmoe, palobionkoe ma i, oemoer na gindjang dohot hamoraän lehenonkoe moese di ho," ning Ia.

Tiboe do tarbonggal hapistaran ni radja Salomo. Saoelak ro doea ina-ina toe adopannia patimbangkon parbadaän ni halahi. Djadi didokkon ina-ina na sada di radja i : „on do lani parbadaänname : adong di hami dakdanak sada be. Djadi borngin dompak modom ia, hatinggangan ia anaknia laloe mate. Doeng diida ia i, dibaen na sabagas hami, ro ia toe podomankoe, diboeat ia anakkie asok-asok sian lamboengkoe dompak sinok aoe, djadi anaknia na mate i dipajakkon ia di si, songon i ma dipasambar ia. Andos torang giot hoepatangoek ma anakki, hape ma mate hoedjama. Doeng hoepatangkas, hape nada anakkie na hoeabing i, anaknia do, Djadi ro aoe toe podomannia, bo boeloes dibadai ia aoe, didokkon ia anakkie do na mate, anaknia mangoloe. Bia noma songon i, lani?" ning ia. Djadi manigor dialoesi ina-ina na sada nari i : „nada toetoe na nidokkonnia, anaknia do na mate, anakkie do na mangoloe," ning ia. Djadi hohom djolo radja i mamingkirisa, doeng i didokkon ia di oeloebalangnia : „alap podang," ning ia. Doeng dialap oeloebalang i podang, didokkon radja i : „dia ma dakdanak i, antjo nilobong doea, sanlobong be hamoe," ning ia. Djadi manigor manganggoek ma ina-ina na toetoe nampoena dakdanak, ning ia ma : „atena ma di sia dakdanak i, saratna oelang niboenoe," ning ia. Ro moese ina-ina na sada nari : „indangkan di aoe, di sia pe oelang, nilobong ma toe si," ning ia. Ro radja i : „aha dope, ina-ina na denggan roha on do nampoenasa, harana holong do rohania di hosa ni dakdanaknia, toe sia ma lehen", ning ia. Djadi homang ma roha ni halak hara ni lo ni radja i maroehoem.

Salolot Si Salomo radja. nada djoengada masa porang. Malo do ia marlabohon angka hamonangan ni amangnia. Dipadenggan ia soede hoeta na di haradjaännia, apala hoeta Jeroesalem ma na djoemogi dibaen ia. Parboniagaän dohot pandaraman ni halak dipatoere ia. Angka laboean, paradianan ni kopal di topi laoet, dipaoeli ia, antjo sonang markopal halak, na giot maibarang toe ipar ni laoet. Sere, perak, batoe intan, hajoe Seder( songon hajoe djati togoena), dohot angka na asing-asing diboan na markopal i.

Djadi bonggal ma goar ni radja Salomo lopees toe loeat na dao, salang di radja ni halak Seba dibaritahon halak hamoeliaännia, pola ditopot radja Seba i ibana toe hoeta Jeroesalem mangaligi. sanga toetoe djamita ni halak. Doeng marsoeo ia dohot radja Salomo, longang ma ia mambege hapistaran ni radja i. djadi torang didokkon ia : „nada haroe porsaja dope aoe djolo di djamita ni halak taringot toe sangap ni haradjaänmoe, tapi ma diida matangkoe sasoedena i, sapardoea ni i nada podo dipaboa halak di aoe,” ning ia.

Bagas na goemodang dohot na soemangap na nipadjongdjong ni radja Salomo, bagas djoro i do i. Diparkasajahon ia soede na niplagoet ni amangnia na djolo. Doeng sidoeng bagas djoro i, markordja ma radja i, horbo parbongkot dohot lomboe pangambangi manamboes. Djadi di matana i masoek ma radja Salomo rap dohot halak na bahat i toe bagas djoro i, djadi djongdjong ma radja i di djolo ni halak soedena, martangiang ma ia, ning ia ma :

„Ale Toehan Debata na so hatoedosan ! Hoerang bidang do angka langit antjo tarbaen ingananmoe, pola ma hainganan Ko bagas na hoepadjongdjong on. Atik pe songon i, djagit ma somba dohot simora-mora ni naposomon ! Matai ma bagas on arian na borngin.

Moeda taloe parripemoe halak Israel dibaen moesoe hara ni dosa ni halahi adop Ko, moeda dipaoeba halahi roha bope ro halahi toe bagasmon martangiang, tangihon ma halahi !

Moeda manangging logo ni ari, nada ro oedan hara ni dosa ni halahi adop Ko, moeda dipaoeba halahi roha bope ro halahi toe bagasmon martangiang, tangihon ma halahi, sajang ma rohamoe, paro ma oedan !

Moeda masa haleon potir sanga boroön eme sanga antinganoön sanga moeda ro moesoe manjoleek sanga masa begoe abar, hasoesaän dohot parkantjitan dia pe, djadi ro parripemoe toe bagasmon martangiang, tangihon ma halahi, sajang ma rohamoe, tolong ma !

Halak pardagang pe, na so masoek toe parripemoe halak Israel, ro ia martangiang toe bagasmon, tangihon ma ibana, ale Toehan ! oloi ma pangidoanna antjo ditanda soede bangso ni djolma manoesia Ho. asa dihabiari halahi Ho !” ning ia.

Asa doeng sidoeng radja Salomo martangiang, dipasoe-pasoe ia ma halak Israel, doeng i marmoelahan ma halak marsitopot hoetana be.

Doeng matobang radja Salomo, diloas ia dipadjongdjong halak parbegoe parkaoelan dohot gana-ganaän di hoeta Jeroesalem. Apala

i ma na goemodang sada na nirarang ni Debata, angke hodar do hoeta i dibaensa. Djadi ro ma dok ni Debata toe Si Salomo : „boeatonkoe do haradjaän i sian ho, asa lehenonkoe i di oeloebalangmi Si Jerobeam, tapi sahonok mangoloe ho, Hoeloas dope i di ho, sian anakmoe pe Hoeboeat sabagi,” ning ia.

Djadi disoeroe Debata ma panoerirang Si Ahia manopot oeloebalang Si Jerobeam mandok di sia : „moeda doeng mate radja Salomo, lehenon ni Debata ma toe ho haradjaän i, mangihoet ma toe ho sampoeloe marga ni halak Israel,” ning ia.

Opat poeloe taon diradjai Si Salomo halak Israel, doeng i mate ma ibana. Djadi anaknia Si Rehabeam ma gontinia radja.

---

## PONGGOL 47.

### Taringot toe Si Rehabeam dohot Si Jerobeam.

Asa doeng radja Si Rehabeam, ro ma halak Israel dioeloehon Si Jerobeam toe adopannia mangido, oelang so dipanajang ia rodi dohot beo. „Boban na dokdok hami lala na nipajakkon ni mandiang amanta toe hami,” ning halahi. Ro radja Rehabeam: „painte hamoe ma djolo toloe ari on, antjo hoedok oedjoengna,” ning ia. Djadi disapai ia ma na tobang-tobang taringot toe si. Ro na tobang-tobang i : „dipaändjoeandjoe radja i ma djolo roha ni halahi, antjo dapot i, di poedi ari ringgas ma halahi mangoloi hita,” ning halahi. Doeng i disapai radja i ma na oemposo, angka dongannia. Ro halahi : „anggo pingkiran-nami, didok radja i ma toe halahi : anak ni tangankoe doemokdok do i oelang tangan ni damang ! Sanggar do lontjing-lontjing na nipake ni damang toe hamoe, tai anggo aoe, tada-tada do lipat-lipatkoe,” ning halahi. Djadi toemoemboek ma dibege radja i hata ni na oemposo i.

Patoloe arina ro ma halak Israel manjapai, djadi didok radja i ma hata nangkinan i aloesna. Djadi hantjit ma roha ni halahi, marsipan-dohonan ma halahi : „ahana he di hita pomparan ni radja Daoet.” Djadi nada ra be halahi marradja toe sia. Sampoeloe marga mamili Si Jerobeam radja ni halahi, hoem marga Joeda dohot marga Benjamin na mangihoet toe Si Rehabeam. Giot dialo Si Rehabeam Si Jero-



beam, tapi dirarang panoerirang i, ning ia : „oelang alo marporang dongan saboetoeha, boti pe na nibaen ni Debata do i.”

Djadi intap ni i doea do adong haradjaän, na sada haradjaän Israel, i ma haradjaän ni sampoeloe marga ; na sada nari haradjaän Joeda, i ma haradjaän ni doea marga. Di moela-moelana saor dope djotdjot na doea haradjaän i, harana oegamo i do pardomoean na goemodang. Djadi dibaen na di haradjaän Joeda hoeta Jeroesalem, inganan ni bagas djoro i, angkon toe si ma halak haradjaän Israel marsomba, na soadana toloe noli sataon. Djadi aha do roha ni radja Jerobeam dibaen i, angke didok rohania, moeda laing toe si halaknia, na oto so moeli mardomoe halahi dohot halak na di sini, djadi mabiar ma ia diamboengkon halahi ibana, alonia Si Rehabeam diparradja halahi moelak.

Djadi dipambakenkon radja Jerobeam doea gana-ganaän sere, na marroepa anak ni lombœ, na sada dibaen ia toe hoeta Dan na di oetara ni haradjaännia ; na sada nari di hoeta Bethel na di dangsina. Djadi dipaniho-nihohon ia : „indangkon be sai dipatopot-topot hamoe Jeroesalem. Moeda giot marsomba hamoe, toe hoeta Dan ma hamoe ro sanga toe hoeta Bethel, ma di si parsombaän na tama,” ninna. Djadi dihordjahon ia ma parsombaän na imbaroe i.

Djadi dompak na markordja i di Bethel, ro ma panoerirang, na ni-soeroe ni Debata, manjinsal na binaen ni radja i. Djadi mangkoeling ma panoerirang i adop parkaoelan i, didokkon ia : „djo parkaoelan ! djo parkaoelan ! on do didok Toehan Debata : toeboe do moese sada sian horong ni Si Daoet, na margoar Si Josia, sambolannia do angka malim, na manoetoeng haoel di gindjangmoe, toetoengonnia di gindjangmoe holi-holi ni djolma!” ning ia. Hoem dibege radja Jerobeam hata i, ditoedoe ia ma panoerirang i, didokkon ia ma toe halaknia : „tangkoop bajo on,” ning ia. Hoem didok ia songon i, giot dipalondok ia tangannia na hortang i hara ni na manoedoe i, bo nada tarpalondok be. Parkaoelan i mabola moese di na santongkin i, haoel na di gindjangna i ma sarsar. Dibaen biarna dipadenggan radja Jerobeam noma hatania adop panoerirang i, antjo ibo rohana mangidohon toe Debata, oelang so maloem tangannia na djogal i. Djadi dipangidohon panoerirang i ma i, maloem ma tangan i boeloes. Djadi dipihon radja i ibana mangan toe bagasnia, tapi nada ra panoerirang i. Doeng i moelak ma panoerirang i, radja i pe dohot halak na torop marmoelahan ma .

Nada sadia honok doeng i, marnjae ma hantjit anak ni radja Jerobeam. Marragam dibaen datoe obatna, tapi moer toe boratna do. Djadi didokkon radja i di sorangannia : „topot ma djolo panoerirang Ahia di hoeta Silo, tapi oelang mamake ho sanga mardongan ko, oelang diboto ia sorangan ni radja i ho. Boan ma siloea saotik. antjo taboto oedjoeng ni njae ni anakta on,” ning ia. Djadi kehe ma sorangan ni radja i toe si. Laho manaek dope ia toe bagas ni panoerirang i, ro ma hata ni panoerirang i sian gindjang mandok : „masoek ma djolo nadoema i, nada hasaja dipaoela-oela ho sorangan ni halak hatoropon, angke madoeng dipabotohon Debata di aoe na giot ro ho. I pe, gonan ma ho moelak saonari, dok ma di radja i, dibaen disoeroe ia parripenia marsomba toe na so debata, nada lomo be roha ni Debata mida ia. Hona oehoem ma ia dohot pomparannia. Taringot toe njae ni dakdanak i, aha ma labona hoeboenihon i, hoem bolkas ko, mate ma ia,” ning ia. Djadi moelak ma sorangan ni radja i. Peto hoem bolkas ia, mate ma dakdanak i.

Djadi moer tarida ma na so didongani Debata be Si Jerobeam. Nada marnamantak hagaoran dohot parbadaän. Doeng mate Si Jerobeam, adong ma gontinia, na mangihoet di parangenia. Djadi nada totop be haradjaän i di sada horong, mimbar-imbar do. Adat dohot oehoem pe moer mago di haradjaän Israel.

---

#### PONGGOL 48.

### Taringot toe panoerirang Elias.

Sian soede angka na manggomgomi haradjaän Israel, radja Akab ma na djoemorboet parangena. Dibaen na mamboeat boroe ni radja ni halak parbegoe ia, na margoar Si Isabel, tarihoet ma rohania di sia, diloas ia diboan boroe i sibaso dohot datoe bage, antjo songon dia parbegoeon i di tano hagodangannia, songon i moese ma di tano Israel, pola ditangihon radja Akab hobar ni boroe i mandok, oelang dipatola be halak marsomba toe Debata na sasada i, begoe Baäl noma na tola sombaon toe djoloan on. Na poeloek manggagai, boe-noeon do i.

Sada do na poeraga na so mabiar mida radja i, i ma panoerirang Elias. Saoelak disoeroe Debata ibana manopot radja i paboahon na giot

oehoemon ma halak Israel, djadi didokkon ia : „sapiri so mangoloe Debata na sasada i, Debata ni halak Israel sian na hinan, nada djadi ro oedan sanga namboer pe barang na sadialolot pe, lopees ro aoe mangoloe lahi toe adopanta,” ning ia. Djadi tarkohom ma radja i. Doeng i kehe ma panoerirang Elias, maringanan ma ia di topi ni soenge Karit, inganan na loengoen sadjo. Djadi Debata noma manjarahon ibana di si, angke ganop ari ro kak maroban roti dohot djoehoet panganonnia. Anggo inoemonnia aek soenge i do.

Asa doeng moer lolot logo ni ari i, aek soenge i pe moer marsik ma lopees mate. Djadi ro ma dok ni Debata toe sia : „kehe ma ho toe hoeta Sarpas, adong di si dadaboroe na mabaloe na denggan roha, di bagas ni i ma ho djolo tinggal,” ninna. Djadi kehe ma panoerirang i toe si. Djadi mandapotkon hoeta idiida ia ma anakboroe na maisoban, diboto ia ma manigor, i do na nidok ni Debata. Djadi dipangkoelingkon ia ma anakboroe i, ning ia ma : „sajang djolo rohamoe, alap djolo aek inoemonkoe saotik,” ning ia. Ro dadaboroe i : „djadi,” ning ia djadi kehe ma ia mangalapsa. Donok dope anakboroe i, ro moese dok ni panoerirang i : „dohot roti laoskon saotik panganonkoe,” ning ia. Djadi ro aloes ni anakboroe i : „iale, tar sangging nari noma hoepadjop topong dohot miak saotik, giot paoelionkoe do i di aoe dohot anakboroe, doeng i mate ma hami, di dia be taragi be,” ning ia. Ro panoerirang i : „oelang sak rohamoe anggo hara ni i do. Baen ma na hoedok, tapi padjolo na di aoe. Doeng songon i nada tola marnasoede topongmo, miak i pe nada tola marnahoerang,” ning ia. Djadi dibaen anakboroe i. Aha dope, peto ma hata ni panoerirang i, topong na sangging i dohot miak na saotik i, nada marnamoerak, haroe niboeat pe sian i ari-ari.

Djadi dompak di si panoerirang i, marnjae ma dakdanak ni anakboroe i laloe mate. Sangkiboeng i do dakdanaknia, djadi disolsoli ia panoerirang i, ning ia : „hape toe son ko manjoenggoel salangkoe na djoloan i, saonari marbalos ma i dibaen ko.” Ro panoerirang i : „lehen ma dakdanak i hoeabing santongkin,” ning ia. Djadi dilehen anakboroe i. Doeng i dioban panoerirang i ma dakdanak i toe biliknia, dipajakkon ia di podomannia, djadi hoemolos ma ia toe Debata, ning ia ma : „ale Debata ! biasa diboeat Ko anak ni na mabaloe on, sai denggan rohania adop aoe,” ning ia. Doeng i dipatoengkap ia dirinia toloe noli toe gindjang ni na mate i, djadi martangiang ma ia songon on : „ale Debata ! paelak ma tondi ni dakdanak i toe badan-

na i," ning ia. Djadi dioloi Debata, moelak ma toetoe tondi ni dakda-nak i djadi doeng songon i dipasahat panoerirang i ma ibana moelak toe inangna. Ro anakboroe i: „sannari tangkas ma hoeboto halak na solkot toe Debata do ho," ning ia.

Asa doeng tolœ taon manaon logo ni ari, ro ma hata ni Debata toe panoerirang i mandok: „topot ma radja Akab, harana paroönkoe ma oedan," ning ia. Djadi kehe ma panoerirang i manopot radja i. Hoem diida radja i ibana, ro ma hatania manigor: „aha do baenonmoe toe son! Ho do sioban djaja toe tano Israel!" ning ia. Ro panoerirang i: „nada aoe na maroban djaja toe tano Israel, ho do i dohot dongan sabagasmoe, dibaen diapasi ho Debata. I pe, palagoet ma halak Israel dohot angka sibaso i, na mangoloi begoe Baäl i," ning ia. Djadi dipalagoet radja i. Asa doeng marlagoet halahi di dolok Karmel, didokkon panoerirang Elias i ma: „sadia honok nari mardoea roha hamoe? Moeda Toehan Jahowa toetoe Debata, oloi hamoe Ibana. Moeda begoe Baäl, antong, i ma oloanmoenoe," ning ia. Djadi nada adong na poeloek mangaloesi, sip do soede. Doeng i didokkon panoerirang i: „angkiboeng aoe do na manjomba Toehan Debata, anggo sibaso ni begoe Baäl i adong opat ratoes lima poeloe. Taoedji ma saonari, tabaen ma doea parkaoelan, sada di begoe Baäl, sada di Toehan Jahowa. Doeng i tahaoelkon ma doea lomboe djara-djara, sibaso i sada, aoe sada; tapi oelang nibaen api di gindjangna sanga di toroena, djadi toe parkaoelan ni ise ro api sian gindjang mangankon lomboe i, i do na toetoe Debata na patoet sombaon," ning ia. Djadi marsidokkon ma halak na bahat i: „i ma na tigor". Doeng i didokkon panoerirang Elias di sibaso i: „djoemolo ma hamoe, harana oembahat hamoe," ning ia. Djadi dipaoeli sibaso i ma lomboe i, dipajakkon halahi ma di parkaoelan i, doeng i marsimora-mora ma halahi toe begoe Baäl i, antjo didaboehon ia api mangankon djoehoeti, tai nada madaboe. Ragam dibaen halahi mangelek begoe i, laing soada labona. Djadi ro ma pamodoei ni panoerirang i: „betak na modom do begoemoenoe saonari sanga na mardalanan, pagogo hamoe djolo soramoenoe," ning ia. Tapi haroe diboegangi sibaso i pamatang ni halahi, laing so adong na moeba. Djadi marajak potang ari didokkon panoerirang i ma di halak na bahat i: „ma ngaolan hamoe manotnoti pambaenan ni halahanon, so tarida bagi aha labona. Aoe noma djolo mambaen haoel, tapi doeroesi hamoe parkaoelan i haliang, oelang didok hamoe naron na hoeantji hamoe," ning ia. Djadi didoeroesi



halahi parkaoelan i. Doeng i dipaoeti panoerirang i ma lomboe ha-oelkononkon i, dipajakkon ia di parkaoelan i. Djadi martangiang ma ia, ning ia ma : „ale Toehan Jahowa, Debata ni ompoenami Si Abraham. Si Isak dohot Si Jakob, pabotohon ma saonari di halak na marlagoet di son, basa toetoe Debata ni halak Israel ho ! Sajang ma rohamoe, ale Toehan, oloi ma parsintaänki, asa moeba ma roha ni halak na bahat on,” n ing ia. Hoem sidoeng didokkon ia hata tangiangnia i, madaboe ma apisian gindjang, dipangansa ma parkaoelan i dohot na di gindjangna i. Mabiari ma halak soede midasa, diokoe halahi ma : „Jahowa do toetoe Debata.” Doeng i didok panoerirang i ma : „tangoep hamoe sibaso i, oelang adong na maloea ! Boenoe hamoe ma halahi, poesa baen,” ning ia. Djadi diboenoe halak Israel ma sibaso i.

Doeng i didokkon panoerirang i ma di radja Akab : „moeli ma ho, angke ma hoebege hoesasak ni oedan na giot ro,” ning ia. Djadi moeli ma radja i. Anggo panoerirang i kehe dope toe oedjoeng ni dolok Karmel. Doeng laloe toe si, didokkon ia di naposonia : „manatap-natap ko djolo toe laoet an!” ning ia. Djadi manatap naposo i toe si, nada bagi aha diida ia. Doeng pitoe noli dioelak-oelahi ia, diida ia manaek omboen, na tar santopap bidangna sian laoet i. Djadi doeng dipaboa ia i, didokkon panoerirang i : „dok ma di radja i dipasigop ia na moelak i, oelang moer diolat oedan i ibana naron,” ning ia. Djadi nada sadia honok, lomlom ma langit, ro ma oedan na por sitoetoe.

---

#### PONGGOL 49.

#### Taringot toe Panoerirang Elias (oedoetna).

Asa doeng dibege Si Isabel, sorangan ni radja Akab i, na doeng diboenoe Si Elias sibaso i, nada na boti-boti milas ni rohania, poia didokkon ia : „nada tola somboe rohangkoe anggo sa mate ia.” Hara nii kehe ma Si Elias toe na loengoen, maringanan ma ia di si. Djadi dompak djoegoek ia sanoli di toroe ni game-game, hoemelos ma ia, ning ia ma : „ale Toehankoe ! toek ma djolo panaonanki di tano on, boeat ma gonan hosangki,” ning ia. Djadi tarpodom ma ia di si. Djadi dompak modom ia, ro ma amalnia, dibege ia ma sora ni soeroe-

soeroean mandok : „mangan minoem ma ho, angke angkon na mar dalanan ma ho toe na dao,” ninna. Doeng i tarsoenggoel ma ia, diida ia ma di lamboengnia panganon dohot inoemon singkop. Doeng simpoel ia mangan, mardalan ma ia toroes toe dolok Horeb, opat poeloe ari opat poeloe borngin honokna nada maradian.

Djadi doeng bolkas, marborngin ma ia di liang na di sini. Borngin i ro ma hata ni Debata toe sia mandok : „aha do baenonmoe toe son, Elias !” ninna. Ro Si Elias : „sahonokna hoelodjahon do na mandjamitahon goar ni Toehan Jahowa, oelang ditadingkon halak Ibana. Sasada aoe noma na tinggal na manjomba Ibana, tambana dope, diloeloei halak hosangkoe,” ning ia. Doeng i ninna sora i ma : „haroea ma ho sian liang i, djongdjong ma ho di djolona.” Djadi haroea ma panoerirang i, djongdjong ma ia di djolona i. Doeng i ro ma hali-soengsoeng mamoloes, maboerkat ma hajoe na bolon dibaensa, tapi nada mamoloes Debata di bagasan ni i. Doeng i ro ma lalo na gogo, pola marogang tano i. Doeng i tarida ma api songon porkas, tapi nada mamoloes Debata di bagasan na doea i. Doeng i ro ma angin na poerpoer, djadi digoepgoepi panoerirang i ma bohinia, harana mamoloes ma Debata. Djadi ninna ma mangoelahi : „aha do baenonmoe toe son, Elias !” Ro ia : „sahonokna na lodja ma aoe mandjamitahon goarmoe, dibaen ditadingkon halak Israel Ho, sasada aoe noma na manjomba Ho. I pe, ma sai diloeloei halak hosangkoe !” ning ia. Doeng i didokkon Debata : „moelak ma ho, Elias ! pos ma rohamoe, adong dope pitoe riboe halak nari, na so oendjoeng marsinggang adop begoe Baäl i. I pe, baen ma Si Elisa donganmoe, adjar-adjari ibana antjo tarbaen ia gontimoe moese,” ning ia. Doeng i moelak ma panoerirang Elias.

Anggo astoean ni na masa di dolok Horeb i, on do: na paboahon do Debata, angkon djolo ro bahat hasoesaän dohot parkantjitan taonan ni halak Israel, asa doempang hatiha na sonang.

Djadi doeng moelak panoerirang Elias sian dolok Horeb i, dibaen ia ma Si Elisa dongannia.

Hatiha i mate ma radja Akab, anaknia Si Ahasia ma gontina. Hara ni laing songon parange ni simatobangnia parangenia, nada tarbaen pasoe-pasoe ni Debata mandongani ibana. Djadi adong ma doea taon doeng radja ia, marnjae ma ia hantjit djadi disoeroe ia ma manjapai sandaran ni begoe Baäl Seboep taringot toe njaenia i. Di tongandalan padoempang ma soeroean i dohot panoerirang Elias djadi di-

dokkon panoerirang i ma toe halahi : „nada adong be lakna Debata ni halak Israel, dibaen na kehe hamoe manjapai sandaran ni begoe? Moelak ma hamoe, pandok ni Debata toe radja i, maroban toe na mate do njaenia i, indangkon be arop rohania moelak hisar,” ning ia. Djadi moelak ma soeroean i. Doeng moelak, didokkon radja i ma toe halahi : „biasi songon i sigopna moelak hamoe ?” ning ia. Ro halahi : „padoempang do hami dohot bajo. na mandok moelak di hami, hara-na ning ia nada maloem be njae ni radja i, maroban toe na mate do i, ning ia, djadi moelak hami,” ning halahi. Ro radja i : , aha do abit nia diida hamoe ?” ning ia. Ro halahi „hori do badjoenia, bobak hohos-nia,” ning halahi. Ro radja i : „Si Elias do i anggo songon i,” ning ia.

Doeng i disoeroe radja i oeloebalang dohot lima poeloe soridadoe manangkoep panoerirang i. Djadi doeng dapot halahi ibana, ro ma dok ni oeloebalang i toe sia : „o halak ni Debata ! parenta ni radja i angkon hami oban ko sannari,” ning ia. Ro Si Elias : „moeda toetoe halak ni Debata aoe, disoro porkas ma hamoe soede sannari,” ning ia. Aha dope, tongkin i disoro porkas ma halahi. Bolkas toe radja i bari-tana i, disoeroe ia manigor mangoelahi oeloebalang dohot lima poeloe soridadoe, laing songon i moese ma oedjoengna. Patoloenolihon disoeroe radja i oeloebalang dohot lima poeloe soridadoe, djadi hara ni biarna marbisoeuk ma oeloebalang i, denggan didokkon ia hatania songon on : „o halak ni Debata ! sajang ma djolo rohamoe di hosana-mi, oelang mate hami songon dongannami nangkin,” ning ia. Djadi nada bagi mahoea halahi, dihoetkon panoerirang i ma halahi. Asa doeng ro panoerirang i toe adopan ni radja i, didokkon ia ma : „disoeroe ho manjapai sandaran ni begoe, biasi nada diingot ko Debata na sasada i ? Hara ni i mate ma ho dibaen njaemi,” ning ia. Peto, nada piga ari doeng i, mate ma radja Ahasia.

---

#### PONGGOL 50.

#### Taringot toe panoerirang Elisa.

Asa doeng toek dipodai panoerirang Elias dongannia Si Elisa, dapot ma ari na giot boeaton ni Debata ma ibana sian tano on. Nada songon hamamate na somal di hita manoesia anggo hamamate ni panoerirang Elias. Saoelak di na mardalan-dalan ia rap dohot Si Elisa,

tompoe ro api sian gindjang, djadi diida Si Elisa ma kareta, na nisarat ni koedo di bagasan api i, kareta i dohot koedo i rap api moese. Djadi diida ia, manæk ma toe si panoerirang Si Elias, dioban kareta i ibana toe gindjang lopes nada tarida be. Laho toe gindjang didaboehon Si Elias oelosnia, antjo pakeon ni Si Elisa, tandana sahat di sia ma lang-gaman ni goeroena i.

Ia panoerirang Elisa pe, na gogoan do mangalo parbegoeon i, na da marnalodja mamoloes hoeta pasoenggoel-soenggoel roha ni halak. Saoelak di hoeta Bethel, laho masoek toe hoeta i, diintjahi dakdanak hoeta i ma ibana, dipaihoet-ihoet halahi ma ibana marsoerak-soerak mandok: „djo palpal! djo palpal!”, harana nada sadia adong oboek-nia. Djadi diboerai panoerirang i ma halahi, dibaen so marpopat pamangan ni halahi. Doeng adong santongkin, ro ma doea gompoe na bolon, disorosa ma dakdanak i, adong ma opat poeloe doea mate. I ma oehoemna, dibaen so dibotosa marpantoer ni roha adop na tobang.

Godang dilehen Debata di panoerirang Elisa sinaloan mambaen hahomangan. Saoelak ro ma dadaboroe na mabaloe toe sia hoemoloskon dangolnia i. Hara ni bahat ni oetang, na nitinggalkon ni na nisondoeknia, marpoepoe ditoenggoe djana disosak paroetangan i ibana manggarar. Djadi dibaen na so dapot ia gararna, giot diboeat paroetangan i ma anakna baenon hatoban. Doeng dibege panoerirang i holos ni dadaboroe i, disapai ia ma: „aha do na adong di bagasmoe?” ning ia. Ro dadaboroe i: „na siak bagi ma antong, aha ma hoepadjop goerpak-goerpak, hoem katjo parmiahan angkiboeng, i ma ia!” ning ia. Ro panoerirang i: „antong, kehe ma ni, indjam katjo parmiahan, barang na piga ma dapot ko, nada marimbar. Doeng i, goroe ma pintoe dohot djandela, boeat katjomi, paoese miak na di bagasan ni i toe katjo, na niindjammi lopes gok soede”, ning ia. Longang do nian dadaboroe i oembegesa, tai laing kehe do ia mambaensa. Peto do hape, sanga sadia bahat pe katjo adong, gok ia do soede dohot miak na sian katjonia i. Djadi doeng marisi soede, dipaboa ia i di panoerirang i. Ro panoerirang: „antong, gadis ma miak i, garar ma oetangmoe sian i, lobina i parbalandjoi ma i,” ning ia.

Sada nari barita taringot toe ibo ni roha ni panoerirang Si Elisa. Adong ma halak Siria, Si Naeman goarna, sisomba begoe do nian, tai na denggan rohana. Hamoraänna dohot sinadonganna toek do, tapi sonangna soada, harana poeroeon godang ia. Djadi adong ma di ba-



gasnia boroe Israel, boedjing maradjar dope, na tartaban na djolo. dompak marmoesoe halak Siria dohot halak Israel. Djadi hara ni ibo ni rohana marnida panaonan ni morana i, ro hatana : „soegari ra morangkoe nian manopot panoerirang Si Elisa na di hami an, arop rohangkoe maloem ia do njae i,” ning ia. Mangasa hantjitna diparate-atehon Si Naeman hata ni dakdanak i, dipaboa ia i di radjanian, angke nada tarbaen ia kehe so marpaboa, harana marpangkat ia. Djadi doeng dibege radja i hata ni Si Naeman, didokkon ia: „toemboek rohangkoe marobat hamoe toe si, oelang so maloem hamoe moeda moelak. I pe, maroban soerat ma hamoe lehenon di radja Israel. antjo ditolong ia hamoe,” ning ia. Djadi markobas ma Si Naeman, diboan ia angka siloea na somal lehenon toe datoe. Djadi doeng bolkas ia toe hoeta ni radja Israel, dilehen ia ma soerat i di radja i. Djadi tarsonggot ma radja i mamasa soerat i, pola disibakkon ia abitna sian marsakna, ning ia : „aoe lakna Debata, na malo pamaloemkon halak na poeroeon godang? Akal do i mandjalahi dalan marbada dohot marmoesoe,” ning ia.

Asa dompak songon i, ro ma soeroean ni panoerirang Elisa mandok : „tona ni panoerirang i di radja i, oelang marsak rohanta hara ni soerat i, disoeroe radja i ma halak Siria i toe bagas ni panoerirang i,” ning ia. Daboe ma roha ni radja i, disoeroe ia ma Si Naeman toe si.

Asa doeng di alaman ni panoerirang i Si Naeman, ro ma halak sian bagas i mandok di sia : „pandok ni panoerirang i, kehe ma hamoe toe batang aek Jordan, maridi ma hamoe di si pitoe noli, hoem songon i pe baen hamoe, maloem ma poeroe i, ias ma hamoe,” ning ia. Djadi aha ma roha ni Si Naeman dibaen hata i, didokkon ia ma di dongannia : „na lobi ma on, sai dao ma taboloes i manopot panoerirang i toe son, di alaman i dope iba, ro ma na mandok kehe. Ningkoe ligionnia do njae i sanga djamaonna pamatangkoe, hape hoem na maridi di Aek Jordan disoeroe ia inda be antong ! Keta moelak, anggo hoem na maridi do diboto ia obatna, goemodang do aek di hita an bope loeman,” ning ia. Ro dongannia, didoega halahi palambok-lambokkon rohania, ring halahi ma : „oelang tolpoek djolo rohamoe, betak angkon songon i do pangalahona, nada binoto ! Gari didok panoerirang i na maol baenon, inda dikaredjohon ko i manigor ? On, baenon na momo do, pade ma he niamboengkon hatania hara ni i ? Gonan tadoega, adatoea mangasi,” ning halahi. Djadi momboen ma roha ni Si Naeman, kehe ma ia toe Aek Jordan, maridi ma ia di

si pitoe noli. Djadi doeng pitoe noli maridi ia, aha dope, marmalosan ma hantjitnia i laloe maloem na santongkin i. Moga ma antong Si Naeman, hapogan ma ia moelak toe panoerirang i, ning ia ma : „saonari tangkas ma di aoe, nada adong Debata di balik ni Debata na sasada i na nisomba ni halak Israel. On pe, adong do hoeboan siloea saotik tanda godang ni rohangkoe,” ning ia. Ro panoerirang i : „oelang aha rohamoe da, nada tardjagit aoe bagi aha, moelak ma ho,” ning ia. Doeng i moelak ma Si Naeman dohot dongannia.

Asa adong ma naposo ni panoerirang i, Si Gehasi goarna, manangi-nangi do ia dompak mangkobari morania i dohot Si Naeman. Impol antong rohania marnida siloea, na nioban ni Si Naemar i, tapi nada poeloek ia mangido, didokroha nia di bagasar : „na oto ma morangki, nada ra ia mandjagit bagi aha. Moeda doeng kehe bajo i, hoeihoetkon noma, antjo hoepangido saotik, pinomat abit sangkarambar dapot.” Djadi doeng kehe Si Naeman, diajak-ajak ia ma, tongkon manaili Si Naeman toe poedi, diida ia ro Si Gehasi marlodjong, midjoer ma ia sian karetania, disapai ia ma : „aha do na masa ?” ning ia. Ro Si Gehasi : „nada pola bia da nian, disoeroe panoerirang i aoe mangajak-ajak hamoe mangido siloea sere satail, pakean doea salin, harana ro bajo nangkin, nada adong lehenonnia,” ning ia. Ro Si Naeman : „mahoea i, iabo oembahat, djop rohangkoe,” ning ia. Djadi dilehen ia i. Doeng moelak Si Gehasi, diboenihon ia i manigor, oelang diboto panoerirang i. Hape dibotosa do. Disapai ia Si Gehasi : „toe dia do ho nangkin ?” ning ia. Ro Si Gehasi : „nada bagi toe dia,” ning ia. Ro panoerirang i : „boengkakmi, hoeboto do rohamoe, sian dia dapot ko sere dohot abit i? Toetoe ninna rohamoe, na doeng mamora ho, tai langkot ma toe ho poeroe ni Si Naeman, nada tola maloem matoea!” ning ia. Djadi poeroeon godang ma Si Gehasi, oehoem do i di sia hara ni impol ni rohana dohot gaboesna.

---

## PONGGOL 51.

### Taringot toe panoerirang Jonas.

Hatiha dompak Si Jerobeam radja ni halak Israel, adong ma panoerirang na margoar Si Jonas. Djadi disoeroe Debata maibana saaelak toe halak Assoer, halak sisomba begoe, paboahon na giot hona oehoem ma halahi. Na godangan do hoeta raja ni halahi, Niniwe goarna,

pangisina pe marpoeloe riboe. Soegari marlaho-laho iba hoemaliang hoeta i, hasaja do toloe ari toloe borngin antjo dapot sangkoeliang.

Djadi nada djop roha ni Si Jonas toe si, singkat na kehe toe Niniwe, kehe ia toe hoeta Jope na di topi laoet, antjo naek kopal ia laho toe Tarsin. Djadi doeng di tonga-laoet kopal na maroban ia, ro ma haba-haba toenggal, riboet ma laoet i, ombakna na bolonan, hoehoel songon na bonom kopal i idaon. Tiang ni kopal mangkaripoek, lajarna mangkasibak, didok roha ni halak kopal i na harom sadjo ma. Djadi diparentahon radja i, soede halak na di kopal i angkon marsisomba toe debatana be, ampot doempang ibo ni roha.

Anggo Si Jonas, na sinohan ia modom, songon na so adong parmaraän, djadi disoenggoel radja ni kopal i ibana, didokkon ia : „biasi antong modom ko? ngot ko, ale, somba debatamoe, oelang mate mogap kita,” ning ia.

Sanga bia pe binaen, nada ra so laoet i, moer toe riboetna do. Djadi ro dok ni halak kopal i : „mardadoe hita, betak adong na djahat di kopal on, dibaen na ro songon i toe hita. Sanga ise ditoedoe dadoe i, taämboengkon toe laoet,” ningi halahi. Diadi mardadoe ma halahi, tarkona ma panoerirang Si Jonas. Djadi disapai halahi ibana sanga aha hadjahatannia, ro ia : „on do salangkoe, disoeroe Debata aoe toe Niniwe, nada kehe aoe, i do dibaen na masa on di hita. Amboengkon hamoe ma aoe toe laoet i antjo so i,” ning ia. Djadi diamboengkon halahi ma ibana toe laoet i, djadi so ma i toetoe.

Asa doeng madaboe Si Jonas toe laoet, disoeroe Debata ma ihan raja na bolonan manolon ibana himpal. Djadi adong ma Si Jonas toloe ari toloe borngin di boetoeha ni ihan i, dioetahon ihan i ma ibana di darat i. Aha dope, toendoek ma Si Jonas, ra ma ia mangoloi pandok ni Debata, boeloes ma ia kehe toe Niniwe. Djadi mardjamita ma ia di halak hoeta i, ning ia ma : „opat poeloe ari nari sego ma hoeta on dibaen Debata.” Hoemitir do halak hoeta i oembegesa, porsaja do halahi manigor, marsisol soli rohana be ma, salang dohot radja i parodop rohana adop Debata, ning ia di parripenia i : „betak ra Debata marsajang ni roha oelang toeloes oehoem i,” ning ia. Djadi toetoe dibaen dipaoendoek halak Niniwe rohana, nada magotap dope asi ni roha ni Debata, nada toeloes ro oehoem i.

Anggo Si Jonas, doeng diida ia na so toeloes oehoem i, mardandi ma ia. Ro hatania : „hoeboto hian do paribo parlambok ni roha Debata, i do dibaen na hoegagai hatania naingkan i, gonan ma aoe

mate,” ning ia. Djadi adong ma sopo-sopo dipadjongdjong ia antjo dipanotnoti ia hasesego ni hoeta i, djadi borngin, dompak modom Si Jonas, toeboe ma doelang-doelang di 'amboengna i dibaen Debata. Torang ari diida Si Jonas hajoe i, djop ma rohania, dapot ma parsilaoengan ninna rohania, bo nada podo tonga ari, dipangan ambatar ma doelang-doelang i, malos ma i manigor. Djadi marsak ma roha ni Si Jonas, pola didokkon ia : „asoera mate aoe, daboe rohang-koe”, ning ia.

Djadi didokkon Debata ma di sia : „aha ma dalanna rimas rohamoe? Hara ni doelang-doelang i de he ? So bagi ho manjoean i sanga padoeroes-doeroes i antjo sigop magodang, di bagasan saborngin ia toeboe, di bagasan sada borngin ia mate, antong nada patoet be ninna rohamoe, ibo rohangkoe mida hoeta na sai godang, halakna marpoeloe riboe, angka na so oemboto siamoen dohot siambirang deba ?” ning ia.

Djadi tarkohom ma panoerirang i, angke tigor do dilala ia hata i.

---

## PONGGOL 52.

### Taringot toe haradjaän Israel.

Hira-hira doea ratoes onom poeloe onom taon manaon haradjaän Israel. Na mangaradjai di si adong ma sambilan bolas radja. Nada anggo sahatoeroenan halahi, lima noli mimbar haradjaän i sian horong na sada toe na sada. Dibaen na so disomba halahi be Debata na sasada i, nada tos masa bada, hoem na marsiboeroean do nam ramora i. Djadi moeda djat parange ni oeloean, otona so tarihoet toe si na nieloehon i. Ragam hadatoeon, paralemoen dohot parbegoeon masa na so tama pakeon ni halak na patoet. Datdat do nian disoeroe Debata panoerirang paingot halahi, tapi nada ditangihon halahi, oedjoengna nada tarbaen so ro oehoem.

Dompak Si Hosea radja, ro ma Si Salmanasar, radja ni halak Assoer, mamorangi halak Israel. Nada tarparim Si Hosea tahi ni halak Israel mangalo moesoe i, djadi taloe halahi. Diloas Si Salmanasar do laing radja Si Hosea, tapi nada tola padalan parenta be ia anggo so dapotan isin djolo sian Si Salmanasar, tambana olat ni i mangga-



rar beo bope marrodi ma halak Israel. Djadi doeng moelak radja Salmanasar, didoega Si Hosea mangalo, tapi songon pargaja ni hidje mangalap liklikna. Hoem dibege Si Salmanasar, ro ma ia manigor maroban soridadoe na lobi bahat. Djadi nada diloas ia be diingani halak Israel tano ni halabi; ama-ama, ina-ina, na tobang dohot na poso, soede dioban ia toe tano Assoer, na sabangso i diboeang ia, hoem saotik halak ditinggalkon ia di si, oelang pola taroelang sadjo. Dipaboengkaskon ia halak Assoer, barang na piga ripe, toe si antjo baoer halahi dohot halak Israel na tinggal i. Sian i toeboe ma bangso ni halak Samaria.

Tarida ma hasongtian do na nidok ni radja Salomo: adat na denggan pabangkit bangso, dosa i paboesoeekkonsa.

### PONGGOL 53.

#### Taringot toe haradjaän Joeda.

Anggo haradjaän Joeda hira-hira saratoes toloe poeloe opat taon loemolot manaon sian baradjaän Israel. Doea poeloe radja na mangaradjaia, pomparan ni radja Daoet soede, habahatanna halahi mango-loi begoe. Na tarbonggal dengganna, Si Josapat, Si Hiskia dohot Si Josia. Sada na tarbonggal djahatna, Si Akas do. Dipadjongdjong ia parkaoelan ni begoe di hoeta Jeroesalem, bagas djoro i disoeroe toetoepia, oelang adong na marsomba toe si. Doeng mate Si Akas, anaknia Si Hiskia ma gontina. Bagas djoro i dipaoeli ia, angka parkaoelan ni begoe diroempak ia, dioeloehon ia halak toe na denggan. Hatiha ia radja mantak haradjaän Israel, marriboe-riboe halak Israel ro toe tanonia mandjalahi pangondingan, oelang dohot tarboeang. Hara ni i ro radja Sanherib, anak ni radja Salmanasar, mamorangi radja Hiskia. Angka hoeta na menek-menek madoeng diboehar ia, hoem hoeta Jeroesalem noma na so toendoek dope. Djadi dihaliangi ia hoeta i dohot soridadoenia, oelang tarbaen roear masoek pangisina i. Djadi marsopoe-sopoe ma radja Sanherib adop radja Hiskia, ning ia: „na so margogo do Debatamoe, tjoebo ma djolo mangalo aoe.” Djadi marsak ma radja Hiskia, kehe ma ia toe bagas djoro i hoemolos toe Debata. Djadi doeng sidoeng ia martangiang, ro ma panoerirang Jesajas mandok: „pos ma roha ni radja i, marroha panjarihon do Debata di hita,” ning ia.

Borngir i tompoe masa bala di parangan ni radja Sanherib, adong ma saratoes salapan poeloe lima riboe halak mate dibaen soeroesoeroean ni Debata. Djadi mabiar ma radja Sanherib, laing borngin i dope ia kehe, sipsip ia moelak, nada poeloek ia be mangalo radja Hiskia.

Saoelak marnjae radja Hiskia hantjit, pola ro dok ni panoerirang Jesajas toe sia : „patoere ma soede, angke mate ma ho dibaen njaemon,” ning ia. Djadi marsak ma roha ni radja i, martangiang ma ia boti : „sajang ma rohamoe, ale Toehan, ingot ma tigor ni rohangkoe dohot denggar ri pambaenankoe, oelang djolo boeat hosangkoe, pamaloem ma djolo njaengkon,” ning ia. Djadi dompak ro panoerirang Jesajas mangaligi radja i, didokkon ia : „dioloi Debata do pangidoanmoe, toloe ari on maloem ma ho, tambaän ni Debata moese lima bolas taon nari toe oemoermoe,” ning ia. Toloe ari, tolöp ma radja i midjoer, kehe ma ia toe bagas djoro i mandok tarima kasi di Debata.

Asa doeng salpoe djandji na lima bolas taon i, mate ma radja Hiskia, anaknia Si Manasse ma gontina.

Pahompoe ni radja Manasse na margoar Si Josia, na denggan moese rohana. Salapan taon dope ia, naek radja ma ia. Na gogo do ia mangkadjongdjongkon goar ni Debata na sasada i. Dompak markaredjo halak saoelak di bagas djoro i, dapot Si Hilkia, sintoea ni malim i, poestaha di inganan na tar simo. Doeng dioengkap ia, diida ia oehoem dohot atoeran ni Si Moses do i. Na honohan ma mago poestaha i, djadi disoeroe taroehon ia i manigor toe radja i. Djadi doeng torang diboto radja Josia hatana i, didokkon ia : „patoet antong moeroek Debata di hita, dibaen dilaoasi ompoenta hata ni poestaha i,” ning ia. Djadi adong dompahi panoerirang dadaboroe na margoar Si Hoelda, toe si ma disoeroe radja i manjapai taringot toe hata ni poestaha i. Ro dadaboroe i : „laing patoeloeson ni Debata do soede oehoem na nidok ni poestaha i, tapi dibaen na bonar do roha ni radja i, nada ro dope i sapandjang mangoloe radja i,” ning ia.

Doengi dipalagoet radja Josia soede parripenia toe hoeta Jeroesalem pabegohon di halahi hata ni poestaha i. Djadi disoeroe ia moese na mangadjari halahi taringot toe si. Adong dope parkaoelan di hoeta Bethel na nipadjongdjong ni radja Jerobeam na hinanan, ditoetoeng radja Josia do i. Disoeroe boeka ia tanoman ni malim na markaoel na djolo di parkaoelan i, djadi rap dohot i ditoetoeng ia holi-holi ni halahi. Djadi toeloes ma na niloemba ni panoerirang i na djolo di hatiha ni radja Jerobeam (ligi al. 93).

Bahat pe na moeba di tano Joeda, hoem hara ni pir ni parenta ni radja Josia do. Anggo pangalaho ni halak ma songon ambasang, idaon limoes sian balian, tai boerboeron di bagasan. Bahat dope lohohot roha parbegoeon di halak Joeda i. Dibaen na markasonangan halahi, di-ambang halahi na so palaloeon ni Debata be angka oehoem i.

Hoem sada halak na mamboto roha ni Debata, i ma panoerirang Si Jeremias. Tangkas diboto ia, nada sadia honok nari ro ma halak Babel mangantak haradjaän Joeda i. Ning ia nada hasaja na mangalo, pasoedehon gogo do i, labona soada. Sai na manjotnjoti dilala ia atenia, moeda didjamitahon ia oehoem na giot baenon ni Debata.

Na sigopan hapengani masa na nidok ni panoerirang Si Jeremias. Adong ma dompahi porang ni halak Misir dohot halak Assoer. Djadi antjo tarbaen halak Misir masoek toe tano ni halak Assoer, angkon diboloes tano Joeda. Djadi dipalagoet radja Josia halaknia mangalo halak Misir i. Ro tona ni Si Parao Neko, radja Misir i, mandok : „oelang paälo-alo aoe, nada giot aoe mamorangi ho, hoem halak Assoer i do.” Laing kehe do Si Josia, marporang ma halahi di Padang Megiddo. Djadi taloe ma halak Joeda, radja Josia maboegang laloe mate dibaensa. Djadi di toroe ni parenta ni radja Misir i ma halak Joeda. Nada sadia lolot mimbar mora moese ma halahi, di toroe ni parenta ni radja Babel noma.

Nada toek be sampoele taon, ro ma Si Neboekadnesar, radja Babel i, maroban soridadoe bahat, disoerboe ia hoeta Jeroesalem dohot bagas djoro i, poentoeng soede. Halak Joeda i diboeang ia toe tano Babel.

Djadi diandoengi panoerirang Si Jeremias tanonia na taroelang dohot bangsonia na tarboeang. Hata ni andoeng-andoeng i nipadjop dope loepoes noeaeng.

---

#### PONGGOL 54.

### Taringot toe Si Daniel.

Nada pola bia parkantjitan ni halak Joeda di parboeangan i, habahatanna tiboe do mardomoe toe halak na di sini. Diloas radja Neboekadnesar do halahi marsidjalahi takarna. Na deba toetoe sai na markaloeloengoen toe tano hagodangan. Radja i pe djop do rohanian

roemiboer tanonia. Sadia tarpaändjoe-andjoe ia roha ni halak Joeda sanga tarpalapang ia, dibaen ia do. Moeda adong na tama na pistar, tola do marpangkat.

Djadi adong ma opat doli-doli halak Joeda, na nipasoeroeng ni radja i, na tola tinggal rap dohot ibana di bagas na godang, i ma Si Daniel, Si Sadarak, Si Mesak dohot Si Abetnego. Disoeroe radja i halahi sikola antjo pistar halahi. Giot ni radja i moese, oelang so denggan tompa ni doli-doli nangkinan i, djadi diparentahon ia, angkon tong-tong tabo panganon ni halahi. Sanga aha panganon dohot inoemon ni radja i, angkon songon i moese di halahi, totop sada halak dibaen radja i patoere panganon ni halahi. Anggo di Si Daniel dohot dongannia hoerang do toemboekna, didokkon ia di na patoere panganon i : „aha goenana he hami pangan na so somal, laing na manggoendjal ma boetoehanami dibaen i. Hoem indahan pe di hami dohot boeloeng botik, aek pe inoemonnami, toek do i,” ning ia. Ro bajo i : „betak marniangi hamoe dibaen i sanga langan-langan, djadi aoe do na hona moeroek,” ning ia. Ro Si Daniel: „nada i! tadoega ma djolo sampoe-loe ari on,” ning ia. Salpoe na sampoe-loe ari i, diligi na patoere panganon i ma doli-doli na opat i, hape oemmokmok roemara halahi sian na djolo. Djadi diloas ia ma halahi patoere panganon ni halahi.

Doli-doli na opat i ma na oempistar sian soede dongan sasikola. Sian na opat i, Si Daniel dope na soemoeroeng. Djadi doeng maroe-djoeng sikola ni halahi, dapotan pangkat ma halahi. Paroehoem do anggo Si Sadarak, Si Mesak dohot Si Abetnego, tapi Si Daniel tinggal di bagas na godangrap dohot radja i, harana nada ra radja i mangalehen parenta sanga atoeran na imbaroe, ia so djolo disapai ia Si Daniel. Djadi tarpoedji ma halidangan ni halahi.

Na goemodang dope sipoedjion, nada ra halahi toeminggalkon hata ni Debata. Togoe do roha ni halahi di si, nada olo halahi paihoet-ihoet halak na manjomba gana-ganaän. Gonan mago pangkat, mate pe djadi soegari, asal oelang mago oegamo ni halahi. Saoelak hona pang-oedjian halahi hara ni i. Dipambaenkon radja i gambaran sere na godang sanoli, hintjatna onom poeloe elak. Doeng sidoeng gambaran i, dipaniho-nihohon radja i : „moeda dibege hamoe sora nigondangi, toengkap ma hamoe asa manjomba gambaran sere na nipadjong-djong ni radja Neboekadnesar. Barang ise na so ra, niamboengkon ma ia toe pamoeroenan na tarlobi milas apina,” ninna.

Djadi dompak na marpesta halak hara ni gambaran i, manondoer



ma Si Sadarak, Si Mesak dohot Si Abetnego. Djadi mangkoeling ma gondang i, toengkap ma soede halak marsomba, halahi na toloe nada. Djadi diasoengkon halak ma halahi, dibaen na so dohot halahi toengkap. Doeng nioban halahi toe djolo ni radja i, didokkon ia : „aha songon i ! nada ra hamoe manjomba debatangkoe ? Taida ma djolo sanga adong dope Debata na goemogo paloeahon hamoe,” ning ia. Ro halahi : „toek do gogo ni Debatanami paloeahon hami sian pamoeroenan i ; bo so dipaloea Ia, laing so olo hami manjomba gambaran i,” ning halahi. Djadi tarrimas ma roha ni radja i, diparentahon ia angkon pitoe noli oemmilas nipagara api i sian na somal, antjo niamboengkon halahi toe si. Salakoe nada hadonohan be api i hara ni milasna, hoem donok pe boeloes mate mosok, indangkon dope diliap djilamna i. Toe si ma diamboengkon halahi doli-doli na toloe i. Anggo didok roha ni halak soedena, boeloes mate halahi, hape nada ! Tangkes diida radja i halahi mardalan-dalan di pamoeroenan i oempe bagi mahoea. I pe, nada hoem toloe halak, adong dope dongan ni halahi sada nari. Djadi homang ma roha ni radja i, disapai ia ma oeloebalangnia : „nada he toloe halak hoedok baenon toe pamoeroenan i, biasi adong opat ? I pe, nada bagi mahoea halahi hoeida, na sangapan moese do pangalaho ni bajo na sada nari i,” ning ia. Djadi dipadonok radja i toe pamoeroenan i, dipiohon ia ma halahi, ning ia : „djo Sadarak, Mesak bope ho, Abetnego, hamoe na mangoloi Debata na so halompoan, haroea ma hamoe sian api i, ro ma hamoe toe son !” ning ia. Djadi haroea ma halahi, diida halak soede oempe mosok halahi, abit ni halahi salang moeap timoes soada. Djadi ro dok ni radja i : „poedjion ma Debata, na manjoeroehon soeroe-soeroeanna mandjagahon na mangkaposi Ibana,” ning ia. Djadi ro ma parenta ni radja i, oehoemon do barang ise, na poeloek mangintjak-intjahi Debata ni halahi.

---

#### PONGGOL 55.

#### Taringot toe Si Daniel (oedoetna).

Di hatiha ni radja Darioes ma na soemangap Si Daniel bope na goemodang koeasona, pola mardongki namora-mora i di sia. Djadi martahi-tahi ma halahi sanga bia ma akal mandaboehon ibana. Na maolan do i nian, angke nada oendjoeng sale Si Daniel, tai manam-

boes do bisoek ni pangago. Djotdjot diida halahi Si Daniel marsi-mora-mora toe Toehan di bagasnia, toloe noli sadari laing dibaen ia i. Djadi marlagoet ma namora-mora i, ditahi halahi ma antjo nimpangido toe radja i padalankon atoeran na imbaroe na mandok, nada djadi marsinta-sinta halak barang toe ise pe haloes koem toe radja i di bagasan toloe poeloe ari. Moeda adong na mangalaosi, oehoemon ma ia, oehoemna : nidaboehon ia toe piloebang habiat.

Djadi toemboek dibege radja i hata ni namora-mora i, boeloes disoeroe ia na marniho-nihohonsa, oelang adong be na so oembotosa. Anggo Si Daniel, dibege ia do nian parenta i, tapi nada ra ia mangantak na martangiang i. Sangap diida ia radja i, soemangap dope Debata.

Asa doeng laloe dipadalan radja i parenta i, sai mamoloes-moloes namora-mora i sian djolo ni bagas ni Si Daniel mangaligi sanga laing dibaen ia na martangiang i. Djadi doeng tangkas diida halahi, mangadap ma halahi toe radja i, didok halahi ma : „on do dibaen na rohami toe adopanta, madoeng diparentahon radja i nada tola marsinta-sinta halak toe ise pe haloes koem toe radja i na toloe poeloe ari on. Saonari ma torang hami ida, adong dope hapengani halak na poeloek mangalaosi parenta i. Bajo i. Si Daniel do i, laing dipoepe ia na martangiang toe Debata, nada he mangido na martangiang ? Hami pangido di radja i antjo nioehoem ia,” ning halahi. Djadi tarkohom ma radja i, harana holong do rohania di Si Daniel. Diampini ia do nian ibana, tapi ro namora-mora i : „atoeran ni radja nada tola nipaoeba-oeba, na sala patoet nioehoem,” ning halahi. Djadi doeng nada hagagaän be hata ni namora-mora i, diloas radja i nidaboehon Si Daniel toe piloebang habiat i. Laho kehe toe si Si Daniel, didok radja i di sia : „o Daniel ! nada tarpaloea aoe ho nian, tapi pos ma rohamoe di Debatamoe na nioloanmi sahonokna, dipaloea Ia do ho sian pandjomak ni habiat i,” ning ia. Doeng i didaboehon halahi ma Si Daniel toe piloebang i, digoelang halahi ma batoe na godang toe hamasoehanna i, oelang tarbaen ia haroe ar.

Doeng kehe Si Daniel, inda marnasonang be roha ni radja i, mangan so giot, tarpodom pe soada, hoem torang ari dilodjong ia ma .toe piloebang habiat i, pio-pio ma ia : „djo Daniel ! djo Daniel ! toetoe de he margogo Debatamoe mangondingi ho ?” ning ia. Ro Si Daniel „margogo ma toetoe, nada bagi mahoea dope aoe, haroe diontjong habiat i aoe. Disoeroe Debata do soeroe-soeroeannia mangondingi

aoe," ning ia. Moga ma antong roha ni radja i, djalop dipaloea ia Si Daniel, djadi didokkon ia antjo nidaboehon namora-mora i na mangadoehon Si Daniel toe piloebang i. Aha dope, nada podo laloe halahi toe toroe, ma ngangang hoemani batiat i giot manjoro halahi, abis-abis dipangansa. Sintap ni i dihabiari radja i ma Debata ni Si Daniel.

---

## PONGGOL 56.

### **Taringot toe hamoemoelak ni halak Israel sian haboeangan i.**

Asa doeng toek pitoe poeloe taon di haboeangan halak Israel, maribo ni roha ma Debata, ditoeboehon Ia ma di roha ni radja Kores paloeahon halahi. Djadi dilehen radja i ma soerat haloeaän, hatana songon on : Debata, nampoena langit, mangalehen koeaso di aoe di soede haradjaän na di tano on, Ia ma manoeboehon di rohangkoe, antjo hoepadjongdjong bagas parsombaän di sia di hoeta Jeroesalem na di tano Joeda. Barang ise na manjomba Ibana, didongani Debata ma, tola do ia moelak toe hoeta Jeroesalem padjongdjong bagas parsombaän di Toehan Jahowa, Debata ni halak Israel. Sada na so moelak i, dioeroepi ia ma donganna na moelak i dohot sere sanga perak sanga pahan-pahanan sanga balandjo dohot angka na asing-asing siloea toe bagas djoro na giot padjongdjongon di sadoe i, ninna. Djadi moga ma halak Israel dibaen hata ni soerat i, manigor adong ma na markobas. Hira-hira lima poeloe riboe halak na pardjolo moelak. Hoem bolkas, dirohahon halahi ma na paoelihon hoeta Jeroesalem i na doeng loboe sai lolot. Dipoenka halahi moese padjongdjong bagas djoro i. Asa nada sadia honok doeng di si, ro ma halak Samaria mangido antjo dohot mangoeroepi, nada dipatola Si Seroebabel dohot Si Josoea, pangoele ni halak Israel, dibaen satonga parbegoe do anggo roha ni halahi. Djadi hantjit ma roha ni halahi, mangadoe-adoe ma halahi toe radja Kores, oelang diloas ia be nipaoeli mangoelahi hoeta Jeroesalem dohot bagas djoro i. harana ninna, sian na robi dope laing na sipanggaori dohot sipamola-mola ma anggo radja ni halak Israel. Djadi doeng dipareso radja Kores angka soerat parningotan sanga toetoe pangadoean ni

halak Samaria, disoeroe antak ia na paoelihon hoeta Jeroesalem dohot na padjongdjongkon bagas djoro i.

Songon na madaboe toemboek do di roha ni halak Israel pangantak ni radja Kores, angke madoeng loemosok roha i padjongdjong bagas djoro i, mari-ari ma doeng didok na tobang doemenggan bagas djoro na hinanan.

Na lolotan dope antjo tola didjama halahi karedjo i mangoelahi, i ma di hatiha dompak Si Darioes radja ni halak Parsi, hira-hira doea poeloe taon doeng moelak toe tano hagodangan i. Bagas djoro i ma na toemiboe sidoeng, anggo na paoelihon hoeta Jeroesalem i loemambat ma halahi hara ni bahat ni parsalisian. Adong na so haroe toere parangena, deba mamboeat boroe ni halak parbegoe djadi tarihoet ma roha ni halahi oelang sego parkaoeman. Halak Samaria pe maranjok ni roha, dipoepoe diganggoe halahi halak Israel markaredjo.

Doeng pe ro Si Esra asa moeba bahat. Lima poeloe taon doeng sidoeng bagas djoro i, di hatiha dompak Si Artasasta radja, ro ma ia sian tano haboeangan i maroban dongan. Midoek do siloea boanon ni halahi dilehen radja i padenggankon bagas djoro i, pola ro hata ni Si Esra mandok: „pinoedji ma Toehan Jahowa, Debata ni ompoenta, na mangondjar roha ni radja i, antjo tarpadenggan hita bagas djoro i di hoeta Jeroesalem,” ning ia.

Djadi doeng ro Si Esra di hoeta Jeroesalem, bahat diida ia parange nidongan na so hombar toe Hata ni Debata. Djadi marsak ma rohania martangiang ma ia boti: „O Toehan ! maila do aoe manaili toe Ho, angke ma bahat dosanami, loepoes toe langit martimboen-timboen ma salanami. Tama dioehoem Ko hami, harana na tigor sanoli do Ho. Ise do na manaon di djolomoe ?” ning ia.

Djadi doeng diida halak marsak ni roha ni Si Esra, marroan ma na tobang-tobang dohot na torop manopoti sala, didok halahi: „hami paoeba pe rohanami, asal diadjari ho hami,” ning halahi. Ro Si Esra, didokkon ia angkon dipakehe halahi boroe ni halak parbegoe oelang marbaoer be, djadi dipakehe halahi. Hara ni pandasdas ni Si Esra goemogo ma roha ni halahi toe na paoelihon hoeta Jeroesalem i. Maol do nian karedjo i, angke hoem sidoeng saotik, bo ro ma halak Samaria manjegohon, hoerang sigop moelak sangap hoeta i.

---



## PONGGOL 57.

## Taringot toe Si Nehemia.

Adong ma dompahi halak Israel, na margoar Si Nehemia, na mar-pangkat na godang di tano haboeangan i, dipaboa halak di sia panga-laho ni karedjo i di hoeta Jeroesalem dohot pambaenan ni halak Sa-maria, marsak ma rohania padjaha-djaha i. Saoelak mangkobar ma ia dohot radja Artasasta, didok radja i ma : „biasa sai songon na halom bohimoë ? adong ke bagi marnjae ho ? dia do haskas ni rohamoë lakna ? paboa di aoe,” ning ia. Ro Si Nehemia : „santabe di radja i, di dia ma tarbaen aoe moga, songon i ma bile ni hoetanami ! Dipoe-poe digar-gar moesoe i tano batona, horbanganna disoerboe ia,” ning ia. Ro radja i : „antong, aha do giotmoë soegari ?” ning ia. Ro Si Nehemia : „moeda toemboek di roha ni radja i, taloas ma djolo toe si aoe mang-arahon dongankoe pasidoeng karedjo i,” ning ia. Ro radja i : „sadia honok hasaja ho di si dipingkir ho ?” ning ia. Ro Si Nehemia : „nada tarboho aoe dope i, lani, tapi hoem lajak tartinggalkon pe i, moelak ma aoe toe son,” ning ia. Ro radja i : „antong, kehe ma ho toe si, hoelehen soerat boanonmoë di angka radja na di si, antjo dito-long halahi ho,” ning ia. Djadi kehe ma Si Nehemia toe si.

Asa doeng ro ia di hoeta Jeroesalem, dipareso ia ma sanga sadia na so sidoeng dope. Diarahon ia ma halak soede, ning ia : „oelang mandele rohamoenoe, dongan ! nada djadi so sidoeng karedjonta, angkon moelak sangap hoeta ni ompoenta,” ning ia. Ro na tobang-tobang i : „rim ma tahinta anggo songon i,” ning halahi. Anggo moesoe i mangintjahi ma manigor, mandok : „nada sidoeng kamoe i haroe na bia pe,” ninna. Ro aloes ni Si Nehemia : „Debata, nampoena langit, padjadi karedjonami, hami naposona mambaensa lopoës sidoeng,” ning ia. Djadi dibaen sai didoega moesoe i manjegohon ,diatoerkon Si Nehemia antjo tongtong, arian na borngin, nisaroan na doeng sidoeng i. Djadi marsioban sendjatana be ma halak toe karedjo i. antjo tarbaen mangalo ampot tompoe ro moesoe i, manombo di tangan na sada sendjata, di na sada nari pandjamaän. Djadi doeng salpoe pitoe boelan, sidoeng ma soede.

Asa doeng sidoeng, dipalagoet Si Nehemia ma halak Israel, antjo dibege halahi angka patik dohot oehoem ni Si Moses, siseon ni Si Esra di djolo ni halahi. Oembege hatana i tangis ma halahi, ro ma

pandok ni Si Nehemia : „ari na denggar na badia do on, oelang hamoe tangis, angke madoeng moelak sangap moelia hoeta ni ompoenta. Marmoga-moga ma hita soede hara ni godang ni pangoeroepi ni Toehanta di hita,” ning ia. Djadi marmoga-moga ma halahi.

---

## PONGGOL 58.

### Taringot toe Si Ester.

Bahat dope halak Jahcedi (i do goar ni halak Israel olat ni on toe poedi) na so dohot moelak toe tano hagodangan, na tinggal di haboeangan i, harana ma togoe bope sonang halahi di si. Saoelak gintjip noma asa hona parmaraän godang halahi, hoem hara ni panolong ni Debata do dibaen na maloea. Anggo halak nampoena tano i hian, nada tardok na gigi roha di halak Jahoedi, radjana i pe, Si Ahasveros goarna, lambok do. Sada halak, na margoar Si Haman, na tarlobi hosom ni rohana mida halak Jahoedi. Na godangan do ate-ate ni bajo i. Moeda mamoloes ia, angkon loemobi hormatna dibaen halak toe sia dipangido ia, tai anggo ia, salang manaili nada ra.

Djadi adong ma halak, na margoar Si Mordahai, na so olo mangkormati ibana, ganop padoempang halahi, sego ma roha ni Si Haman. Djadi dibaen na halak Jahoedi Si Mordahai, tarandoroos ma hosom ni Si Haman toe soede halak Jahoedi, mandjalahi dalan ma ia mamoesasa soede. Djadi didokkon ia ma di radja i: „nada tama adong di tonga-tonga ni halak Parsi halak na asing adatna dohot oegamona. Moeda toemboek di radja i, niparentahon ma antjo niboenoe halak Jahoedi soede, nitontoehon hian ma arina i,” ning ia. Ro radja i „iabo, goeroe di ho ma i sanga bia ma antjo laloe,” ning ia. Djadi manongos soerat ma Si Haman toe soede radja mandok na boenoeon ma halak Jahoedi, dipaboa ia moese di soerat i ari boelanna. Moga ni Si Haman antong, nada boti-boti, anggo halak Jahoedi martangisan do. Bahat do nian dipingkiri roha ni djolma, roha ni Debata do na toeloes. Didjagahon Ia do, oelang mate rontjo halak Jahoedi.

Asa dompahi markordja ma saoelak radja Ahasveros. Sian soede loeat haradjaännia marroan ma radja-radja dohot namora-mora manopot hordja i. Djadi di matana i disoeroe alap radja i ma na doema i, Si Pasti goarna, antjo manortor ia. Giot ni radja i oelang

so dipoedji namora-mora i djogi ni nadoema i bope malonia manortor, tapi nada ra nadoema i. Djadi ila sadjo ma roha ni radja i dibaen panggagai ni nadoema i, songon i ma pola godang ni hordja. Mangasa milas ni rohana disirangkon ia di na santongkin i. Doeng i dipasahat ia ma di namora-mora i patamahon gontina, dipoeldit halahi ma Si Ester, boroe Jahoedi, na lobi denggan tompana dohot rohana. Boroe na dangol do ia nian, na tinggal maënek, na nipagodang ni ibotona Si Mordahai, tapi toemboek do roha ni radja i. Laho toe bagas ni radja i dipaingot Si Mordahai dope ia, oelang dipaboa ia boroe Jahoedi ia, harana mabiar ia diirang-irangi Si Haman.

Nada sadia honok doeng bolkas Si Ester, ditahi Si Haman ma na mangarontjohon halak Jahoedi i. Anggo Si Ester, nada diboto ia na giot masa di dongannia sabangso, doeng pe dipaboa boedjing-boedjing pangoloi asa disoeroe ia haposan ni rohana manjapai Si Mordahai. Djadi martona ma Si Mordahai di sia songon on : „topot ma radja i, holoskon ma dangolnami oelang mate sadjo hami,” ning ia. Martona Si Ester moelak : „nada tarbaen aoe manopot radja i, harana adong atoeran, barang ise na mangadap nada dipiohon radja i, maroetang hosa ma ia.” Ro ma balos ni Si Mordahai mandok : „oelang didok rohamoe sasada ho mangoloe, moeda donganmoe sabangso soede mate. I pe, betak na nipatama ni Debata do i sorangan ni radja i ho saonari, antjo tartolong ho halak Jahoedi.” Ro aloes ni Si Ester : „antong, marpoeaso ma hita toloe ari on, salpoe i hoetopot ma radja i. Moeda na mate aoe dibaen i, bia ma binaen, na doeng hatiha ma i di aoe,” ning ia.

Asa doeng salpoe na toloe ari, mangadap ma Si Ester. Laho mangadap hoemitir ma totnia, tapi doeng diida ia na djop basa ma panaili ni radja i, oempos ma rohania. Djadi disoerdoehon radja i ma toengkot haradjaän i, antjo didjama Si Ester, tanda lomo rohania. Djadi ro ma hata ni radja i : „aha do na nitopotmoenoe toe son?” ning ia. Ro Si Ester : „moeda toemboek roha ni radja i, rap ma hita mangan sadari on bope Si Haman,” ning ia. Ro radja i : „toemboek, ro ma hami anon, hoedok pe di Si Haman,” ning ia. Dapot hatiha mangan, ro ma halahi. Djadi doeng mangan didok radja i : „aha do pangidoanmoe?” ning ia. Ro Si Ester : „moeda laing toemboek do roha ni radja i, ro ma radja i rap dohot Si Haman mangoelahi antjogot, antjo hoedok pangidoan ni rohangkoe,” ning ia.

Laho moeli padoempang ma Si Haman dohot Si Mordahai, sego ma

rohanian. Doeng di bagas, dipadjodjor ia do nian soede di sorangan-nian, tapi ning ia moese : „hahoeangkoe i sangap anggo laing mangoloe Si Mordahai,” ning ia. Ro sorangannian : „na momo ma marsak ko hara ni bajo i, aoe hoeboto do i soegari. Padjongdjong ma hajoe pargantoengan, pangido ma di radja i, antjo tola digantoeng ko toe si Si Mordahai, aha dope, sonang ma ho mangan antjogot rap dohot radja i,” ning ia. Toemboek di Si Haman hata ni sorangannian, disoeroe ia ma manigor padjongdjong hajoe pargantoengan.

Djadi borngin na ro i nada tarpodom radja i, markalilian ma ia mamasa soerat parningotan taringot toe na masa na djolo, dapot ia ma di soerat i barita ni doea halak, na martahi mamoenoe radja i, dipaboa Si Mordahai tahi i di radja i, djadi nada laloe. Djadi disapai radja i ma dongannian sanga djoengada nibaloskon toe Si Mordahai pambaenanna na denggan i. Ro aloesna : „nada djoengada dope, lani,” ninna.

Hoem torang ari ro ma Si Haman giot mangido, antjo tola digantoeng ia Si Mordahai, tapi nada podo djabat hasapaän ia radja i, boeloes didok radja i ma : „atehe, Haman ! aha do na tama diboto ho baenon toe halak pasangapon ni radja i ?” ning ia. Djadi markoesari ma Si Haman : „ise ma pola pasangapon ni radja i di balik ni aoe,” ninna rohanian. djadi didokkon ia ma di radja i : „on ma na tama hoeboto, dipake bajo i ma abit ni radja i, nibaen ma hampoe toe oeloenia, dilomboet ia ma koedo ni radja i, nibaen ma sada na mangiring koedo i, pio-pio ma ia boti : „songon on ma baenon toe halak na giot pasangapon ni radja i,” ning ia. Ro radja i : „antong, baen ma i manjogot on toe Si Mordahai halak Jahoedi i,” ning ia. Galpo ma dilala Si Haman, tai nada poeloek ia manggagai. Ila ni rohanian so doeng mangiring koedo na nilomboet ni Si Mordahai i.

Djadi marajak hos ari kehe ma Si Haman toe bagas na godang mangan rap dohot radja i. Doeng simpoel mangan, didok radja i ma di Si Ester : „dok hamoe ma pangidoanmoenoe,” ning ia. Ro Si Ester : „on do pangidoankoe : pangoloe ma aoe dohot dongan sabangsangkoe, angke madoeng targadis hami, boenoeon ma hami soede,” ning ia. Ro radja i : „ise lakna na poeloek mamoenoe hamoe ?” ning ia. Ro Si Ester : „i ma da indadon Si Haman on, parkilang na djahat do ia,” ning ia. Adong ma di si naposo ni radja i, ning ia moese : „madoeng djongdjong tiang pargantoengan ni Si Mordahai dibaen Si Haman,” bo mari-ari rimas ma roha ni radja i, didokkon ia ma : „gantoeng



kamoe Si Haman toe si." ning ia. Djadi digantoeng halahi ma Si Haman toe hajoe na nipadjongdjongna di Si Mordahai. Djadi dilehen radja i ma pangkat ni Si Haman di Si Mordahai.

Doeng i didokkon Si Ester di radja i: „madceng dipangoloe ho aoe dohot paribotoönkoe Si Mordahai, tai bia nema dongan sabang-songkoe halak Jahoedi i? Di dia ma sonang aoe anggo laing boenoeon do halahi," ning ia. Ro radja i: „anggo parenta i nada tarbaen so laloe, tapi hoetongos ma soerat di soede radja-radja mandok tola do mangalo halak Jahoedi," ning ia. Djadi doempang ma arina i, marsidjago di ibana ma halak Jahoedi, bahat do nian mate, tapi oembahat dope halak Parsi. Sintap ni i dipasangap halak Jahoedi ma ari i ganop taon, Pesta Poerim ma goarna.

---

#### PONGGOL 59.

#### Taringot toe Si Hiob.

Ia boti ma hobaran ni Si Hiob na di tano Oes, halak na tigor, na oemboto marpohom ni roha, na so djoengada latinggalan maroban-kon oegamona i. Ia Si Hiob i ma halak namora na lobi na di gindjang ni tano on, di toroe ni langit, na tarbonggal hagabeanna toe soede banoea ni halak. Maranak marboroe do ia, anaknia pitoe, boroenia toloe. Anggo bahat ni pahan-pahanannia pitoe riboe biri-biri, toloe riboe oento, lima ratoes pasang lomboe, lima ratoes halode hoem boe-boroe.

Dibaen bahat ni sinadongan ni Si Hiob, marlajas ni roha dakdanaknia, hoem mangan modom dohot na marpesta-pesta ganop ari giot ni halahi, nada adong roha toe na denggan. Sai marsak do roha ni Si Hiob pasari-sari dakdanaknia i, ganop manjogot marsomba ia toe Debata mangido, oelang mamboeat mosal Ia di parange ni halahi ampot tceng adong na sala.

Asa saaelak sindorang marpesta-pesta dakdanak ni Si Hiob, ro ma halak marlodjong mandok toe sia: „oelang tarsonggot ko da, mangalontja aoe nangkin, ro moesoe i, halak Sabe i, bo dihoroes halahi lom-boenta dohot halodenta soede, naposomoe diboenoe halahi, sangki-boeng aoe do na maloea, roepana antjo adong na mambaritahon i di ho," ning ia. Nada djabat dope tarpatangkas Si Hiob pangalahona, bo mangoelahi ma ro halak marlodjong mandok: „madaboe nangkin

api sian langit na manjoro biri-birinta abis, rap dohot na marmahan i, hoemon aoe na so hona, roepana antjo adong na paboahon," ning ia. Dohonon na mardjamita dope bajo i, ro ma mangoelahi halak marlodjong mandok : „ro nangkin moesoe i, halak Kalde i, ditangko halahi oentonta, na marmahan i diboenoe halahi, hoemon aoe do na maloea, roepana antjo adong na paboahon," ning ia. Marbarita dope bajo i, bo ro ma mangoelahi halak marlodjong mandok: „marpesta- pesta dakdanak ni morangkoe, bo tompoe ro halinsoensoeng na go- go sahali, ditondong ia bagas inganan ni halahi laloe maroempak, ditinggang bagas i ma halahi, mate ma soede, angkiboeng aoe do na mangoloe, roepana antjo adong na paboahon," ning ia.

Oembege i soede, disibakkon Si Hiob ma abitnia sian marsak ni rohana, didokkon ia ma : „Toehan do na mangalehen, Toehan do na mamboeat, laing sipoedjion do goar ni Toehan," ning ia.

Nada sadia honok doeng i, hona ngenge moese ma Si Hiob, sap pamatangnia sian palakpak loepes toe amboeboe. Djoegoek-djoegoek do ia sasadari di lamboeng tatarang i, nada morot bagi toe dia, hoem dipoepoe dihajo ia pamatangnia dohot ngarngar ni hoedon tano. Anggo sorangannia ma mandele boti pe marmoengoet-moengoet adop Toehan, di hadeleanna i didokkon ia di Si Hiob : „aha labona dipasomba-somba ho Toehan, tinggalkon Ibana, gonan mate ho," ning ia. Ro Si Hiob : „songon hobar ni na oto hobarmoe, na denggan tadjagit sian Debata, ia na djat nada?" ning ia. Djadi haroe songon i pe soro ni ari toe sia, nada mardosa ia adop Debata.

Anggo ale-alenia Si Elipas, Si Bildad dohot Si Sopar, ro do nian mangaligi ia, tai na maolan dilala halahi mandok hata apoel-apoel di sia. Doeng diida halahi pardangolan ni Si Hiob, tangis ma halahi, pitoe ari pitoe borng'n djoegoek ma halahi di lamboengnia hohom be songon i, nada poeloek mangkoeling. Doeng i pe asa mangkoeling halahi. Diambang halahi adong dosa na boeni na binaen ni Si Hiob, djadi disolsoli halahi ibana. Ro aloes ni Si Hiob : „sadia honok nari arsahanmoenoe aoe, na manjotnjoti do hatamoenoe di ate-atengkoe. Na mangoloe do Si Patorkiskon aoe, diboto Debata do boerdjoe ni rohangkoe!" ning ia.

Djadi dibaen so ra Si Hiob maninggalkon dalan na denggan, maribo ni roha Debata di sia, dipamaloem ia ma hantjit ni Si Hiob. Doeng i moelak mamora ma ia, oemmora dope salipat sian na djolo, djabat adong opat bolas riboe biri-birinia, onom riboe oento, sariboe pasang

lombœ dohot halode hoem borœ-borœ. Maranak marborœ mangœlahi, mangolœ dope ia saratoes opat poelœ taon nari, mate matobang ia sajoer matœa boeloeng.

---

## PONGGOL 60.

### Hasidoenganna.

Asa on dope barita saotik nari paboahon na masa di halak Jahœdi lœpœs toe hatiha hasosorang ni Toehan Jesœs.

Doeng mate Si Esra dohot Si Nehemia, adong dope pitœ poelœ taon nari halahi di torœ ni parenta ni halak Parsi. Doeng i ro ma radja Iskander sian tano Gorik, ditalœhon ia halak Parsi, marradja toe sia noma halak Jahœdi. Doeng mate radja Iskander, parsoereian godang ma tano ni halahi, hoehoel marradja toe radja Siria, hoehoel toe radja Misir, goerœ di pangalahona do i, sanga ise na monang, i do na mamarenta. Adong ma lobi hoerang saratoes taon marradja halak Jahœdi toe radja Misir, sonang do halahi di si. Doeng i diradjai Si Antiokœs, radja Siria, halahi. Nada toemboek roha ni i disomba halak Jahœdi Debata na sasada i, manombo dielek-elek ia, manombo dipaksa ia maninggalkon oegamo ni halahi. Moer pir pangalo ni halak Jahœdi, moer diparkantjiti ia, djadi di na soen parkantjitan i, mangalo sitoetœ ma halahi, masa ma porang na lolotan. Dibaen dioelœhon Si Matatias halahi, digoar ma hatiha porang i hatiha ni halak Makabi, harana i do goar ni marga ni Si Matatias i. Di poedi ari dipatoehon halak Rom ma halahi, djadi dipabangkit halak Rom ma Si Herodes radja ni halahi, lœpœs toe haroro ni Toehan Jesœs laing horong ni i ma mangaradjai.

Honok ma nada adong be panoerirang paingot halahi. Sai dipaima-ha halahi panoerirang godang na palœahon halahi sian gomgoman ni halak Rom bope na padomœhon halahi gabe sada bangso songon di hatiha ni radja Daoet dohot radja Salomo. Toelœs do nian ro panoerirang godang mambaen dalan hasonangan di halak Israel bope di sandok djolma manœsia, tapi nada songon na nipingkirkon ni halahi. Toehan Jesœs do panoerirang godang i.

„Angke nada songon pingkiran ni djolma anggo pingkiran ni Debata, bope nada songon dalan ni djolma dalan ni Debata. Sanga sadia dao ni langit sian tano on, songon i moese dalan ni Debata soemoeroeng sian dalan ni djolma, bope pingkirannia sian pingkiranta.”

---







#374



